

لَمَاضَةٌ مَصْرِيَّةٌ جَدًّا

رِيهَامُ عَزِيزُ الدِّينِ

لماضة مصرية جدا
المؤلف: ريهام عزيز الدين

تدقيق لغوي: محمد مصطفى
تنسيق وإخراج داخلي: لخضر بن الزهرة
تصميم الغلاف: مروة فتحي
رقم الإيداع: 2019 / 26826
الترقيم الدولي: 978/977-85607-7-0
الطبعة الأولى: 2019
رئيس مجلس الإدارة: أ. د. محمود محمد السعيد
المدير العام: هالة البشبيشي



بريد إلكتروني: info@alhalapublishing.com

تليفون : 01110161117

العنوان: 26 ش 261 المعادي الجديدة

صفحة الفيسبوك: مركز الهالة الثقافي

<https://www.facebook.com/alhalapublishing>

جميع حقوق الطبع والنشر محفوظة للدار، ولا يحق لأي شخص أو مؤسسة أو جهة إعادة إصدار هذا الكتاب، أو جزء منه، أو نقله بأي شكل من الأشكال، أو وسيلة من وسائل نقل المعلومات، ولا يجوز تداوله إلكترونياً نسخاً أو تسجيلاً أو تخزيناً، دون إذن خطي من الدار.

جميع الآراء الواردة في هذا الكتاب تعبر عن رأي كاتبها، ولا تعبر بالضرورة عن رأي دار النشر.

لماضة مصرية جدا

ريهام عزيز الدين

إلى:

بنت بزعرورتين، ماشية في الدنيا بعيون مش بتبطل تسأل يعني إيه
وليه وازاي و اقنعي.

بتفكك مكعبات الحياة وبعدين بترجع تركيها، مرة تطلع متشقلبة
ومرة تطلع متظبطة، بس مش بتبطل، ولا بتعقل، ولا بتكبر لغاية ما
تلاقي دنيا شبه روحها.

لما ضيعة مصيرية
جدا

وعملت إيه فينا السنين؟!

لوانت واحد من سكان الكوكب الأزرق (إحم إحم الفيس بوك) هتلاحظ إن فيه خاصية جديدة بتعمل زي تجميعة لكل الأحداث اللي مرت عليك خلال السنة اللي فاتت.

والفكرة البسيطة المبهجة اللي بتحاول إنها تتبع المستخدم زي أي مخبر لابس بالطو وماشي وراك في العالم الافتراضي بتعتمد على علم بسيط اسمه علم "تحليل البيانات".

الفكرة على بساطتها إلا إنها انتشرت على الفيس بوك، ورسمت دواير من السعادة بين الناس وهم بيعملوا فلاش باك على السنّة اللي فاتت، وبتخلهم يقلبوا في دفاترهم القديمة عن صور لهم وهُم مبسوطين، أو هكذا يبدو عليهم. لحد كتابة السطور دي.

الفكرة قادرة إنها تطرح نفسها كجزء من إضفاء الحثة الإنسانية على المساحات البيضاء في التواصل الإلكتروني، وخصوصاً وهي بتخلي فلاش لمبة الذاكرة ينور على ذكريات شيلتها معاك في شكومية دماغك طول سنّة بحالها.

فكرة إن الإنسان يتعامل مع الزمن ويقسمه لأيام وشهور وسنين، يمكن تكون أكثر الأفكار إثارة، اتولدت مع احتياج الإنسان إنه يرصد يا ترى هو بيتغير؟ طيب وهيقيس التغيير اللي بيحصله ده ازاي.

الزمن في حد ذاته محدش شافه أبعد من تعاقب الليل والنهار، اللي هما إشارة واضحة وصريحة على حدوث التغيير كل يوم، وإن

مفيش حاجة بتثبت على حالة واحدة، لكن الزمن بكل مصطلحاته اللي نزلت مع الباكيدج بتاعته من أيام وشهور وسنين وقسم عندك اليوم ذاته لتفريعات تانية، كل ده اجتهاد من الإنسان نفسه. بس السؤال هو ليه يربط نفسه بالزمن اللي مش متشاف؟ ومستني منه إيه أصلاً؟

متهيألي اللحظة اللي صحي فيها الإنسان وهو عنده الإدراك إن الأرض اللي هي أكثر رمز للثبات بتتغير وبتتحرك، إذن فهو كمان بيتحرك وبتتغير.

ومن هنا اتولد عنده الرغبة الجارفة إنه يقيس التغيير اللي بيحصله على مقياس زمني، وبتبدي أقدم مهنة عرفها الإنسان بس بينكروهي مهنة موظف الأرشيف الشاطر اللي بيثيل كل حاجة في مخازن السنين وبيعرف يسترجعها ازاي لو انت بس اديته رقم السنة واسم الملف والحدوتة اللي حصلت في توقيت معين.

بس ممارسته لأرشفة أحداث حياته بالسنين مكنشي كافي ليه كإنسان طبيعته القلق والتساؤل والشغف، لأن تراكم السنين ابتدى يطرح عليه السؤال المُلح التالي:

هي السنين عملت فينا إيه؟ ولا إحنا اللي عملنا في السنين؟ ولا فيه حد تالت جه عمل فينا وفي السنين وسابنا ومشي؟

في عمليات التجميل علشان يغروا الزبون بيقسموا الإعلان لنصين، النص الأول بيكون قبل عملية التجميل والنص الثاني بيكون بعدها، علشان تقدر تقارن انت كنت إيه وياااااا اتحولت بقيت إيه.

فمتيألي إن فيه حد وسوس لدماغ الإنسان إنه يعمل أضخم عملية تجميلية في علاقته بالزمن، ويقرر إنه يشوف نفسه هو كمان قبل وبعد عدد معين من السنين.

قبل ما شريط الفلاش باك يكر بكادراته في مقدمة رأسك، أنصحك أنك ترتدي حزام الأمان لإنك ممكن تلاقي الآتي:

– ممكن تلاقي الكادرات من كاندروحياتك اللي كانت فيها مسارات حياتك تشبه الدائرة، بحيث كل نقطة عليها هي احتمالية للعودة للبدء من جديد، وهتفتكر مشاعر الغضب إنك عامل زي القرش الممسوح، إنك بتلف وبترجع تاني للنقطة اللي قررت أنك تبعد عنها.

وفي حقيقة الأمر لو عملت زووم إن بعدسة دماغك على تفاصيل الكادر ده هتكتشف إنك صحيح كنت بتراجع لنفس النقطة بس مكنتش نفس الشخص في لحظة المغادرة الأولى، عنيك اتغيرت، وفهمك لتركيبه تحت البازل اتغيرت، حتى شريط الترجمة اللي بينزل مصاحب لتفسير اللي كنت فاكر نفسك اتعودت عليه برضه اتغير. وده شيء تجميلي جميل يعني.

– هتلاقي الكادرات مصحوبة بدقات ساعة العمر العنيفة في الخلفية، واللي وقفت فيها على مفارق الطرق ومفيش أي مؤشر على الخريطة بيقولك المفروض تاخذ يمين شوية، ولا تجمد قلبك وتقفز خطوة للييسار، ولا تعمل بنصيحة الفائز الأول للمتأهين اللي قال لَمَّا تنوه ارسم خط مستقيم من أي نقطة وامشي لأخره.

يمكن مش هتوصل لوجهتك الأصلية بس على الأقل هتوصل لنقطة ما أبعد، هتفتكر القرارات اللي وقفت فيها مفارق طرق وغالبًا

لسه برضه و اقف، والتغيير اللي حصل إن المفارق مبقتشى تخوفك
ولا تاكل من روحك، اتصالحت مع كونها جزء من باكيدج الرحلة ذاته.
- هتلاقي كادرات زجراجية الطابع، ودي الهودرات اللي قابلتها في
حياتك، وكانت واخدة طابع متسلقي الجبال طالع نازل.

الأيام اللي عدت عليك وكانت مليانة بغزل البنات البمبي في كل
تفاصيلها، والأيام اللي عدت عليك وهي بتتحرك زي بندول عنيف
بيدق في راسك بين لونين أسود وأسود غطيس، هتفتكرها وهتفتكر
معاهم إنهم كلهم بطعامتهم وبمرازتهم عدوا.

يمكن ميكونش ليك الفضل انك انتصرت، أو للأسف انسحقت
فيهم، لكن اللي انت هتفتكره وده انتصارك التجميلي العظيم، إنهم
فعلياً عدوا.

- هتلاقي السنين اللي تشبه الرمال المتحركة اللي غرست فيها
وفضلت تشفطك بفعل سحرها الأسود لأبعد نقطة، لغاية ما إيد ما
اتمدتلك، وقررت ساعتها إنك لازم تعاند قوة الجذب لأسفل. وطلعت
عاش يا وحش.

- هتلاقي اللحظة المصيرية اللي بلبعت فيها كل حبوب الشجاعة
الممكنة، قررت فيها تمشي في الاتجاه المعاكس لاتجاه مجاميع
الفيلم، على الرغم من الخسارة المتوقعة.

إلا إنها كانت لحظات مش بتتكرر وقررت معاك لأنك قررت
ساعتها إنك تكون البطل الأوحده لفيلم من تأليفك انت، والسيناريو
بتاعه هو عركتك اللي قررت تنتصر فيها لنفسك، ولصوت بيفضل
يزن عليك علي استحياء جوه منك بعيد عن صخب الجماهير.

وانت بتتفرج على الكادرات دي، هتقدر تحط إيدك ليه انت
شاييل السنين دي كلها على كتفك وماشي، لأنها بلحظاتها وبكادراتها
وبحواديتها اللي اتحككت واتعاشت هي اللي قدرت تخليك كوكتيل
البنى آدم اللي انت عليه في اللحظة الحالية.

التراكمات اللي اتخزنت جوه منك من كل كادرات عديت عليه،
هي اللي خلت منك الملف الإنساني اللي مش هتنفع معاه عملية
تجميل لأنه مش محتاج لها.

هو محتاج يتفتح علشان يتقري جنب الشباك في نور النهار بعيون
قادرة تفك طلاسمه، وتفك شفرة الرقم المكتوب في خانة السنين
تحت بونديرة العمر اللي بيكرّ في تاكسي حياتك.

هتكتشف ساعتها مفتاح للإجابة على سؤال الرحلة اللي مش
بتنتهي صلاحيتها طول ما فيك لسه نفس:

إحنا مين؟

الأحصنة اللي بتجري من غير لجام في براح الخيال اللامحدود.
معناه إنه ابتدى يدرك إنه محتاج في اللحظة دي يخرج بره كهفه،
ويتعامل مع الكون كله بما لديه من حقائق ممتلئة بالدهشة، وبما
لديه من تساؤلات ليس لديه إجابات عنها مسبقاً سوى عنين مفجلة
على مفردات ميعرفهاش قبل كده.

وفي أول خطوة ليه بره الكهف بيدرك إنه بيقابل أشياء وأحداث
وكادرات كتير، بيسجلها على كارت الميموري بتاعه، لكنه لما يرجع
يحكيها للست حرمه في لحظة تويست معينة أدرك إنه لازم يحط
التاتش بتاعه، وخصوصاً إن نظرة الانبهار اللي شافها على وش الست
حرمه كفيلة بإنها تغريه إنه يصنع أسطوره الأولى، ويقدم حواديته في
شكل خارق بديع يستوجب عدد لانهائي من الشبهات.

في البداية الأسطورة بالنسبة ليه مكنتش غير مجرد حدوته
بيمارس فيها قدرته على وصف الحاجات اللي شافها في رحلته بره
الكهف، لكن مع مرور الوقت ابتدى يقابل كادرات بقى صعب على
عقله إنه يكتفي فقط بوصفها، فاستيقظ المارد جواه وشده ناحية
الاحتياج إنه يفهم ويحلل ويفسر كل الكادرات اللي مقدرش يفهمها
وقتها.

يمكن ده مفهوم لما كانت الزووم على الكاميرا بتجيبه هووهي في
كادرواحد كبطولة كاملة لفيلم الحياة وقتها، لكن الزوم ابتدى يكبر
وابتدت تفسيراته وأساطيره كمان تتغير.

الغريب والمدهش في الإنسان الأول إنه في كل أسطورة كان
بيحط فيها حته منه، وكأنه وهو بينسج خيوط الحدوته الأسطورية

بيدور على نفسه جوه الحدوتة، وبيقنع نفسه دايمًا إن المُخرج مديله دور البطل الأسطوري اللي الأحداث كلها بتتحرك حواليه أو من خلاله أو بواسطة قدراته الخارقة.

ويمكن ده بيفسر كتير من الأساطير اللي حكاها الإنسان الأول، وسجلها في أكبر كراسة للتاريخ على حيطان كهفه.

ليه الأسطورة كان بيبقى فيها بطل خارق في الأغلب كان عايز يشاور ويقول ”أنا البطل“ تسقيفة امال تشجيعة امال؟

احتياج الإنسان إنه يتوحد مع أسطورة ويكون جزء من حدوتة كبيرة اتمحى في فترة لَمَّا الطبيعة بفيضاناتها وزلازلها وعواصفها فجأة جبته على بوزه، وقالتله فوق لنفسك ”مش انت البطل“، انت مجرد كومبارس في فيلم كبير.

ساعتها ابتدى يداري فشله وبدل ما يحاول ينفخ بالونة الإيجو اللي فرقت منه بأي طريقة، ابتدى يحكي الأسطورة بطريقة تانية، يمكن مش هيكون فيها البطل ده صحيح، وهيضطر يخترع أبطال خارقين تانيين، واللي لازم يضيف عليهم خلطة سحرية من الملامح البشرية وأنصاف الآلهة، لكن المرة دي هيلعب بالكراسي، وهيمارس أسطوره كراوي للحدوتة وصايغ لها، وحاكمها عبر الأزمان والأجيال.

الأساطير اللي ساها الإنسان الأول وراه بتقول إنه كان بيحاول يتواصل مع الطبيعة حواليه، خصوصًا بعد ما هزمتها وجابته لمس أكتاف، وحس بضالة روحه وسط أحداث جسام.

لكن على جانب آخر، محدش قالنا يا ترى الطبيعة هي كمان قدرت تتواصل مع الإنسان، ووقعت بالموافقة على كل الأساطير

اللي رواها الإنسان الأول على لسانها ولا لأ؟

وعلشان كده الأسطورة هي الفعل اللي بيتشارك فيه الإنسان اللي قرر في لحظة زهق إنه يخرج بره كهفه، ويشبك نفسه في بكرة حواديت مبتتهيش، ويقدر يكر البكرة مع كل الإنسنات اللي شبهه، واللي هيقابلهم في مغامرة عقله الأولى.

ويمكن ده اللي بيميز عالم الإنسان، إنه عايز يحكي "عنه"، وإذا مكنتش الحدوتة "عنه" فهو عايز يحكي حدوتة، ما احنا مسمعناش إن القبط أو الكلاب أو الأحصنة أو الدب العايش في القطب الشمالي عندهم حواديت وأساطير بيحكوها للأجيال اللي بتيجي بعدهم.

وهكذا فإننا بكل أريحية نقدر نروح الشهر العقاري ونسجل فعل الحكي للحواديت والأساطير بيع وشرا ومخالصة كاملة تامة للإنسان ولا أحد غيره.

لَمَّا اتملت شريحة الميموري للإنسان الأول بفيض متناهي من الأساطير اللي بتدون مغامرته، وبتمجد في انتصاراته الخارقة، وبتداري على خيباته في صورة أبطال ثانويين هامشين في سرد الحدوتة، جه دور الأجيال إنها تستلم شكمجية الأساطير وتتوارثها فيما بينهم، وكأنهم بيشدوا على إيدين بعض إن بينا حاجة مميزة محدش هيفك تعويذتها ولا يفهم طلاسمها غيرنا.

ولمَّا وصلت لينا شريحة الميموري للإنسان الأول، وركبناها في درايف دماغنا، واحنا بنتلفت يمين وشمال أحسن حد يسرق الكنز بتاعنا، ملقناش غير حواديت ورغي كتير عن بطولات خارقة، ومحاولة من جدودنا الأوائل إنهم يقولولنا إنهم كانوا سبع رجالة ف بعض.

وإنهم مسكوا ديناصور الأنتشيورنيس (ديناصور طائر)، وقيفوا عليه بردعة، وروضوه كأى حيوان أليف.

على قد ما تركيبة دماغنا مقدرتش إنها تبص للحكي اللي مارسه الأوائل أبعد من مجرد كونه كوكتيل من ثلاث خاءات متتاليات: (خيال- خرافة- خوارق القدرات)، ويمكن لمَّا كنا صغيرين كنا بنحب ننام واحنا حاضنين كتاب الحواديت، ومصديقين كل حرف فيه، ولمَّا بيحبوا يخوفونا بيخوفونا بأسطورة أبو رجل مسلوخة (مع إن مش ذنبه إن رجله كده ويمكن مش قاصد يخوفنا).

لكنها كانت أساطيرنا الطفولية والحكايا الشعبية اللي ممكن نتفق عليها باختلاف أعمارنا وجنسياتنا، لكننا كبرنا وعرفنا إن الدنيا مش كتاب حواديت وإن الأميرة في نهاية القصة ممكن تبوس الضفدع وميتحولش أمير ويفضل ضفدع قشطة جدًا.

وأبو رجل مسلوخة هيتخلى عن دور البطولة في أسطورة التخويف جوانا لإننا قابلنا ”اللي سلخ رجل أبو رجل مسلوخة“ فبطلنا نخاف.

كبرنا وبطلنا نجري ورا الأرنب اللي بينكش الدهشة المستخبية في جحور عقلنا المزدهم جدًا بصخب الحياة والتكنولوجيا، وتكة الزرار على الموقع اللي بتجاوب على كل سؤال سألته أو لسه عايز تسأل عنه.

كبرنا والأرنب تاه مننا وتاهت معاه روح الدهشة جوانا، وعلى قد ما أجدادنا سابولنا أساطير كثير بتحكي عن حياتهم، وازاي واجهوا العالم بره كهفهم، ووصونا على أساطيرهم في شكمجية ميراثهم لينا،

بقي جزء من ملامحنا إننا بنحب نحطم الأساطير.

يمكن لإننا مبقناش نصدق في الخرافة ولا بنقبل إنها تدوس ديليت على خلايا التفكير والمنطق في دماغنا، مبقناش قادرين نمرر أي حدوتة أو حكاية أو أسطورة من غير ما نسأل ليه وازاي وإمتي ومين اللي قال وإيه دليلك بقي إن ده حصل فعلاً.

وزي ما إحنا عارفين إن فيضان الأسئلة دي هو فيضان نوح اللي أي راوي للأسطورة مبيحبوش، لأنه يزلزل أمجاد الأسطورة الشخصية وببخلها مجرد حدث عادي جداً نقدر نشيل من عليه القداسة.

ويمكن كمان نكتشف بشوية مخمخة إنه محصلش وكان مجرد نخع فلت زمامه من الراوي، بس لو الدائرة اللي رسمها في وقتها من المستمعين حوالية صدقته، إحنا كبرنا واتغيرنا لدرجة إننا كسرنا الدائرة، وكسرنا الأسطورة وحطيناها قصاد مليون علامة استفهام تانية فاتبخر سحرها القديم.

الإنسان الأول لَمَّا احتاج يغامر كانت الأسطورة هي وسيلته لحكي تفاصيل الرحلة، الإنسان دلوقتي لَمَّا احتاج يغامر بقت تكسير الأساطير هي على قائمة أولوياته؛ علشان يخرج بره كهف اسمه تشكيل العقل الخرافي لأنه أصبح يؤمن بالعلم والفرضيات والإستدلالات والمنطق.

الإنسان الأول كل حكيه وأساطيره ساعدته إنه يجمع الناس حوالية؛ يا إما علشان يسمعوا حكيه أو علشان يغشوا منه حته يحطوها في أسطورة مجتمعاتهم الملاصقة في الخبرة الإنسانية.

لكن الإنسان دلوقتي مبقاش عايز ينتهي لدواير أكبر من ذاته؛ فبقى بحثه عن أسطورته هو الذاتية أكبر من مجرد إنه يقبل دور هامشي في رواية يشاركه فيها الملايين.

الإنسان دلوقتي بقى يدور على أسطورته الذاتية، إزاي استلم العدة من جده الأول، وإزاي باسها وحطها جنب الحيط، وإزاي كمل في حياته بمفرداته، بتعقيدات روحه، بلخبطة الإشارات على خريطة سكتة، واللي يمكن مش هيكون فيها بطل خارق بيطلع نار من بقة أو بيشيل المعبد على كتافه.

لكن يمكن تكون أسطورته إنه يبقى حد عادي قرر إنه يمشي عكس العابرين في مفارق الحياة، ولمّا تيجي الكاميرا عليه وعدستها تعمل عليه زووم يبقى متأكد إن عنده حدوتة تتقال، وأسطورة تتحكي، واللي لسه محدش يعرفها ولا هيعرفها غيره، وده هيبقى جماله ومغامرته اللي شايلة بصمة روحه ومحدش هيقدر يزيق كتف معاه فيها.

”احنا بنكح تراب“... الحياة ليها معنى!!

الجملة دي تكاد تكون إنجاز مصري حصري بتنتصر فيه العامية المصرية في أصدق توصيف لمعاناة الجنس البشري على ظهر الكوكب، من ساعة ما لم شنطة هدومه وشرف ولغاية ما هياخد استمارة ستة من الحياة بحالها.

في البدء كان خلق الإنسان من تراب، لكن معجزة الخلق اللي انفرد بيها الخالق لوحده هو تحويله للتراب ده بنفخة الروح إلى كائن عجيب، لِمض، مشاكس، هيشيل أمانة تغيير شكل الأرض بعد ما ينزل ليها بزوحليقة الخطيئة، وفي مروره بالرحلة هيكون التراب هو التويست لكل حدوتة هيكتبها في كتاب حياته يا عين.

في البدء في نقطة من الزمان الغير محدد بإحداثيات المعرفة الإنسانية، قرر الإله إنه يحول حفنة تراب إلى هذا الكائن المدعو الإنسان، ويكون قدوم هذا الكائن الغريب بتكوينه الأخرى وسط الكائنات النورانية من ناحية والكائن الناري الأثير من ناحية أخرى هو مدعاة للدهشة وأيضاً للتمرد، وطرح السؤال اللي هيفضل سبب معاناة الكائن الناري ولعنته طول عمره:

”إزاي كائن يتخلق من تراب وتفضله علينا؟“.

ولأن الإله لا يُسأل عما يفعل فقد اكتفى بنظرات الدهشة تعتي خاطركائنات النور، واللعنة تحل بجسد كائن النار حتى ما لا نهاية.

اللي قطع الدهشة وقتها إن خلق إنسان من التراب كان فعل

إلهي، استخدم فيه الإله قدرته إنه ينفخ من روحه في التراب؛ ليرى الكائنات معجزته متمثلة في هذا الكائن المدعو "إنسان".

ويبدو أن الإنسان في رحلته المسماة بالحياة بين تراب الخلق الأول وحتى استكانته الأخيرة في أوضة تحت الأرض حيث يُعال عليه المزيد من التراب، هي متوالية حسابية محصلتها النهائية إن معجزة هذا الإنسان إنه ابتدا من التراب ونهاية أسطورته بين الكائنات الأخرى هتكون برضه إلي التراب.

وعلى الرغم من خلق الإنسان من تراب إلا أن محاولة اختزاله لعنصر التراب فقط هو اختزال بأهم بند من بنود الحدوتة، الإنسان مش تراب فقط الإنسان هو الخلطة السحرية اللي استودع فيها الإله جزء من معجزته الأولى في الخلق، فأصبحت معجزة الإنسان ذاته إنه بروح الله يقدر يحول "التراب" العابر في كل فصول رحلته في الحياة إلى معنى.

وللدقة فهو القادر على تحويل حِفنة الـ"تراب" لحياة بطريقته الخاصة جدًّا والي هتتكشف لينا كما يلي:

– حِفنة التراب اللي في لحظة فعل أهوج افتكر نفسه يقدر يضاهي فعل الخلق الأول فحط التراب وخلط عليه مية وتهياً ليه إن الجاثم أمامه على هيئة صنم هو رساله إلى إله السماء.

مفيش خريطة تدلنا على السرداب اللي مشي وراه غير إنه سرداب مترب ومعشش فيه العنكبوت، حتى مع افتراض حُسن النوايا إنه محتاج بيعت مراسيل للسما عن طريق أصنام صغيرة، محدش هيقدر يفسر اشمعنا رجعت للتراب، واشمعنا اخترت مراسيلك تكون

من التراب.

– حفنة التراب اللي ممكن ناس تموت علشانها وبعدين يكتبوا أسماءهم على شاهد القبر ”الجندي“ فلان الفلاني اللي ضحى بحياته من أجل تراب الوطن.

وعلى قد الفعل البطولي اللي بيضحى فيه الإنسان بما لا يملك وهو فعل الحياة ذاته، إلا إنه برضه محدش قالنا يا ترى بعد ما ضحى علشان ”تراب“ الوطن، الوطن نفسه ضحى علشانه هو علشان يعيش بياه!!

– حفنة التراب اللي شالها كولمبوس على كتفه لما زار الأرض الجديدة الغريبة، اللي اكتشف إن لون التراب فيها مختلف عن لون تراب الأرض اللي جه منها، وبدل ما يعلن إنه تاه ويدبذب برجليه في الأرض ويقول أنا عايز أروح لأمي، قرر إن التراب الجديد والأرض الجديدة هم اكتشاف لحياة جديدة.

وبدلاً من إنه يدي لنفسه مساحة وفرصة إنه يفهم طبيعة ال”تراب“ الجديد، مارس خطيئة الكائن الناري لَمَّا اعتبر إن ”ترابه“ أفضل من تراب الأرض الجديدة، وصبغها بلون كولمبوسي محتل، بس هو مبيحبش يقول كده على روحه.

– حفنة التراب اللي بفعل المناخ والضغط تحولت بقت حتت الماس، واللي في وقتها الإنسان الأول مكنش عارف هو قيمته كانت إيه.

لغاية ما في أحد الأيام الكئيبة أبو العروسة انجعص على كنية الصالون المذهب، وطلب شبكة بنته الجوهرة المكونة واللؤلؤة

المصونة إنها تبقى خاتم ألماس، تلمها شهقة العريس ”ألماس يعني
إيه شوية تراب“ متبوعة بنظرة عميقة من أم العريس:

”وانتو هتبيعوا وتشتروا فينا على إيه، ده الواحد اتخلق من
تراب وهيرجع للتراب“، وألف مبروك الجوازة باظت.

– حفنة التراب اللي بتتراكم على كل الأشياء اللي زحم بيها
الإنسان حياته في محاولة منه إنه يتغلب على وحدته بالأنس بالأشياء،
اللي بعد ما لفحها على قلبه ودفع فيها تحويشة عمره لقي إنها مش
بس بتملى فراغ حياته ولا مساحته المكانية اللي بينتهي لها، لكن
تراكم التراب عليها يفكره إن الوقت بيمر، والساعة مش بتقف وإن
اللي كان في يوم ملزوق عليه تيكث إنه جديد بقى مجرد أنتيك قديم
يكسوه معاطف من التراب.

وإن ميراثه من الحياة هو كومة من الأشياء المتربة جداً،
والقديمة جداً، واللي مضطر يمسخ عليها بإيده علشان يعيد لها
الروح، والحياة ترجع للحدوتة المقترنة بيها.

بعض الأساطير استلهمت من التراب فكرة الخلود، اللي كانت
مغامرة الإنسان اللي وقع بسببها على بوزه من على حصانه، واستقرت
بعض الأساطير إن الميت ممكن نحرق جثمانه علشان يتحول لتراب
وننثره في الهواء، علشان دايماً روحه تفضل محلقة.

وكانه بيختار القدر إنه يبقى لا منتهي في حياته وحتى بعد مماته،
وأن يكون انتماؤه الوحيد هو اللامكان والعهددة على الأسطورة.

المعاني اللي طورها الإنسان عن التراب وللتراب بتثير الدهشة،
لدرجة إنك بتسأل نفسك إحنا ليه مش بندرس علم الترابولوجي،

أينعم فيه علم كامل اسمه الجيولوجيا، لكن علم الترابولوجي
هيختلف عن الجيولوجيا.

إذا كانت الجيولوجيا بتدرس الصخور وازاي اتكونت، وازاي
بتختلف من مكان إلى آخر، فمتيألي إن علم الترابولوجي هو العلم
اللي هيدرس وهيتبع الإنسان في تطوره الإنساني وعلاقته بالتراب،
وإضافؤه للمعني وأوقات الأسطورة على حسب السياق التاريخي لكل
حفنة "تراب" وقعت في طريقه وهو بيتوه، وبعدين يرجع يكتشف،
وبعدين يرجع يتوه، وهكذا.

والأهم إيه اللي بيشره دايماً للتراب، هل هو حنين للأصل؟ ويا
ترى هو قادر يفسر الحنين ده ولأ بهرب منه!!

متيألي لو درسنا علم الترابولوجي هنقدر نفهم رحلة الإنسان
اللي كان قبلنا، وهنفهم رحلتنا إحنا كمان لإننا على الرغم من إننا
بنتشارك في البداية الترابية والنهائية كمان، إلا أن ما يحدث بينهما
هو إنتاج حصري لكل إنسان على حدة، وإن كان القاسم المشترك
في كل حواديت الإنسان أن السماء قررت إنها تتدخل وتفكره بعجزه،
وضآلته، وتبعته ليه عاصفة ترابية تخليه "يكح تراب".

تخليه يفتكر إنه مجرد نقطة عشوائية في كون معقد جداً، وإنه
هو نفسه مجرد شوية تراب، وإن كل هيلمانه وأسطورته ممكن ينهاروا
قصاد عاصفة ترابية تخلي مناخيره تلتزق في قفاه فيرجع لصوابه كده
ويدرك وضعه في الكوكب، وإنه مجرد شوية تراب، والكثير جداً من
البروزالين علشان يعرف يتنفس ويرجع "يكح تراب".

القرد في عين عيلته غزال!

آدم لَمَّا قرر يضحى بَتَمَن دستة الجاتوه ويروح يتقدم لـ”حواء“ مكنش ف دماغه إجابة محددة أوي على السؤال: ”يعني إيه عيلة؟“.

هو كان بيحاول يهرب من خوفه إنه يموت كالكترون وحيد بيلف في دايرة بتقفل عليه لوحده، فقرر إنه يشبك دايرته مع كائن تاني.

ومتبيألي برضه حواء وهي بتقدم الشربات لأدم المبتسم ابتسامه مهمة، والجالس على كنبه الصالون المُدهب، مكنتش مدركة ازاي هتبقى مسؤولة عن عيلة، لكنها توسمت في الشخص الجالس هناك إنه ”طيب وابن حلال“.

ومن هنا إتكونت أول عيلة في تاريخ الإنسان، إلكترون وحيد بيتعشق في إلكترونة تانية علشان يلفوا سوا في دايرة هتكبر بيهم، وهيتطرح فيها السؤال الأزلي: ”مين هيشيل اسم العيلة؟“.

والحقيقة ده سؤال مُحير، لأنه بيطرح فكرة الخلود اللي الإنسان بيعحب ينتصر فيها على تكوينه البشري المتسم بالفناء، إصراره على تكريس وإثبات حضوره في دفتر الخلود خلاه ياخذ أكثر الخطوات جسارة بتخليه ينطُ بره كهفه ويقرر طواعية إنه يرسم دايرة أكبر مدعوة فيها ”حواء“ وكائنات قصيرة مكبرة أخرى.

محدث بيجاوب على السؤال ويقولنا يعني إيه عيلة؟

هل هو تجمع ناس بتحمل نفس الجينات الوراثية وقاعدين جنب بعض في أتوبيس الحياة ونازلين نفس المحطة، ولّا انتماءك

لمجموعة من الناس بيقققك سعادة وببيدك أوبشن تاني لفكرة العيلة، هل عندك اختيار لعيلتك ولو عندك العصاية السحرية فكرت تغير عيلتك؟

كنت بستغرب من الأهالي اللي بيبقوا شايفين ولادهم أطفال إعلانات، وإنهم الأجل والأطعم والألد على عكس الواقع، وكنت برضه بستغرب إصرار أهلك إنك تكون من الأوائل لإن ده معناه في عرفهم إنك الأذكي والأنجح، طب لَمَّا كلنا هنطلع الأوائل أُمال مين اللي هينضرب في الفيلم يا جدعان.

ومع مرور الوقت ابتديت أفهم إن العيلة هي التوليفة من البشر اللي بتبقى شايفة إنك كواحد حامل لجيناتها شايفاك الأجل والأذكي والأرق والأحن والأنجح وكل الصفات باستخدام صيغة التفضيل العليا على ليستة ”القرد في عين عيلته غزال“.

والحقيقة ده إحساس جميل ومرهق في نفس الوقت، جماله إنك بيفضل عندك في زمزية الأمل اليقين إن ليك ”عزوة وسند“ هتقدر ترجع لهم لو الدنيا ضلمت في وشك أوي، ومرهق لأنك بتكبر محمي في جو العيلة بورقة سوليفان غير قابلة للخدش أو الفض، ويسمح فقط بالفُرجة عليها من بعيد.

لَمَّا بنخرج للحياة محملين بسوليفانتنا اللي اكتسبناها من تصور عيلتنا عننا، بنبتدي نكتشف حقيقة ”القرد“ في منظومة الكون الكبيرة. فبنكتشف بالصدمة أو بالخيبة المتكررة أو بفعل التصالح مع الفشل إننا مش زي ما كنا فاهمين، لا الأذكي ولا الأجل ولا الأوائل على قائمة انتظار طويلة بيتنافس فيها بلايين البشر.

وبنبتدي نتعرف على القرد اللي مبقاش غزال وعليه أن يتكيف مع الحقيقة القردانية الجديدة.

في مجتمعات حدائية، الولد والبنت بيوصلوا لسن معين وبيعتبروه العتبة اللي لازم يخطوها لأنها بتفصلهم عن كونهم كائنات اعتمادية على عيلتها إلی كائنات مستقلة مطلوب منها إنها تفك السوليفانة، وتكتشف حقيقتها وتتحمل مسئولية رحلتها في كوكب القرد الأكبر.

أما في مجتمعنا اللي لسه و اقف على نص السلم لا حصل حدائة ولا فضل قاعد في بدروم قبائل الهاكونا ما طاطا في شرق أفريقيا، مفهوم العيلة بيتمحور إزاي تخلي أفرادها كائنات ملتصقة.

أينعم بيتقطع لهم الحبل السُري لحظة الولادة، لكن بيفضل متلصم ومتسند بعيلته بحبل سُري تاني مش متشاف، بيخليه يعمل زي القرش الممسوح اللي بيلف يلف ويرجع تاني لنفس نقطة الولادة الأولى من نفس الرحم.

التصاقنا بالـ”عيلة“ ينفع في السنين الأولى اللي لسه بتكتشف فيها طبيعة الأشياء، ولسه عندك القدرة إنك تحط صوابك في فيشة الكهرا لأنك عارف إن فيه هناك اللي هيلحكك لو الفولت علي لولزم الأمر.

بس في مرحلة ما محتاج تتخلي طواعية عن الالتصاق ده علشان تكتشف العالم الأرحب، وعلشان تصنع خبراتك انت، واللي بتبتدي بالاكتشاف الموجع إنك لا غزال ولا يحزنون.

هتبتدي تفكك اللي اتسقالك بالمعلقة من عيلتك وتعيد تركيب

البازل بشكل يتناسب مع حجم خبرتك وحجم وجعك من فيش الكهريا الحياتية.

في اللحظة دي يمكن ترجع للعيلة الي بيسموها العيلة النواة، علشان بتبقى عارف إن فيه ”عزوة وسند“ هيغفرولك حماقاتك، أو هيتحملوها ويمرروها على أسوأ تقدير، وبتبقى عارف إن فيه إيفمات مشتركة اتسقت بالجينات الموروثة هتقدر تضحك على نفس المواقف وعلى شكلك بعد ما الحياة منحتك ولادة جديدة.

وممكن برضه تقر ساعتها إنك دلوقتي بقيت مستعد إنك تعيد رسم الدايرة من جديد، ومتبخلش بتمن دستة الجاتوه وتعمل زي جدك الأكبر ”آدم“ وتروح تتقدم للبنت العسلية علشان الدايرة تكبر.

والشيء الي بيدعو للنكتة في رسمك للدايرة إنك ممكن تكرر نفس الأخطاء الي كنت بتقاوح عيلتك عليها، بس المرة دي انت بتاخذ فرصتك الكاملة في تغيير موقعك من اللعب واحتمال تشوط وتجيب جون وخلفتك تبقى فعلاً غزال... أشك!

ولمّا فلاش الكاميرا يقرب منكم في الصورة العائلية الكبيرة ل”شجرة العيلة“ هتشوف نفسك بتضحك من الودن للودن على القرد الي مبقاش غزال، بس أخذ فرصته إنه يكتمل بدائرة فيها كل نقطة الصعود والهبوط والدوران الكامل حول نفس المركز الي هو انت.

أيها القرد السعيد الي اتعلم دلوقتي يقول جمل كتير بتبتدي بضمير ”إحنا“ مش ”أنا“ ابتسم مبقتش وحيد واسمك هينكتب في الجبلية.

”ازاي ترجعلي بقميص وسخ يا متعوس يا موكوس“

الأمهات عندهم هشاشة نفسية ناحية ولادهم بتخليهم محاصرين روحهم في إنهم يشوفوا ولادهم بصورة واحدة وعلى مسطرة واحدة طول الوقت.

حتى مع التأكيد الدائم من جانبهم إننا هنجبكم مهما حصل، وهتفضلوا ولادنا مهما حصل.

الحقيقة إن السيطرة مطلوبة في مرحلة الطفولة ليس أكثر، مرحلة الاحتياج للعب الدور، وخاصة مواعيد الأكل أو الدوا أو الملاحظة أو الاستجابة للحدس لدفع الخطر.

لكن السيطرة بتتوحش وتتحول لمنطقة أمان مرعبة بتحاصر الأم نفسها، وتخليها دايماً بتشوف الحاجات والعالم وولادها من جوه مربع ضيق أوي لابساه على راسها، وأي انحراف بسيط في زاوية الرؤية معناه ارتباك ولحظة رعب واستدعاء عاجل لرجال الإطفاء الداخلي المستنفرين على حافة أصابعهم علشان ينقذوا الابن أو الابنة من الهلاك.

وفي حقيقة الأمر إن الابن والابنة بيتطوروا ويشوفوا العالم ب”صندوق“ تاني مختلف، وربما صندوقهم أكبر أو أصغر، الحجم مش مشكلة، المهم فتحات التهوية في صندوق العيال وصندوق الأم هل هي مفتحة على بعض؟ ولا مسدودين في وش بعض؟ فدايماً في حالة صدام أو خوف أو هلع.

في مجتمعاتنا الأم بتلعب دور وحيد مخرجشي عن القداسة،
وأنها لو غضبت العالم كله هينهار، وده مش بيخلي أي مناقشة حوالين
الموضوع ده سهلة أو بسيطة.

على سبيل المثال: محدش بيحبي الأبناء من هشاشة الأم، واللي
هي مش شيء سيء، هي شيء أكبر من إنه يتم حصره في حلوووحش،
هو شيء بيحصل، لكن هشاشة الأم الذاتية إزاي متتحولش لوحش
بيتلع الأم نفسها، ويحاصرها، ويطارده محاولات الأبناء، مش الهروب
في الاتجاه المعاكس بعيد عنها، لكنها ممارسة فعل المحبة في المسافة
القائمة بينهم، كل بطريقته وإيقاعه مش شرط وفق كتالوج "الابن
الكويس أو الابنة المتربية".

المنطقة دي يمكن يتفرد لها كتاب بحاله، بس في كل مرة هنجب
نزورها خرينا نفكر نفسنا أننا عايزين نزورها بأكبر قدر ممكن من
الحب المتجدد في روح واعية إيه اللي يخصها وإيه اللي ميخصهاش
علشان منسجنشي نفسنا في شيلة مهباش بتاعتنا في الأساس.

فطام!

كنت مستغربة جدًا لَمَّا الستات بتحكي قصاصد مني عن إزاي فطمت عيالها، والحكايات اللي بتتصب عندي معظمها انهم دهنوا صدرهم بحاجة ”مُرّة“ علشان الطفل خلاص يعمل ارتباط شرطي إن ”البزة دلوقتي يع“.

حاولت أقولهم طب ليه مش بتخبوها مثلاً، فكانت الردود – بالإضافة إلى وصهي بالجهل – لآني مجربتش بتصب حوالين إنه بيفضل يدور عليها حتى من تحت الهدوم.

وهنا الطفلة اللي عندها 8 سنين جوه مني لازم تحتل المسرح وتسال طب والأمهات اللي مش بتلبس هدوم بيخبوا الحاجات والمحتاجات فين؟

وأخذت فضولي وروحت لمصدري للمعرفة (القطط بتاعتنا) ولاحظت إن القطة مرحلة الفطام عندها إنها بتبتدي ”تضرب“ عيالها في الرايحة والجاية. وكأنها مش بس بتحطلم حاجة ”مُرّة“ على بزازها لكن هي في حد ذاتها بتتحول كيان ”مُر“ يخافوا منه ويبعدوا عنه علشان يقدرُوا يخشوا العالم لوحدهم.

بعد المرحلة دي ما بتخلص البعض منهم بينسى أصلاً إنها أمه، وبعدين دورة الحياة بتستمر فتلاقي الأم بتتجوز ولادها أو الأخ والأخت بيتجوزوا بعض، بقى خلاص إحنا كبار والقانون الوحيد في عالم الكبار هو البقاء.

موضوع الفطام بـ”المرارة“ أو بالخناقة أو بالكراهية لمصدر
”الأمان“ ده غريب وعجيب.

يمكن التفوق اللي ممكن يتحسب لخانة النبي آدم، إنه ممكن
يطور مفهوم الفطام، الانفصال ”الجسدي“ عن مصدر أمانه والطرق
اللي بيعمل بيها ده، وازاي ده مش مرتبط بسن، الطفل بيقولوا
انه بيتفطم لَمَّا بيوصل سن سنتين، بس محدش بيقولنا ”الكبار“
بيتفطموا في سن كام.

منطقة ثرية جدًا للكشف والملاحظة، وخصوصًا لو أهالينا
فهموا إننا بنختار ”ننفظم“، ويمكن الفطام يكون فعل تبادلي يعني
احنا بننفظم منهم وهُمْ محتاجين ينفظموا منا، مش احنا الاتنين
مصادر أمان لبعض، احنا محتاجينهم علشان نفضل فاكرين إننا
”مسموح لنا في أوقات نجري ونعيط“ علشان ده مش مسموح في عالم
الكبار، مينفعش تعيط في جلابية أمك انت بقيت شحط.

وهُمْ محتاجين لينا كمصدر أمان علشان احتياجهم هُـمَ
الشخصي يتأكدوا انهم فعلاً اتحبوا و اتشافوا معدوش في الدنيا كده.

وممكن نكتشف إننا في البداية ممكن نتخانق مع مصادر الأمان
دي ”وقتي“ ودي خناقة منطقية جدًا وتكاد تكون طبيعية علشان يعني
لسه مكتشفوش ”طفل“ أو ”كبير“ لَمَّا بيبعده عن مصدر الأمان
بيتحزم وبيرقص، أكيد بيعيط. لَمَّا روحه تطلع وبيفضل يدور على
نفس المصدر لغاية ما يعيد إنتاجه في صور تانية، أو بيلتئم بنفسه
ويعمل مصادر أمان جوه منه.

قبولنا لطبيعية الخناقة متيآلي هيسهل علينا إننا نوصل

للمرحلة اللي بعدها، اه متخانقين بس هنرجع، والرجوع مش هو المحبة المطلقة ولا الكراهية الشديدة، لإننا برضه مش عارفين "حتت" أهالينا جوانا.

إحنا ممكن نكون بعيد جغرافيًا بس فيه حتت وأنماط ومسارات وأوقات ندياتهم هُـم النفسية اتباصت لولادهم.

كل ده ممكن يكون موجود جوانا، وإحنا بنتخانق في الحتت دي منهم، القبول للحتت منهم جوانا بيخلينا نوصل لمرحلة أتمنى ان يكون العبور ليها سالم، إننا بقينا مسئولين، ودي أحلى حاجة في عالم "يلا نكبر بقى".

مسئولين مش بمعنى المسؤولية المرعب "إنا عرضنا الأمانة" لكن عندنا حرية الاختيار، نختار نلتصق أو ننفصل، ونختار ننفصل ازاي بمحبة من غير خناق، لأن الخناق في الآخر بياكل في روح مين، وبنختار نرجع بس هنرجع بأنبي ولادة وبأنبي مهارة في ترميم الروح.

السؤال: المشوارده اتجاهين، الالتصاق الجسدي بيتفك، طب والالتصاق النفسي بيترمم ازاي من الجهتين؟

إحنا اترينا ع الوحدة!

ممکن الأب والأم يربوا ولادهم على الوحدة، على فكرة من وهم صغيرين ده مش منتج تشجيعي دي ملاحظة عابرة.

لمّا لقيت إن ممكن الأب والأم اللي طول الوقت بيشتما في الناس ”عموم الناس“ إنهم ولاد كلب نصايين وحرامية، الصورة الذهنية اللي هتنطبع في دماغ الطفل إنه أول ما يطلع بره البيت هيقابل ”ولاد الكلب النصايين“ حتى لو مقابلهومش فهو متخزن على الادي إن إيه بتاعه وسواس إن الناس ”ولاد كلب“ بس مستنيين الفرصة مش أكثر إنهم يبينوا ده.

الخط الفاصل بين حماية الطفل من ال”غرباء“، وتقوية جهاز المناعة النفسي جوه منه إنه ميتئديش، وبين إنه يفقد الثقة تمامًا في كل الناس فيكون اختياره الوحيد والأسهل والأقرب إنه يعمل كل حاجة لوحده.

الأب والأم اللي مش يربوا ولادهم إن الأذى ممكن يحصل بس وهو بيحصل إحنا بنستقبله ازاي، وإن المنع بالحماية الشديدة وانك تفضل في ”رحم“ مامتك مع انك شحط كبير بيضعف من جهاز المناعة عندك، وكل خبطة أو صدمة بتحصل بتستهلك منك علشان تقف على رجلك تاني.

التخويف الشديد من عالم آخر غير عالم البيت الآمن مش هيخلق غير عيال ”وحيدة“ بتحرّمهم من فرصة إنهم يتعرفوا على الإمكانية اللي ممكن تحصل بوصل المسافة بينك وبين شخص

متعرفوش، بس ممكن تخطي ناحيته خطوات مش محسوبة بس مش متكتفة ومتبعجرة في روحها بادعاء الاستنصاح في مواجهة الأذى.

الفضول الإنساني الفطري الطبيعي انك تخرج بره كهفك وتكتشف العالم اللي براك، اللي بره أبوك وأمك، واللي يتشدلك، وتكتشف الحته منك اللي بتتوتر لَمَّا ده بيحصل، أو بتكتشف إنها ممكن تتعلم بدل ما تتخاف في اللي بره، تقوي جهاز مناعتها وتبني جسور تعبر فوق خوفها وتوصل للناس.

وحتى لو الأذى حصل مش هيكون اختيار العُزلة والوحدة هو الاختيار الأسهل، هيكون مؤقت ومفهوم لشحن بطارية الروح والرجوع مَرَّة ثانية نبي جسر، ونعبر، وناخد شلوت، ونرجع للكهف، ونبي جسر ونعبر وهكذا لغاية ما في يوم تحصل المعجزة ونكتشف إن أصلاً مكنش في ”عوووو“ بره من الأصل والـ”عووووو“ كان لابد في الدُرة جوانا.

ومتهياً لي علشان كده زعلت منه لأنه من غير ما يقصد خلاني
استقبل منه فعل المحبة على إنه اختفاء واختباء مع إنه دائماً مرحب
بیه في حياتي وفي الفسحة وفي لعبة التراب العبيطة.

مش فاكهه بعد ابتدائي صداقتنا اتحولت ازاي لأنني سبت مصر
ساعتها، بس لما رجعت كل حد فينا بقى في كلية مختلفة، ومبقناش
نتكلم، المسافة واختلاف تضاريسنا الجسدية والنفسية خلتنا
نتعقد ونتكور جوهر روحنا.

في كل مرحلة من حياتي كان عندي صديق ولد، وبحب دائماً
تكون المساحة دي مش متعكره بأي حاجة لإني بطمع فيها إني أتعلم
اللي ميعرفش أتعلمه في العالم لوحدي.

وممتنة جداً لكل الولاد اللي كمان بيقبلوا يكونوا أصحابي
وبيشوفوا فيا حاجات أبعد من إني كائن مُسلي أو بيقول نكت.

هي مش حاجات وحشة فيا أنا مُسلية جداً كأحسن قرطاس لب
طالع من مقلاة فرغلي على أول شارعنا بس دي مش أحلى حاجة فيا،
أنا عندي حاجات أحلى من كده (بتشغل أغنية كلك على بعضك حلو
وبهديةا لنفسية).

ممتنة للمساحة اللي بتتملي بين ولد وبنت ومش لازم يكون اللي
بينهم جنس أو مشاعر حُب أو وعود بالجواز، التلات حاجات مش
وحشين على فكرة، بس طرايط كتير بتتلبس وتبدل على العنين مش
بنشوف فيها حقيقتنا كإحنا اللي هي ممكن تكون أبعد من نوعنا في
البطاقة.

انت بتقبل صداقتي كبني آدم مش عايز مني حاجة غير ”وجودي“

المزعج الزايط في الحياة، وأنا محتاجة بس انك تكون موجود مجرد
”موجود“، مش لازم تقدملي حلول بس بحب أوي فقرة إني أقعد أحكي
على حاجة لحد ما صديقي ”الولد“ يختصرلي كل مخمضة السنين
ويقولي: ”ما هو ابن وسخة يا ريهام اعملكك قفلة“ بمنتهى الحُب
والود والاحترام والقبول والاحتياج من طرفي: ”تصدق إني كنت بدور
على الكلمة دي ومعرفتش أقولها.“

ممتنة للصحاب الولاد والله جدًا.

”اشرب اللبن عشان أحبك“

كلنا اتقالت لنا الجملة الخالدة دي بتنوعاتها المختلفة من أول
”ذاكر... خلص طبقك... اسمع الكلام...“.

وعلى قد ما التنوعات دي كانت مختلفة كانت دايمًا نهاية الجملة
واحدة ”... عشان أحبك“.

كبرنا واحنا متخيلين إن الحياة هي نفس الجملة الأهمائية
البسيطة، الشفرة اللي هتفك كل بكرات الصوف اللي الحياة مصرة
ترمينها فيها.

جملة مقسومة نصين النص الأول فعل أمر من حد يببص
عليك من فوق يمكن لأنه أطول أو أكبر أو أكثر علمًا، أو شايف انه أكثر
قداسة.

والنص الثاني هو التلاعب اللا إنساني على احتياج إنساني جدًّا
وهو القبول والحُب بلا شرط فبتنتهي الجملة ب ”... عشان أحبك“.

كبرنا وبقي عندنا مخزون ثري جدًّا من المفردات اللي بتنط بره
حدود الطفولة لكن فضلت الجملة بتركيبها جوانا:
”اعمل حاجة... عشان احبك“.

حتى لَمَّا بنفتكر نفسنا إن احنا انضمينا لعالم ال(grown ups)
بنكتشف إن احنا دايمًا مبنعرفش نصيغ جمل سهلة وبسيطة
وعفوية زي:

”مش لازم تعملي حاجة علشان أحبك، ومش لازم احبك علشان انت بتعملي حاجة، ومش طالبة منك انك تحبني فتعملي حاجة، ومتطلبش مني أحبك فاعمل حاجة علشان أحبك“. لأنني بحبك وبس وعلشان مفيش أصلاً ”علشان“.

بيخدعونا لَمَّا يقولوا إن الكبار بيْفهموا أحسن، بيخدعونا لَمَّا بيْفهمونا إن الحياة هي أبجدية بيمنحها لينا الكبار ذوي الخبرة والحكمة والتجربة وشوية حاجات فوق بعضها.

بيخدعونا لَمَّا بيْفرضوا علينا شروطهم عن الحُب في الجملة اللي بتبتدي بأمر وبتنتهي بالفاكهة، اللي هي حق طبيعي جداً ليك ومش محتاج انك تقدم فروض الطاعة علشان بس تدوقها وتستطعم المحبة.

ولَمَّا بنكبر بجد، لَمَّا بنشيل ورقة السوليفان اللي اتلفينا بيها زي حطة الحلويات وبنبتدي ندوق طعم الدنيا بطريقتنا احنا، بنكتشف إن جملة ”اشرب اللبن علشان احبك“ بقت بتاخذ شكل جديد في كل العلاقات الإنسانية.

مفيش حاجة اسمها علشان احبك، فيه حاجة اسمها بحبك من غير ”علشان“، من غير شرط، من غير قيد، من غير سفسطة، من غير هسهسة، من غير علاقات فوقية، من غير تفسير، من غير ما تضطر تقنع الآخرين أو حتى نفسك.

مش محتاج تنكش جوه كراكيب روحك على إحساس بيعملك بهجة بلا تفسير حاجة بتحصلك وهي أشبه انك تترزع في الحيطه.

لَمَّا تلاقي فيه تيار إنساني واخذك بلاش تبني عليه سد اسمه

”علشان“.

امسحوا من القاموس كل الجمل اللي بتنتهي بـ”... علشان
أحبك“، وعيدوا صياغة مبيقاش فيه مقايضة على الحاجات
الوحيدة اللي بتخلينا نصحى كل يوم ونقدر نكمل.

علامات!!

كنت بفكر في قرار السفر لأول مرة، وقررت أخذ تاكسي في أطول مسافة ممكنة علشان أرتب أفكارى، المارد كان معنا في التاكسي لمّا وشوش ووسوس للسواق إنه يقولى بدون أي مقدمات وكأنه كان رامى وذن معايا في صندوق دماغى: ”اللى يسافر بره البلد دي هيشوف وش ربنا وهيرجع يحب الدنيا ويرجع يحب البلد، البلد دي تتحب من بعيد“.

كان ممكن أفهم جملة عمو السواق لو كانت في وسط حوار أوله إيه رأيك في كذا، ووسطه طيب أنا عندي فرصة سفر في كذا، وآخره سؤال مني محتاجة إجابة منه. لكن اللى حصل إن المارد وشوشله في توقيت أنا كنت محتاجة ”علامة“.

فيه أوقات بتكون الشبورة غطت على كل مراكز الإدراك الواعي جوانا، بتكون ممتلئين جداً بالرأي الحكيم الواعي الصائب تماماً، لكن بالرغم من ده مبيكونش لسه عندنا القدرة إننا ناخذ قرار ما في اتجاه ما.

ومن هنا اتكتب الوصف الوظيفي للمارد، إنه يطلع من قمقمه في اللحظة اللى تكون فيها الشبورة مغمياك، و اتكتب التعريف غير المتشاف عن ”العلامة“ إنها الزقة اللا منطقية جداً لكنها الأقرب للى انت عايزه جداً وتاه منك في صخب الأفكار وتوهه الروح.

ومن هنا ابدت حدود المارد وعلاماته، وهي حدود مش ملتوتة لكنها متعاشة ولو قلبت في صفحات حياتك هتلاقي المارد بتاعك انت

وعلاماتك انت.

محدث بيقدري فصل ولا يفسر العلامات، وعلى عكس العلامة التجارية التي كلنا بنتفق عليها، كل حد فينا ليه علاماته الخاصة والمارد بتاعه المتحاش في قمقم واللي مش بتعرف هو هيطلع إمتي، لكنك بتعرف إنه طلع لمّا بتقفش روحك بتركز مع جملة معينة بتنتقل في فيلم وكأن البطل أو البطلة عارف حدودتك انت وقرر مهديك الجملة دي في الوقت ده بالذات.

لمّا عبارة عابرة من سواق تاكسي أو من حوار انت حتى مشتركتش فيه بتلاقيها نورت لمبة في دماغك، لمّا بتمشي في مشوار وبعدين بتحس إن فيه إيد عمالة تزقك وتمنعك من إنك تغير اتجاه الجزمة وتراجع، ساعتها اعرف إن مارد العلامات سايقك لحتة معينة علامتك مستنياك فيها.

محدث هيديكوا كتالوج معين عن العلامات، وكل ما عليكم فعله إنها لمّا تيجي تلاحظوها وتفهموها وتصدقوا القدر الخفي الأشبه بالصمغ التي بيلصم كل حنت البازل وبيوصل النقط المتبعتة ببعضها، ففجأة تظهر بشكل واضح ليه معنى انت بس اللي هتفهمه.

توقف عن التفكير في مارد العلامات، توقف عن محاصرته ومحاولات استجلابه بتعويذات الاحتياج واليأس وقلة الحيلة، توقف عن البحث عنه، توقف عن التفكير في العلامة لتجدها كاملة قصادك وساعتها هتعرفها لوحدهك، وغالبًا لن تتكرر بنفس الشكل حتى لو دورت عليها وده سحرها، إنها لا ترتدي نفس الثوب مرتين.

عايزين نشبع من الحاجات

من أسبوع كده تقريباً في حديث ما افكرت صديق الطفولة ”علاء“ في وسط حكايات عن الطفولة والشقاوة واللماضة وركوب الزوحليقة بالعكس.

آخر مرة رجعت فيها المنيا قابلته وأنا داخلة بيت ماما، ووقفنا ثانية كده في وش بعض واحنا بنحاول نستوعب ”ايه ده احنا كبرنا كده ازاي، وايه يا علاء الشيء اللي فوق شفتك ده، يا بابا يكونشي شنب“.

وكان الضحك هو الحل السريع اللي بنمارسه ك”كبار عاقلين“ علشان نغلوش على ارتباكنا في اللحظات اللي زي دي.

من سنتين شلة ”ابتدائي“ فكروا إنهم يعملوا ”ريونيون“ علشان تقريباً نشوف لماً كبرنا بقينا إيه.

أنا فاكره ساعتها إني مقدرتش أروح لإني مكنتش عايزة أروح، كنت عايزة أحتفظ باللقطة بتاعت ”ابتدائي“ زي ما هي في ذاكرتي من غير غلوشة.

حسيت إني لو شفت عمرو أو علاء أو عبد الرحمن أو رضوى أو محمد أو رانيا أو حسام وحد منهم بقى عنده كرش أو أصابه الصلع أو بقى يتكلم في البامبرزومشاكل الإسهال عند الأطفال في أول سنتين أكيد كنت هحس بصدمة عصبية عنيفة لإني لسه في كادر ابتدائي لماً كنا بنلعب ”سمكة وصياد“ وبنعمل عصابة صغيرة كده علشان نضايق العيال في سنة أولى (دي حاجة مش بفتخر بيها بس أتمنى

أظهر منها) أو مشروعاتنا في أول مسرحية وازاي اتدربنا عليها.

النهاردة الصبح علاء توفاه الله، وفقد جديد بيتضاف لسنتين بتفرج فيهم على المقابر اللي بتتفتح، وبعدين بترجع تتقفل، وبعدين بترجع تتفتح تاني، واحنا بنمشي ومش عارفة احنا بنمشي بعيد ولأ قريب.

الفقد في صديق بيكون غريب، ممكن لأن صديقك هو جزء من ذاكرتك وتاريخكم المشترك، يمكن لأنه متورط معاك في كل الأفعال اللي محدش يعرفها غيركم والصدقة كانت المسافة اللي بينكم اللي بتكبروا فيها سوا بعيد عن قيود العيلة اللي ممكن تعوز الحاجات والمسافات بالمسطرة.

فقد الصديق بتضطر توقف الجري للحظة كده وتسال إيه ده هو مشي؟ طب إيه الحكمة يعني إنه ينام وميصحاش كده؟ طب مش يمكن كان عنده حاجة مهمة الصبح يعملها؟ طب مش يمكن كان عنده حاجة مهمة عمومًا في الحياة يعملها؟ طب مش يمكن مكش عنده أي حاجة مهمة في أي حاجة بس وجوده هو كان مهم، يعني من غير أي سبب أو منطق أو تقييف أو فلسفة؟

الدبابة على الأرض في محاولة انك تلاقي الحكمة مش هنتج عن شيء غير انك تقول "مفيش حكمة خالص" أنا استسلمت خلاص.

صداقتي بـ"علاء" هي صداقة الطفولة بكل جذورها، مساحات مجتمع العمارة المحندق اللي ممكن نلم فلوس علشان نجيب زينة رمضان فبعد ما نلم الفلوس نجيب حاجة حلوة لينا وبعدين نقرر نعمل الزينة بورق الجرايد، القعدة على السلم قدام الشقق واحنا

بنغني "الأقصر بلدنا بلد سياح" مع إن احنا لا في الأقصر ولا عمرنا روحناها بس كان بيعجبنا الحنطور في الأغنية، أنا وعلاء وتحريضي ليه إنه يخبط على جارنا الساكن لوحده في الدور الرابع أنكل "دياب" وبعدين نطلع نجري.

وكان علاء بيصدقني جدًا لغاية ما في مرة أنكل دياب قعد له تقريبًا ورا الباب ولمّا علاء اتقفش نادى عليا (بيستنجد بيا باين ولا إيه علشان وشي البريء يخفف العقوبة عليه وعليا أو تتقسم على اتنين) فرجعت فكان أنكل دياب كريم معنا احنا الجوز وادانا شوكلاتة بطعم الموز عجيبة جدا.

ساعتها قررنا نلاقي لعبة تانية متبقاش مؤذية، اشترينا مسدسات ميه وابتدينا نبخ بهما في الشارع. علاء كان ألدغ في حرف الرء وده كان يبسبب ليه الإحراج دايماً، ومكنوش بيختاروه في المسرحيات علشان مكنش بيقدري نطق الحروف صح، بس هو كان دايماً موجود معايا أنا وعمرو واحنا بنحفظ أدوارنا.

علاء مكنش شاطر في الانجليزي بس طول الوقت لمّا مامته كانت بتقوله ازاي رهام بتجيب درجات أحسن منك (طنط لولا الله يراضي قلميها ويصبرها كانت بتقارننا ببعض طول الوقت) كان يقولها عادي رهام تجيب درجات في الانجليزي هي شاطرة ورهام أصلاً صاحبتي.

وانا بسأل أصحابنا النهاردة كنت عايزة أعرف يا ترى هو لحق شبع من الحاجات؟ جاتلي إجابة كده: محدش بي شبع، محدش بيعرف إيه الحاجات؟ إنتي فاكرة إن الناس بتكبر وتتعجز فبتقعد مستنية إنها تموت علشان خلاص خلصت الحاجات وشبعت،

محدث بيشبع، إحنا بنمشي وفيه حاجة دايماً لسه مخلصتش.

مش قادرة ألاقي حكمة لأي حاجة للمرة المش عارفة كام، ويمكن اللي بيحجب عني الرؤية إني عمالة أطارد الحكمة المستخبية في مؤخرة نملة.

يمكن الحاجات بتحصل يا ريهام، الناس بتيجي وبتمشي، وحتى حواديتك عنهم، ورجبتك إنهم يفضلوا في ذاكرتك وتاريخك إنتي الشخصي لحدوث الأشياء مش معناه إنهم هيفضلوا موجودين، هيمشوا، حتى الأسئلة اللي بتسألها يا ترى شبعوا من الحاجات؟ عمرك ما هتعرفها.

هتمسكي ورقة وقلم وتمشي تسأل الناس في الشوارع والبلاد الغربية انتوا شبعتموا من الحاجات؟ خلصتموا اللي نفسكوا تعملوه ولا لسه شوية؟ طب ما تعملوه، طب ما يلا، طب مش يمكن مفيش يلا، ومفيش غير اللحظة اللي احنا واقفين فيها دلوقتي، اللي ممكن ميكونش فيها اي حكمة ولا اي دليل ولا اي إشارة ولا اي شيء.

مجرد إن الحاجات بتحصل، والناس بتمشي وأنا بحاول أفلت أيدي من التشبث بيها علشان هي فعلاً مشيت خلاص، ومحاولة استدعاءها مش هيخليها تحضر، ممكن جداً يكون مشي في اتجاه معاكس للحقيقة الوحيدة إنها مبقتش موجودة.

أنا معنديش مشاعر حزن أو غضب خالص المرة دي على عكس كل اللي فات، أنا مستسلمة تماماً أقرب لحالة خدر أو طفوف فوق سطح المية، ومحاولتي البسيطة إني أبعث لعلاء السلام هي حوار مع الحثة الخائفة من نفسي، الخائفة تمشي قبل ما تشبع من الحاجات

فبتجري، ولمّا بتجري في لحظة معينة بتضطر تقف، وتوقف وتبص على اللحظة اللي أنا واقفة فيها دلوقتي، أمسكها بكل أيديا وامنحها كل مية قلبي من الامتنان والمحبة وبعدين افلتها لأنها لازم تمشي لو اتخزنت ممكن المية تتحول لمياه راكدة فلازم تمشي.

الإفلات مش سهل، لأنه مش زهد ولا قرار واعى ولا سيطرة تم التدريب عليها في سنين، أبداً، الإفلات هو عجز شديد، عجز ممزوج بإدراك المحدودية في القدرة على السيطرة على أي شيء اصلاً، لأن الحاجات بتحصل هي بس بتحصل، وفي كل مرة بتحصل بحاول استقبالها باكتشاف المقدرة على البقاء طافية لأطول وقت ممكن لغاية ما تحصل الحاجة اللي بعدها.

الشعرة الرفيعة!

الشعرة الرفيعة بين إنك تغرق جوه نفسك ومشاعرك وبين إنك تدي وقت كفاية لروحك إنها تنتحب وتبكي وتحزن لغاية ما مية قلبك تروق.

الشعرة الرفيعة بين إنك تحاول تفهم العالم فتخوض روح المغامرة وتقفز بره الكومفرت زون مبتقفزش ليه وتنط في حاجات مجربتهاش قبل كده وبين لأ ما أنا مش هقضيها تجريب ومغامرة وروح الإنتربرونير تتحول لعلاقة هستيرية مرضية عاملة زي البرغوت اللي لا بد في فروة الكلب ومنغص عليه عيشته.

الشعرة الرفيعة بين إنك تكون صادق مع نفسك في حقيقتك وبين إنك تطمن روحك بأوهام يمكن دلوقتي مش شايفها إنها أوهام بس في وقت الوهم بيكون مهم علشان ده آخر خيط للأمل.

الشعرة الرفيعة بين إنك تبقى واضح وصریح ومحدد في احتياجاتك وطلباتك وبين إنك تفهم إنك مبتقتش الطفل اللي لَمَّا يطلب لبن العصفور العالم كله هيجيبه تحت رجلك علشان ابتسامه الطفل وجمال الطفل، لا انت طفل ولا العالم أبوك وأمك الحقيقيين ولا اللي كان نفسك يبقوا هُم بس محصلش معلش.

وكل يوم الصبح لازم تقول الجملة دي سبع مرات وتتوكل ع الله وتهووب.

“You need sth you work for it then you earn it”

الشعرة الرفيعة بين إنك تستعد وتمرن عضلاتك، عضلات روحك، عضلات قلبك، عضلات دماغك، عضلات فهمك لمحدودية الوقت، ومواردك، وقدرتك على التحمل، وبين إنك تستخبي وتتكرمش جوه نفسك علشان خايف تواجه عالم مش قادر تفهم تعقيداته، الخبر الحلو مرحب يا عرب كلنا مش فاهمين تعالي جنبي.

الشعرة الرفيعة إنك تحس بالقرف والعك وشغل بهلونات السيرك في كل حاجة من أول التعليم ولغاية الدين ومروراً بسعر الفاكهة في القفص وبين إن ده اللي موجود دلوقتي، هنعمل ايه، هنشتغل بإيه ومع مين، اه طبعاً هندسافر (بس يا بابا احنا قاعدين ع قاعدين في مية البطيخ والأمنيات المعسلة، بس دي فلتت منك والإيفيه مات من سنتين بتاع سافران مش شجرة) إيه الحد الفاصل بين إنك تعيش وتمشي حياتك بأقل خسارة ممكنة، من غير ما تعور الشاسيه.

الشعرة الرفيعة بين إنك بتحب القراية والسينما، وبين إنك تبقى فاهم إن الحياة مش كتاب ولا فيلم سينما، وإن القراية والفرجة ع السينما هي الوقت اللي بنحب نلعب فيه دور "اللي بيتفرج لكنه مش متورط" مش هو اللي بيكتب، مش هو اللي بيشيل الطين ويخرج فيلم تخلصه انت ف ساعة ونص وتقعده تفتي بعده.

الشعرة الرفيعة إنك تختار "تأنتخ" جوه القراية والفرجة ع السينما علشان تشحن بيهم طاقتك وترجع تدب في الدنيا وبين إنك تستخبي جواهم علشان مش عايز تكبر وتشوف العالم علشان بقى معقد على الفهم وكل لحظة فيها متغيرات فشخت جهازك العصبي والذهني، أو يمكن عايز تكبر بس مش قادر، أو مش عارف، أو مش

شايف.

الشعرة الرفيعة بين إنك تكبر فتبقى شبه كل ”الكبار“ اللي قعدت حياتك كلها تتخانق معاهم علشان كنت شاف إنك تستحق الأحسن، وبين إنك ”تكبر“ فتبقى شبه نفسك مش اللي افكرت إنه انت.

الشعرة الرفيعة بين إنك تمسك في حاجة، تتبت فيها بكل ايديك، تسعى ليها، تخصص ليها وقت ومجهود وطاقة، تتحمل كل شلوت يجيلك من ناحيتها وانت بتقول لنفسك ”لا تراجع ولا استسلام وعاش يا وحش“، وبين إنك توصل إنك قاعد تتخانق في حاجات ممكن تكون مش بتاعتك اصلاً ولا جلدك ولا ملعبك وانت داخل شايل بلي ملون جميل بس انت واقف في استاد برج العرب ومافيش ماتش ولا جاالمهور.

الشعرة الرفيعة بين إنك تخطي فوق ”طب مش لو كنت استنى شوية، أو حاولت تاني، أو يعني زقيت من الناحية دي“ وبين الموضوع ده تمامه وأنا في اللحظة اللي واقف فيها دلوقتي مش بإيدي حاجة، أنا سعيت وده تمامي كمان دلوقتي، اللي يحصل بعدين هيحصل بعدين، يا شفته يا مشفتوش، حسب الإذن هيجي بالشوفة وبالتوقيت وبالطاقة لإعادة المحاولة ازاى وانك هتلقاه إزاى علشان ساعة ما يحصل أنا هبقى واقف فين.

الشعرة الرفيعة بين الغضب اللي بتزعل فيه إن الحاجات اللي بتحيا ”بتبتدل“ علشان ده يفكرك إيه اللي بتحبه ومستعد تتخانق علشان، وبين الغضب اللي بيقابل طاقة الهدد جواك، اللي بهد بره

بس بيد جوه معاه علشان تحت منه مشاعر تانية مستنتش تتعرف عليها واللي كانت هتدلك لحتة مشفتهاش قبل كده أو حتة فضلت تكتم صوتها سنين طويلة فطول الوقت بتشاور و طول الوقت بتحاول تطلع راسها من عبك، فهي غضبانة منك، وانت غضبان من الدنيا علشان مش قادر تغضب منك الغضب اللي تستحق إنك تلاقي مجال تسامح وروحك.

الشعرة الرفيعة بين إنك تشوف الأذى اللي اتعرضت ليه واللي كان دايمًا متغطي بالحُب، وبين إنك تعرف إن كل أذى جاي من بره بترجمه لأذى ناحية نفسك، هو إحساس شديد بالعجز واللوم إنك موقفتش لنفسك الخناقة اللي تستحق، محمتمش وروحك كفاية، الحماية محصلتتش في الوقت اللي كان لازم تحصل فيه، الاتهامك حصل، الأذى جه من اللي متخيلتتش إنهم يجي منهم ده، انت واقف هنا دلوقتي وشايف كل ده.

الشعرة الرفيعة إنك تفضل تزقل طوب بره منك، وبين إنك تدي ليك كل اللي محدش هيقدر ولا هيعرف ولا هيفهم إنه يديهولك لأنه مش انت ولا شايف اللي انت شفته مهما اتهيألك إنه فاهم.

الشعرة الرفيعة بين إنك تقف وتتخانق لنفسك الخناقة اللي عايز تاخذها للأخر حتى لو اتعورت في الوش وسابت علامة مميزة، وبين إنك تفضل تتخانق في خناقات ملهاش لزمة علشان تدي نفسك ميدالية المُدافع عن الحق واللي بيقول للحماريا حماريا عينه، علشان تداري عن الخناقة الوحيدة اللي المفروض تتخانقها وانت يا مش عارف يا مش عايزيا مش شايف وقاعد تهدر طاقتك زي البلطجي اللي قاعد ع القهوة مستني أي خناقة يخش يدب فيها ويطلع لغاية

ما يعجز ورصيد القوة الشكلية يروح منه فمبيقاش غير نظرة شفقة
وتاريخ غالبًا هو اللي هيحكيه لناس تانية معشتموش، بس بتشوفه
راجل مسلي كده.

الشعرة الرفيعة بين إنك بتحب ”تعمل اللي يبسطك“ وبين إنك
مش عايز تتحمل مسئولية حد ولا تخوض خطوة فيه احتمال تفشل
فيها فبتقرر إن اللي بيديك ”سكر“ مؤقت شغال معاك وتفضل تاكل
في حتت ”سكر“ لغاية ما تتلبي وتنام وتفس خالص.

الشعرة الرفيعة بين إن حد يوصمك ويقولك على فكرة انت
عندك كذا، وي*خ عليك أي ألوط من ألاليط دماغه، وبين إنك
تصدق فيك اللي غيرك بيلبس هولك وبين إنك تتقبل حقيقتك وتتعامل
معاه كل يوم زي ما يكون بتتقابلوا أول مرة وفيه دايمًا إمكانية للشفا
وإعادة الكشف.

الشعرة الرفيعة بين إن حد يقولك خرينا نقلب عيشنا وأكل
عيشنا وبين اللي مؤمنين ومصدين فيه وممكن نخسر واحنا بنعمله
عادي، الخسارة مش بتعورنا، اللي بيعورنا إننا نفضل و اقفين رجل في
الشرق ورجل في الغرب ومفشوخين وفاشخين الناس حوالينا.

محدث بينقد حد

محدث بينقد حد، حتى السبّاح اللي قاعد على الشط وبيدفعوله مرتب شهري علشان لمّا يلاقي حد بيخلص هيروح ينقذه فعلاً، بس لو اللي مدلك ايديه هياخدك معاه لتحت غصب عنك غريزة الحياة جوه منك هتعيد توجيه طاقتك إنك تنقد نفسك من باب أولى بلا تردد وبلا تفكير وبلا فلسفة.

اليقين الوحيد إن غريزة الحياة - على عكس إرادتنا اللي بتضعف - أيوة بتنتصر، محدش مهمته في الكون إنه ينقد حد لو ربح الطاقة والمجهود اللي بنوجههم علشان ننقد التانيين بنخل بهم شوية ونوجههم ناحية روحنا كنا عملنا أهم واسمى إنقاذ، كنا حلينا الواجب بتاعنا وخلصنا، كنا أنقذنا روحنا.

محدث الوصف الوظيفي بتاعه في الحياة إنه ينقد التانيين لأنه في الحقيقة لمّا بيعمل كده بيخلق ضحايا جداد، بيفسح مكان جوه روحه علشان الخط على استقامته يشكل جوه منه دور ضحية جديد لو اللي أنقذهم تخلوا عنه، فبدل ما يسأل نفسه السؤال الأصلي والأصيل إن ليه مشيت مشاوير ناحية الناس علشان أنقذهم وأنا من باب أولى ممشتش نفس المشوار ناحية روجي علشان أخلصها تبطل خناق مش ده إنقاذ؟!

دي مش أنانية ولا دعوة للتخلي عن الناس والصحاب والجدعنة، والوقوف في كتف بعض وشيل بعض لمّا الأرض تتلخخ من تحتينا، بالعكس دي دعوة إننا واحنا بنعمل ده بكل عطاء وصدق نبقي

شايفين إحنا واقفين فين في النقطة دي، ونبطل نخلق كرابيج ناحية
روحنا لَمَّا حد يقرر إنه خلاص مش عايز ينقذ نفسه وانه اكتفى.

محدث بينقذ حد، وجودنا في دواير بعض علشان نشوف
الحتت مننا في غيرنا اللي معرفناش نشوفها فينا لوحدنا جهل بقى
على غشومية على غلوشة كله وارد.

لو الشوف ده هيخلينا نجري عليهم هُمّ علشان ننقذهم بدل ما
نجري على روحنا ونلحقها، يبقى احنا الاتنين محتاجين نتعالج، اللي
طول الوقت مستني المنقذ والمخلص من براه وقاعد يزق زي العيل
الرخم في الحدوتة اللي قعد يزق الحقوني الحقوني... والقرية كلها
جريت عليه وسبته في النهاية.

ومن الناحية الثانية اللي متخيل نفسه إنه هيغير العالم وهيبنقذه
وبيفرهد روحه في دور عربية إسعاف من غير سارينه دايرة تنقذ العالم
كله ومش قادرة تنقذ روحها، يمكن لأنه لسه مش شايف انه محتاج
إنقاذ أو شايف بس مش عارف أو مش قادر يبطل.

محدث بينقذ حد محدش مهمته إنه ينقذ حد مهمتك إنك
تشوف غريزة الحياة الحافة بتاعتها إيه عندك، وإيه اللي بيوصلك
للحافة، وإيه اللي بيخليك لَمَّا توصل للحافة تزق عليها بأعلى
صوتك علشان ترجع منها، أو إيه اللي بيسرق منك الصوت والسرقة
مبتحصلش مرة واحدة دي بتكون حلت من فترة.

محدث هياخدك من إيدك وهيقولك أهو مانيفستو المعرفة
مشوار ناحية نفسك هتفضل تتمخض فيه بس كل ما تبقى صادق
مع نفسك.

بديهية واضحة محدش بينقذ حد، محدش بينقذ حد حتى
بالحُب. الحُب اللي مبنعرفش نديه لروحنا في الأصل بنوهبه لل "غير"،
وبنتخيل فيه خلاصنا، وبنحب نحب تاتش السموي في فعل مهواش
سامي.

محدش بينقذ حد، كفاية بقى نكتيها ونملى بيها الصفحة.

أنا آسف / ة، يعني إيه؟

الجملة بتاعت ”أنا مكنش قصدي أذيكى أنا آسف/ة“ دي جملة عجيبة والله، مش لإنها بتبقى جاية من اللي أصلاً كانوا مسئولين عن حمايتنا من الأذى فاحنا لسه بنحاول نستوعب فكرة إن اللي كنا باصينله إنه ”بيحمينا“ من وقوع الأذى هو اللي مارس فعل الأذى علينا في اللحظة اللي إحنا بنحاول نستوعب ده ونهضمه ونعبر صدمة العبور من مربع ”الحامي“ لمربع ”المؤذي“ وإكسسوارات كل شخصية.

وده وقت مريك ومضاعف القسوة مش لإننا بنختبر قسوة الأذى اللي وقع علينا ولسه مش عارفين نمسك هو إيه اللي واجعنا بالظبط أو إحنا عايزين فعلاً نغضب من إيه حقيقي، ولما هنتحمق في العركة دي إحنا بنتحمق على أنهى حته بالظبط.

وفي نفس الوقت بنمارس بكل أريحية القسوة ع الذات، إننا كان المفروض ”نعمل“ و”نحمي“ و”ننضج“ و أفعال كده فارغة من جوه خالص لأن الأذى وقع خالص.

في نفس الوقت فيه حد مش شايف كل ده وو اقف ع الناحية الثانية بعيد خالص وبيقولنا أنا آسف مكنش قصدي أذيكى ومش مستوعب أصلاً إن كلمة ”آسف“ مستفزة وأصلاً العبور لقبولها ده محتاج مشاوير مش مع الطرف البعيد لكن العبور ناحية الرحمة والسخاء ناحية روحنا إننا نسامحها أصلاً ونستنى عليها ونصبر على حيرتها ونتفهم إن العبور مش سهل ومش لذيد وروحك بتسلخ معاه.

وإن اللحظات اللي بتشوف فيها تبدل الأدوار إن اللي افترضت فيه "يحمي" ويسند مارس النقيض تمامًا دي لحظات قاسية بالفعل لأنك أصلًا مبتقاش عارف التعويرة جت فين ونخورت قد إيه في اللحم ويمكن العضم، فكلمة آسف دي فاضية من جوه وممكن تكون علشان ندور على راحة مؤقتة لتأنيب ضمير أو علشان نكمل في بُنا صورة مزيفة عن ذواتنا إننا حلوين ومش بنأذي حد... بس الأذى فعلاً حصل، واللي وقع عليه الأذى بيحاول مش بس يمشي مشوار إنه يتعافى ده بيحاول يشوف أصلًا.

والشوف في حد ذاته موجه لأنه بيمشي فيه لوحده تمامًا، كأنه ستارة شيفون مليانة تطريز مش هيتكرر وخيوط ناعمة ومطلوب منها إنها تخش الغسالة الفول أتوماتيك في أي لحظة في اليوم وتندعك وتطلع من غير ما أي تطريزة في روحها تنسل.

فلما حد فجأة يفتكر روحه ويقرر يقول أنا آسف، مش بالضرورة خالص على فكرة نستقبل الكرم الأناني ده ونقوله اه والله انت فُلة.

في الحقيقة بنقوله لو بتدور على أي حاجة عندي علشان تحسن بها صورتك المتخربة عن نفسك، معلى والله مكنش ينعز، معنديش، اتفضل خش الغسالة بتاعتك انت وسيبني في غسالي الله يرضى عليك.

وعلى شان كده أنا هدي لنفسي الحق إنني أعلن مانيفستو الأسفنة،
لأمش دي، الأسف:

1- أنا آسف/ة: بقولها في الوقت المناسب ليا مش المناسب ليك يمكن يكون معناها إن عايز أتخلص من إحساس بالذنب

تجاهك، علشان أقدر أمشي في الدنيا وأنا محتفظ بصورتي ”الحلوة“
عن نفسي، ومش قادر استحمل أجدها بذنبك.

يبقى أنا بقولها ”ليك“ بس هي ”ليا“ علشان تخليني أحس
”أحسن“ مش علشانك انت ولا علشان تحس انت أحسن.

2- أنا آسف/ة: بقولها وبجري زي ما أكون بقرا في اللي قدامي
إنه/ها عايز أو محتاج يسمعها علشان يبطل نظرة اللوم والعتاب اللي
مش قادر اتحملهم، ولا أنا قد إني أخش معاه في ”كلام“ علشان أفهم
أو هو/هي تفهم فبقول الجملة اللي تقفل الدومينو ”أنا آسف“، أهو
مش انت بتدور على دي، أهيت خدها من ع الرف وحل عن نافوخي
بقي متصدعنيش.

في كل الأحوال، حتى لو بقي بعدها فهو مش بقاء حقيقي، هو بقاء
اللي بيجهز نفسه للجري أول ما الفرصة الجاية تيجي.

جملة أنا آسف/ة بتبقى البزاة اللي بيدسد بيها حنكك علشان
تبطل تفكره أو تبطل ”تعيط“ أو تبطل تدبب في الأرض، وهو/هي
معندهومش أى استعداد للزينة دي.

3- أنا آسف/ة مش هقدر اقولها دلوقتي علشان أنا محتاج/ة
أفهم بس اللي حصل، أنا مستوعبة إحساسك بالألم (بس المشاعر
مسئولية أصحابها على حسب تاريخهم الشخصي مع الجرح)
ومستعدة أستنى لغاية م الوقت يكون مناسب ليك بعد ما تاخد/ي
وقتك خالص في إن ”سخونية المشاعر تهدا“ علشان تشاورلي أنا
دوست على أنني زرار غلط، أنا محتاج الفهم ده ليا أولينا.

وساعتها لَمَّا تساعدني أشوف، بإذن الله أنا هشوف اللي مكنتش

شايفه، فعمل التالي: مش بس هقول أنا "أسف/ة" هقولها وهعنيها وهترجمها.

الترجمة هنا مش معناها إني أجري وأحمل نفسي مسئولية مش مسئوليتي، لكني هشوف إيه اللي بدرمني وسبب ألم لشخص تاني، وهل دي مسئوليتي ولا مسئوليته ولا مسئولية في منطقة تالته تستوجب اتنين يشيلوها مش طرف لوحده، وإيه اللي ف أيدي أعمله دلوقتي حالاً للتعويض أو تطيب خاطر هذا الشخص.

وإيه اللي بعذر إني مش هعمله لأنني مش هقدر أعمله ومش ف أيدي أعمله لأنني مش قادر أعمله.

أنا أسف/ة لمشاعر الألم، أكيد أنا مقصدتش أتسبب ف ده، لكنه حصل، أنا مستنيك/ي تاخد/ي وقتك، هنتقابل بعدها، محتاج/ة تشاورني وتساعدني، لَمَّا تشاورني لسه عندي اختيار "أساعدك" تطيب جرحك لكني مش هشفيك.

ممکن أقعد واستني بس المرة دي انا مستني بوعي علشان أنا عايزاكتشف الحته دي معاك، وممكن أقعد شوية لغاية ما أحس إن خاطرك اتجبرو اتطيب وبعدين أعتذروامشي.

وممكن أعتذر إني أقعد بالكلية مع اعتذاري على كل اللي حصل وسؤال حقيقي: هل فيه أي حاجة أقدر أعملها علشان النقطة اللي واقفين فيها تكون أقل حدة عليك؟ والإجابة مش إلزام، الإجابة باب بيتفتح لاختيارين لصاحب السؤال نفسه: يا يعمل، يا يختار ميعملش.

ليه أنا "أسف/ة" مهمة، علشان حرام وعيب وميصحش ومينفعش نقابل كل الناس دي المدبوحين حرفياً، اللي جلدتهم

وروحهم انسلخت وبقوا هيكل عضبي علشان مستقبلوش إمكانية الاعتذار في الوقت اللي كان حدوثه هيدي سيناريو تاني للحياة.

يمكن علشان متقالش في وقته أو بالطريقة أو بالأمانة والصدق الكافيين اللي يخلوا البني آدميين ماشيين مطمئنين في الدنيا إن الخطأ بيحصل، علشان بشر لكن ملازم ليه إمكانية أن نعتذر، نعتذر ليس عن كوننا بني آدميين محدودين في الإدراك والفهم، نعتذر لإننا فاهمين ألم اللي بيستنى اعتذار "حقيقي" ومش بيحصل وقد إيه ده بينخرف في الروح، وبيزلزل أرض طرف ما ويفقده ثقته أن هناك خير أو جبر خاطر في الحياة عموماً فبالتالي، استباحة الأذى عادية وكل واحد يفضل ماشي شاييل شيلة على كتافه لغاية ما ضهرهم انتى.

الاعتذار جزء من دينامكية العلاقات البينية سواء تعمله بإيميل وتقفل الدائرة، وده في حالة الوظائف لو انت إتش آر، متسيبش الناس مش فاهمين مش عارفين ومش لازم الناس دول يبقوا هُم اللي شغالين معاك وفريقك علشان تديهم أهمية أو تبعتلهم إيميل فيه سطرين، ممكن جداً يكونوا ناس مهتمين بالشغل معاكم، أخذوا من وقتهم إنهم يتساءلوا أو يبعثولكم مقترحات، أو قدموا على وظيفة مثلاً: ابقوا ردوا عليهم ردت المية في زوركهم، بكل الحب.

أو بأي طريقة تانية في الدنيا، الناس بتمشي وبتخبط في كتف التاني، وبتبصله باستغراب اللي هو "إيه اللي جاب كتفك في دراعي" وكم ان عايزني أعتذره انت غريب أوي.

إنت عمري!

لمّا أم كلثوم غنت "إنت عمري" الجمهور ردّ وراها عظمة على
عظمة يا ست.

ولمّا أنا سمعت الأغنية أول مرة، قلت لنفسي هي ليه الست
عظمة بتوعده بحاجة هي متملكهاش.

محدث فينا بيملك عمره، لا اللي راح ولا اللي جاي، محدش فينا
يقدر يهدي العمرده لحد تاني حتى لو كان أقرب الناس ليه.

بنقف عاجزين إن إيدينا تفضل متبته في اللي بنحيمهم لو ساعتهم
جت ونزلوا من القطر في محطتهم.

ليه الناس انبسطت وبتنبسط وهتنبسط لمّا أم كلثوم قالت
"إنت عمري". ليه الناس مش بتغني لي بيحبوهم ويقولوا "إنت
بيتي".

في مرحلة من عمرك مبتكونش بتدور على سنين جديدة ولا أيام
على كالندر منور باسمك في دفتر الأحياء، في مرحلة ما من عمرك
مبتكونش قادر تناهد ف حاجات بتبتلك طول الوقت انك عاجز
وضعيف وهش زي الزمن، زي الاختيار، وزى الحياة اللي ممكن تمنح
أو تمنع عنك بدون أدنى منطقية ف الأحداث.

في مرحلة ما من عمرك مبيكونش شيء جميل تهديه لبي بتحبه،
يمكن لأنك لسه بتتصالح معاك وبيك على الدنيا، أو لسه بتحاول
تفهم غلطات ف عمرك اللي فات، أو بتحاول ترقع خروم روحك

لِينكشِفْ ضَعْفَكَ فِ عَمْرِكَ الِى جَاى.

لَمَّا أَمَّ كَلْثُومٌ غَنَتْ "إِنْتَ عَمْرِى" وَالنَّاسُ قَالَتْ وَرَاهَا عَظْمَةٌ عَلَى عَظْمَةٍ يَا سَتَّ كَانُوا أَكِيدُ مَبْسُوطِينَ، بَسَّ الِى بَسْتَغْرِبْلَهُ إِنْهُمْ طَوَّلَ السِّنِينَ وَقَفُوا بَعْدَادَ الْحُبِّ وَالتَّقْدِيرِ لِشَخُوصِ الِى بِيُحِبُّوهُمْ عِنْدَ الِ"عَمْرِ" الِى مِمَّكَ تَمْنَحُهُ لِي بِتَحْبِهِ كَأَقْصَى هَدِيَّةٍ مَعَ إِنْكَ مَشَّ بِتَمْلِكِهَا.

بِتَخِيلِ إِنْ فِ مَرِحَلَةٍ مَا مِنَ المَزِيكَا وَالتَّرْبِ وَالحَيَاةِ مَشَّ هِنْغِي "إِنْتَ عَمْرِى"، بِتَخِيلِ إِنْنَا هِنَقُولُ لِبَعْضِ "إِنْتَ بِيْتِي".

البَيْتِ الِى بِتَرُوحُ فِيهِ وَبِتَحْسَهُ إِنْهُ لِيهِ رِيحَةٌ وَطَعْمٌ وَتَفَاصِيلُ بِتَخْلِيكَ تَقْلَعُ هَدُومَكَ وَهَمُومَكَ وَتَبْقَى بَلْبُوصُ زِي مَا أَنْتَ بِأَقْلَ قَدْرٍ مِمَّكَ مِنَ التَّجْمَلِ وَالتَّجْمِيلِ وَالتَّلْصِيمِ وَالتَّرْقِيْعِ.

البَيْتِ الِى بِتَحْسُ فِيهِ أَنْكَ مِمَّكَ تَتَكُومُ وَتَكْرَمُشُ جُوهَ رُوحِكَ وَلَوْحِدِ سَأَلِكَ أَنْتَ فِينِ مَبْتَزَلِشْ لِيهِ هَتْرَدُ عَلَيْهِمُ "أَنَا فِى البَيْتِ".

البَيْتِ الِى مِمَّكَ تَبْنِيهِ مَعَ حُدِّ بِتَحْبِهِ فَتَفْضَلُ التَّفَاصِيلَ عَلَى الحَيْطَانِ الِى بِتَفَكَّرِكَ أَنْكَ عَلَى بَابِ المَطْبَخِ كُنْتَ بِتَطُولِ بَقِيْمَةِ 3 سَمِّ كُلِّ أُسْبُوعٍ وَكُلِّ شَرْطَةِ عَلَى البَابِ هِي ضَحْكَةٌ أَنْكَ بِقِيْتِ طَوِيلِ وَأَهْبَلِ.

البَيْتِ الِى مِمَّكَ تَخْشُ فِ رِكْنَةٍ مِنْهُ وَتَطْفِي النُّورَ وَتَفْضَلُ تَعِيْطُ وَتَعِيْطُ وَتَعِيْطُ لِعَايَةِ مَا تَشْتَهَى وَبِعْدِيْنِ تَرُوحُ تَمْسَحُ بِرِ اِيْرِكَ وَتَطْلَعُ لِلدُّنْيَا، وَلَمَّا حُدِّ يَسْأَلُكَ وَأَنْتَ عَامِلٌ إِيْهِ تَرْدُ عَلَيْهِمْ وَعَنْيِكَ مَقُورَةٌ زِي الطَّمَاظِمِ وَعِنْدَكَ كِبْرُ تِيْرَانِي أَصِيْلُ: "أَنَا مِيْتٌ فَلِ وَارْبِعَتَاشْرَ".

البَيْتِ الِى بِتَلْمَلِمِ فِيهِ قِصَاقِيصِكَ وَصُورِكَ وَضَهْرِ الكِرَاسَةِ الِى

بتكتب عليه أي كلام والسلام وفاكر نفسك شاعر الجيل في العامية، ولما بتيجي تسافر بتقف قصاد كومة من الحاجات اللي عايز تشيلها معاك، وبتكتشف انك محمل دايمًا بوزن زائد متشعلق في "بيت" متقدرش تعبیه في شنطة سفر، ولا تستحمله طيارة واحدة تاخذك لأبعد نقطة على الخريطة وفي الحقيقة انك لسه connected للـ "بيت".

في زمن ما هنغي لبعض "إنت بيتي"، هيقولوها الناس لَمَّا ياخدوا قرارهم الحياتي إنهم يبنوا "بيوت" حقيقية تشبه روحهم مش يتكوموا ويكوموا حاجات في "مساكن".

هيغنوها الناس لَمَّا يحسوا إنهم هُم اللي بيعملوا الفرق في البيوت وفي الأماكن وابتدوا ينسجوا بصبر وحب "بيوت" بتكون قائمة على أفكارهم اللي متقبلش المفاوضة ولا المساومة ولا المناهدة.

هيدندونها الناس "إنت بيتي" وهُم بيفضلوا يتشعبطوا ف الأماكن وف الناس وف القصاقيص الصغيرة اللي بتربطهم وبتخليهم ينتموا لمساحة جوه روحهم اسمها "بيت".

هيصدقوها الناس لَمَّا الـ "بيت" يبقى المساحة على خريطة روحك اللي بتخليك قادر تقعد مش متكتف كأني مواطن صميم بالفانلة والشورت ف يوم حارجًا، بس قادر إنه يتباهى ويتماهى مع عيوبه قصاد حد علشان الـ "حد" ده هو "بيته".

إنتي بيتي... وانت بيتي.

"بيت" يعني سكن، يعني شنطة "عمرك" كله بكل ما فيها، زغاريط وخيبات وهلاوس وانتصارات، وأوهام كنا فاكرينها حقايق، وحقايق

طلعت ف الآخر فنكوشية النكهة.

البيت يعني اللحظة اللي بكل ما ف عزمك تحدف الشنطة
اللي شايلة ”روبابيكيا“ روحك لأبعد نقطة ممكنة وانت متأكد انك
هتلاقها، هتلف وترجع وتلاقها، مع شخص هيكون ”بيتك“، أو مع
مساحة ونس ف روحك هتبقى هي ”بيتك“.
في زمن تاني الناس هتغي ”إنت بيتي“.

النساء من الزهرة والرجالة من كفر فرشوط!

What Alpha men ever want?

Three deadly mistakes in the relationship

Why men like bitches?

خلوني اعترف إني قضيت وقت لا بأس بيه من عمري وأنا بقرا
الكتب دي.

كتب ظريفة لطيفة نضيفة بتوصف العلاقة بين الرجل
والست، هي كتب أشبه بنوعية كتالوج التلاجة اللي بيشرحلك كيفية
توصيل الأسلاك وازاي تضبط الترموستات بتاعت الحرارة، وطبعاً
بيسيبك الهوت لاین علشان تتصل لو الموتور هنج أو الفريزر خلى
العلاقة ف وضع الفروزن تماماً.

سامعة حد قاعد على المدرجات بيقولي:

You idiot, stop wasting your time and go Get a life.

والترجمة بتاعتها يا هبله يا عبيطة يا أم بدوي قومي فزي على
حيلك وهاتي كتاب كيف تصطادين عريساً حبيباً في عشرين خطوة
(مصحوباً بوش واحدة بتمصمص شفايفها وبتتعايق برمش العين
والحاجب).

والحقيقة اللي مش لازم اضطر إني أقولها إني فعلاً لدي حياتي
العاطشفية الخاصة متقلقوش.

بس بعد ما كنت قارئة جيدة جيداً للكتب دي، اكتشفت إن العلاقات الحقيقية مبتقومش على كتاب بيوصف العلاقة بتاعت اتنين تانيين.

واكتشفت برضه انك لَمَّا تتفرج على حاجة من بره غير تمامًا لَمَّا تبقى قاعد جوه الفرن وحد مولع عليك درجة حرارة 25 فهرنهايت.

واكتشفت برضه أخو الاكتشافين العظيمين اللي فوق إن أوقات كتير جدًّا كنت بحط مجهودي في الحتة الغلط، إني أفسر واحلل وامنطق واعمل الناصحة الفكيكة في فهم الأفعال العتيقة وطبعًا بستهلك كل مجهودي من خلال إني اقلب في تشابترقم 7 من أي كتاب من الكتب اللي فوق.

هل الكتب دي مش مهمة؟

معرفش يمكن تكون مفيدة أو أفادت حد في يوم من الأيام بدليل إنها بتحقق مبيعات كويسة يعني.

اللي اقصده هل هي مفيدة ليا كشخص؟

الحقيقة لا، الكتب دي بتقدم وصفة جاهزة لعلاقات هُم بيسموها: (Alpha Relationships)

يعني حاجة كدهوت سوبر أو لوز اللوز، وفي الحقيقة ده مش بيحصل لأكثر الأسباب المنطقية.

انت كشخص مش لوز اللوز، ولا انت السوبر هيرو اللي بيلطعوه على غلاف المجلات مصحوبًا بتعليق (شايف اللي مش بيشرب اللبن هيبقى شبه عمو).

دلوقتي بقى عندي يقين أكثر إن العلاقات الحقيقية أواللي بتدوم على الأقل ولو ان مفيش حاجة بتدوم يا ابن والدي. هي البسيطة المباشرة الواضحة، والأهم هي العلاقات اللي كل طرف فيها بيعمل "مجهود" علشان تستمر العلاقة وتتبي.

طبعا يعمل مجهود حسستك انك شاييل قصعة مونه على كتفك، بس المجهود هي الخطوات الصغيرة البسيطة برضه اللي بتبني علاقة إنسانية.

إحنا قبل ما بنخش ف علاقة بيبقى عندنا تصورات جبارة إنها هتخلينا سعداء ومكتملين وعشرين ملاك مضروبين ف الخلط مع بعض.

والحقيقة إن العلاقات عاملة زي الصندوق الفاضي كل واحد بيخش يطلع من روحه اللي يقدر عليه ويحطه في الصندوق، وبيفضل الصندوق يتملي بكل الحاجات اللي تخلينا نكتب على الصندوق هنا توجد علاقة إنسانية صعب انك تنساها.

بعد الرغي واللت والعجن، جميل إن احنا يبقى عندنا عوالم موازية بتساعدنا إن احنا نفهم ونحلل ونفحص العالم اللي منعرفوش.

بس جميل برضه إن احنا نرزق كتف في العالم اللي مش موازي، العادي الحقيقي، ونعترف لنفسنا إننا مش ألفا بني آدمين، وجميل إن احنا نستثمر نفسنا مع اللي بنحبهم.

وعلشان برضه أقول بوقين زي بتوع الكتب المذكورة أعلاه، لو انتوا في بداية الريليشن هاتوا برطمان، أي نعم، وفي قصاقيص ورق

صغنتتة اكتبوا حاجات حلوة أو مقندلة ميضرش برضه، وسيبوها
ف البرطمان بس ابقوا اعملوا دوت انتو الاتنين مع بعض وسموه
برطمان حُبنا (وش لينا وهي بتكلم مسعودي قبل ما تنزل بالقلة على
دماغه).

حميمية، يعني إيه قلة أدب دي؟!

إحنا بنستخدم كلمة "Intimacy" في اللغة العربية بمعنى "الحميمية"، والحقيقة دايماً المعنى اللي بيتبادر للذهن أول ما كلمة "حميمية" تطرّع في الجملة هو ممارسة الجنس بس احنا بنحط التاتش المؤدب علشان ميتقألش صراحةً.

مع إنه مفيش مشكلة أصلاً إنه يتقال صراحةً وبشكل مباشر علشان يقصر السكة لكثير من الطرق الملتوية اللي في النهاية هتؤدي إليه.

من فترة كنت بتفرج على مناظرة على الي بي سي، وكالعادة قسموا الشاشة لنصين النص الشمال كان متصدره شخص بيتكلم عن التربية الجنسية في المدارس كمنهج وكبدايات لتقديم معلومات أساسية ممكن يحتاجها المراهقين في فورتهم الجنسية.

النص اليمين بقى كانوا بيقدموها صاحبة موقع تعدت السبعين ربيعاً يا جدعان بتتكلم عن موقع دشنته بترفع فيه الخبرات الحياتية الجنسية الحقيقية لأصحابها وطبعاً ده بكامل موافقتهم الكتابية (كل واحد قاعد بورقته وبتوقيعه).

النقطة المحورية في الجدل هي هل احنا بنقدم معلومات يمكن تصنيفها إنها: (authentic and genuine) ولا بنقدم معلومات بتتصنف إنها: (shallow and unreal).

الست بتاعت الموقع كانت بتدافع عن التجربة اللي بتخوضها

إنها لاحظت إن الناس على الرغم من تلقمها لكورس التربية الجنسية في المدرسة (حاول تمسك نفسك في اللحظة دي انك تفتكر ميس حنان بتاعت العلوم لَمَّا شرحتلنا الجهاز التناسلي للمرأة في تانية إعدادي وهي باصة في سقف الكلاس وبتشاور إشارات غريبة في الفضاء، تقريباً كانت بتكلم كائنات فضائية هي لوحدها شايفاهم حاول حاول).

الناس دي بقى على الرغم من إنهم ينشكوا في نواضرهم أخذوا تربية جنسية في المدرسة إلا إنها بتميل للفرجة على البورنوجرافي، وفي العلاقات الأكثر مرونة بيتفرض طرفا العلاقة سوا علشان بيحاولوا يضيفوا الحياة للعلاقة الروتينية بينهم.

الست القرشانة قالت إن البورنو كصناعة بيخضع لمعايير كثير من أهمها انه مش حقيقي، وانه بياخدك لعالم بلاستيكي بتلاقي كل حاجة فيه حلوة وأقرب للكمال، وبالتالي بيخلق جوه منك صراع لَمَّا بتيجي تمارس العلاقة في الواقع لأنه خلق في عقلك صورة ذهنية معينة بتحاول توصل لهما، وفي الأصل الصورة الذهنية ديت هي مجرد تلاعب بالدماغ (Image Manipulation)

فهي اهتدت إنها تعمل الموقع بتاعها علشان تشارك الناس بخبرات حقيقية، هتقابل فيها ناس حقيقيين بأجسام عادية مثلاً، وبأخطاء مضحكة برضه، وفي لحظات مثلاً عدم التوفيق أو الانبساط المهم اللحظة اللي هُم يقرروا إنهم يتشاركوها ويرفعوها على الموقع بكامل إرادتهم.

الجدل كان ممتع لأقصى درجة، مش علشان هم بيتكلموا عن الحريات ولا علشان بيتكلموا عن موضوع مهم في الحياة ولا علشان

طريقة الانتقال من نقطة للتانية في بناء الحوار نفسه للمتلقى بحيث هو لوحده يبقى قدامه البدائل اللي يختار منها وده في حد ذاته قمة الحرية انه يبقى عندك الحق انك تختار بوعي.

الحوار كان مشبع ليا جدًا لأنه ببساطة الولية قالت جملة في نهاية الحلقة:

“We should bring this debate to the open so we can tell our children what intimacy is. It is our responsibility to give them healthy and authentic alternatives in a way that they formulate their own concept about intimacy”

وهنا لقيت نفسي بقى بسأل روجي: أيون يا بنتي بقى إيه هي الانتيماسي اللي خالتك الحيزيون بتتكلم عنها (ودي من اللحظات المتكررة اللي بقفش نفسي بعمل حوار موازي مع التلفزيون وخصوصًا لما بقى بتفرج على مناظرة).

الانتيماسي على حسب تعريف الويكي شيكي بيديا إنها العلاقة السيكو سيكوبس لوقفزت شوية كدهوت بين السطور هتلاقي إنها

It satisfies human's desire to belong and love

ولو انت عايز رأيي عزيزي الدوق دي أهم حته في المفهوم كله اللي هتبني عليها دماغك.

الحميمية هي احتياج الإنسان إنه ينتمي، عارفين الفعل ده، اللي عادة تلاقي صورة علم وطنك بتفرغ في دماغك، اوسكت اوسكت.

طلع إن الانتماء ينفع يكون لشخص، ايون لإنسان تاني،

البعد الثالث

عارفين لمَّا بنروح السينما وبنلبس نضارات بيسموها الثري دي،
وينقعد في الصف عاملين زي الشيخ حسني وهو قاعد في الفلوكة
وبيتفرج على فيلم سينما في دماغه هو، أهو نضارات البعد الثالث
دي محتاجينها في الحياة.

النضارات اللي بتخليك تروح للبعد الثالث الأعمق في الكادر اللي
مش كل الناس بتقف عنده أو بتهم بيه، فيه ناس لمَّا بتيجي تاخذ
لقطة كاميرا بتهم جدًا إن كل التفاصيل تبقى ثابتة.

المشكلة في صورة الكاميرا إنها على قد ما هي ثابتة على قد ما هي
بتتحدى اللي بيقف ورا الكاميرا إنه يحاول ينطق الثبات ده ويحركه.
نفس محاولة الإنسان في المعافرة في الكون إنه يحرك كل حاجة
ثابتة أو اتهميأله إنها ثابتة.

أكيد ده ميل فطري عند الإنسان وجزء من طبيعته البشرية
أو جزء من تحسيسه وتلمسه لطريقة علشان يكتشف بيها الحياة
حواليه. إنه يرفض الثبات ويرفض الكادرات الثابتة فيما بين كادر
الولادة وكادر الموت محتاج إنه يتحدى الثبات الخامل بالمزيد من
الحركة، وعلشان يعمل ده بتبدأ رحلته إنه يتحرك بشوية مسلمات
تعينه على مشقة الرحلة، لكنه سرعان ما يكتشف إنه محتاج
يفحصها ويمحصها وأوقات يهدا وبعدين يرجع يبني غيرها واللي
بتتحول بدورها لمسلمات تانية جديدة.

ويبدو برضه إن ده هو معنى الحياة لأنك لو اقتنعت إنها واقفة محلك سر أو إنها دايسة على زرار (Pause) فده معناه موت إكلينيكي محتم.

رغبة الإنسان إنه ياخذ نفسه لعمق الأشياء والأحداث والصور. رغبة الإنسان إنه يربط كل الثوابت بحوادث مروية أو لم ترو بعد.

رغبة الإنسان إنه يُضفي تفاصيل منمنمة جدًا لكل الأشياء الثابتة جدًا وكأنه يحاول يمنحها حياة من نوع ما، أعتقد ده ميل فطري للإنسان علشان يفكر نفسه إنه حي.

قيمة الحياة اللي بتنتج نفسها بأشكال كتير حوالينا حتى في صورنا الثابتة.

قيمة الحياة اللي بنحاول نضفي بيها العمق على الحوادث اللي بنحكها للولاد قبل ما يناموا علشان لَمَّا يفتحوا عندهم يعرفوا إن الحياة ليها معنى يستحق إنك تفتح عينك عليه كل يوم.

قيمة الحياة إنها بتاخذك زي النهر للعمق مهما بلغت اتساعات الدوامات المخيفة اللي فيه، ومهما استكان الإنسان واتطمئن إنه بيطفو على السطح بتفضل جواه الرغبة للوصول لعمق النهر، المعنى ورا كل حاجة وده اللي بيخلي الحياة تبدو على عدم منطقيتها في كتير من الأوقات إنها منطقية جدًا بل تستحق إنك تعيشها لآخر فتفوتة فيها.

الأكل في حد ذاته مافهوش معنى، لكن لو كان الأكل طبق ملوخية معمول بشهقة مصرية وجنبه حنة بطة شقية يبقى أكيد هيبقى ليه

”معنى“ ثقافي إنساني من نوع ما في سياق ما.

الأكل الغالي جدًا اللي ممكن تشتريه من مطعم مشهور جدًا ممكن يفقد كل خواصه المغرية لو انت في لحظة استحضرت صحبة افتقدتها مع الأكل، أو بصيت للكرسي الفاضي وقولت في نفسك يا سلام لو كان فلان أو فلانة معايا وكنا أكلنا سوا.

والفعل اللي بنستخدمه هنا في الكادر ده هو أكلنا لكنه في الحقيقة معناها ”عشنا“ أو ”دقنا الحياة“.

الجنس على قد ما بيتحكم في حياة الإنسان وضروري لبقاؤه واستمرارية سلالته، بس في حد ذاته هو لسه على المستوى اللي بيطفو بيك على السطح، وبالتالي متقدرش تصنع منه هو لوحده حياة تقدر تحط عليها طابع ”الإنسانية“.

الجنس لو أخذته على مستوى البُعد الثالث هتلاقي إنه لحظة الاكتمال اللي بيعتقل فيها الجسد بلحظة اكتمال الروح، وعلشان كده صعب إنك تشوف علاقة جنسية ناجحة بالمعنى الفيزيقي لو مكنش طرفاها بشكل ما عندهم الفهم الإنساني لخرايط شركاؤهم الروحية، هُم ممكن يكونوا بيعملوا المهمة في البعد الأول أو الثاني بس طول ما البعد الثالث لسه ناقص الصورة هتفضل في وضع الـ”Blur“.

مش من السهل إنك تفضل تنكش في الحياة حواليك على البعد الثالث لأنها مش بتمنحك الإجابات لأي سؤال بطريقة سهلة ومباشرة.

مش سهل لأن الحياة أصبحت صاخبة زي الموجة العنيفة اللي بتاخذ على سهوة، وبتجيبك على قفاك، و انت بدورك بتستهلك جزء

كبير من طاقتك الإنسانية في محاولة إعادة التوازن بدل ما تدور على
البُعد الثالث.

وزي ما الحياة مش سخية إنها تدينا البُعد الثالث، البُعد الثالث
نفسه أليط في روحه لدرجة إنه مبيكشفش نفسه غير للباحثين
الجادين عليه، لأن للأسف بقى نفسنا قصير جدًا، وعلاقتنا
الإنسانية بتكتفي بالطفو على السطح، وقليل لمَّا بناخد قرار واعي
إن احنا نسيب نفسنا للدوامه النهريه علشان تسحبنا للعمق لأننا
ببساطة بنخاف ”نعيش“.

وعلى قد إنه مش سهل، وعلى قد ما الحياة بتتعافى علينا
وبتستقوى بال”قدر“ على اللي اتبقى من إرادتنا الحرة في الاختيار،
على قد ما هو جميل إنك تفضل تدرب نفسك من وقت للتاني إنك
تنكش على البُعد الثالث في الحاجات اللي حوالك، في الناس، في
ألبوم الصور، فتش على الصور الدافية اللي مخبية حواديت، في
أصحابك فتش عن الناس القادرين إنهم يعرفوا روحهم بلا تجمل ولا
تزييف ولا تصنع.

في الكتب اللي بتأخذك من ايديك كده وبتوديك لعوالم تانية
تعملك مساج لعقلك ولروحك وتمنحك فرصة الولادة من جديد.

في كادر السينما اللي هو اخترع البُعد الثالث أصلاً علشان يضفي
عليك انت متعة ثلاثية القوة، إلعب بيه كمنجة في دماغك وطلع
سيمفونية تشبه العمق اللي يشبه البُعد الثالث في روحك.

الحياة على قد ما بتدينا صخب، على قد ما بتزود التحدي إن
احنا ندور على البُعد الثالث، على العمق ورا كل الأشياء العابرة جدًا

والتفاصيل اللي محدش هيقف سواق التاكسي اللي سايق ويقوله
حاسب هنا يا اسطى بص شوف هناك قفشنا في المعنى اللي ورا
الكواليس.

وعلشان احنا كائنات معقدة جدًا لدرجة إننا مش بس عايزين
نغلب روحنا بالبحث والديه والكشف، ايسلوتلي، علشان احنا
عايزين نعيش الحياة لأخرشدة في الأستك.

علشان احنا عايزين ناخذ الصور ذات الكادرات الثابتة جدًا
تبقى ممتلئة بـ"الحياة" جدًا، لأن ده بيصهر وجودنا ذاته وبيصيح
ملامحنا الإنسانية علشان نفضل متأكدين إننا لسه بنتنفس وعلى
قيد الحياة والكادر لسه متقفلش.

الكذب مالوش رجلين... إيه ده... ده بيمشي؟!!

ماذا لو الحدوتة طلعت ملتوتة علشان الأميرة لمّا قررت تبوس الضفدع في نهاية الحدوتة فضل برضه ضفدع ومتحولش بقى الأمير الساحر؟

يا ترى الأميرة هتفضل تحب الضفدع ويا ترى حدوتهم هيبقى شكلها إيه!!

لمّا بنفتح كتاب الحواديت بنلاقي سلسلة من الكذب "الجميل" اللي بنحب نعيشه كأطفال لسه عيونهم مليانة دهشة وقدرة على تصديق كل حرف يتحكليهم، ولسه عندهم مساحات في كراسة الخيال في عقلهم قادرة تتلمي بحياة تشبه برائتهم.

لمّا بنقرا من كتاب الحواديت بندور على زلعة الذهب اللي مستنيانا في آخر قوس قزح المرسوم بامتداد الحلم والدهشة والطفولة.

ولمّا بنكبر شوية وبنخش المدرسة بيعلمونا إن اللي بيكذب بيروح النار، مع إنهم بيكذبوا برضه لمّا بيعاقبونا بخلق خوف جوانا من "أوضة الفيران" ومش عارفين إننا اتصالحنا مع خوفنا من زمان والفيران بقت صوحابنا من أيام توم وجيري، مش عارفين إننا عارفين إنهم بيكذبوا واحنا سايبينهم يصدقوا كديهم.

لمّا بنكبر أكثر بترن في ودننا جملة "الكذب مالوش رجلين" فلازم يتبادر لذهنك صورة راجل يا عيني مالوش رجلين، طب ما ساعتها

المفروض نساعده ونقف جنبه، يبقى لازم نكذب بقى.

طب ماذا لو الكذب فعلاً مالوش رجلين لكن ليه أجنحة؟
لوبصينا شوية في حياتنا هنلاقي جناحات الكذب محاطانا في حتت
كثير.

المرة اللي بتقول فيها لى بتحما إنها أجمل بنت في الدنيا كلها، في
حين إن الشبورة على نضارتك مش جايبة نور العمود اللي على مترين
من مطرح ما انتوو اقفين تحبوا.

المرة اللي كدبنا فيها علشان يتلغي خصم المرتب واستدعينا
أكثر الأعداء درامية لاستدرار الدموع، ونجحت كدبتنا.

المرة اللي ردمنا فيها على فلوس الدروس أو المذكرات علشان
نتجنب تسفيه رأينا واختيار اتنا لو قولنا إننا هنحضر بالفلوس حفلة
مزيكا.

المرة اللي وعدنا اللي مروا بينا في قطر الحياة إننا هنموت سوا
واللي حصل إن محطتهم جت بدري وفضلنا احنا نشاورلهم من بعيد
وكدبتنا كانت مسبوكة لدرجة إنها موجعتش اللي نزلوا من القطر
على قد ما وجعت اللي لسه عايش وبيتعذب بكذبتة لأنه مش قادر
يحصلهم.

ولمّا بنكبر أكثر وبنط بره كتاب الحواديت، الحياة بتعلمنا
أبجديتها وبتفرض علينا الجملة الأبدية ”أنا لا أكذب ولكنى أتجمل“
لمّا قالها أحمد ذكي في فيلمه اللي بيحمل نفس العنوان كان عايز
يدافع عن حقه في خلق فقاعة من الحياة يقدر يوهم نفسه بتحقيق
انتصار غير مؤذي لأي حد لمجرد إنه مقامش الصبح ولقى حبوب

الشجاعة اللي هتضمنله إنه هيقدر يواجه المجتمع بحقيقته.

كلنا يا عزيزي بنكذب، على اختلاف لون الكذب من الأبيض للأسود الغطيس، وعلى اختلاف حجمه من السمول للكومبو السبايسي.

كلنا في لحظة هشاشة إنسانية بنخشى التعري لمواجهة الحقيقة اللي مش شرط تكون حلوة، ومش قادرة أحط إيدي ليه مصرين دايمًا نعرف الحقيقة مع إنها بتوجع ومش بتريح!!

كلنا زي ما بنعمل فوتوشوب لصورنا علشان نداري ديفوهات ملامحنا، بنعمل بشكل موازي فوتوشوب لحياتنا في محاولة مننا إننا نوصل لشكل الحياة المثالي اللي بنحلم بيه.

كلنا بنكذب علشان نتماهى مع مجتمع هو بدوره بيكذب على روحه و أفراده، وبنكذب على روحنا اللي عندها شبق للكمال.

بيعلمونا في المدرسة أنّ الصدق منجاة (ويا ريت بلاش تقراها منجاة)، الصدق يمكن هيكون هو المسار الأصعب اللي لازم تقررر في لحظة إنك تسلكه مهما كان حجم المخاطرة.

الصدق هيكون هو مساحة الحوار الصافي اللي جوه منك، اللي قادر يميز الخط الفاصل بين كذب لذيد وانتصار سريع وبين حقيقة صادمة في معظم الأحوال وحدوتة مش شرط تطلع حلوة لأنها في الغالب ملتوتة.

الصدق يمكن يكون الاختيار الأصعب، لكنه هيفضل الاختيار الأكثر نضجًا وتسوية ليك على نار هادية.

لمّا بنكدب بنفضل خايفين ومركبين عيون في راسنا من ورا
بتحاول تكذب كدبات تانية علشان تداري بيها على آثار خطاويننا في
الكدبة الأولانية.

ولمّا بنكون صادقين مع روحنا بنجيب خوفنا تثبتت أكتاف لإننا
بنوصل لمرحلة إننا بنبص للحقيقة اللي مش لازم تكون حلوة، لكن
بنبص ليها بثبات وبطريقة مباشرة في عنيا وبنقول:

”أنا كبرت كفاية إني أتعامل معاكي زي ما أنتي ومش محتاج أعمل
فوتوشوب، لإننا ببساطة خرجنا من كتاب الحواديت“.

والبطل الوحيد للحدوتة الباقية هو أنت ومساحة الصدق
اللي جواك، اللي بتخلي منك ومن مشارك في الدنيا حدوتة إنسانية
حقيقية تستحق تتشاف.

إحنا بنكدب علشان بنخاف نواجه اللي في يوم هنضطر نواجهه
وفق التوقيت المحلي للحياة والواقع، هنضطر نواجهه دلوقتي أو
محطتين قدام.

ولمّا بنقرر نكون صادقين بنفتش على حبوب الشجاعة
المستخبية جوه روحنا وبنقرر نخوض معاركنا بدري، واللي مكنتش
برانا هي كانت معركة جوه روحنا.

إحنا قادرين نواجه حياتنا من غير فوتوشوب ونتحمل ”قدرنا“
الغير مكتمل، ولا مصرين نلف في فقاعات مسيرها في يوم هتفرقع من
الكذب.

الاختيار لريك.

اللي يحب النبي يزق!

القفز هو حالة بياخذ فيها جسم الإنسان الانتقال من الوضع الثابت لوضع أقرب للتخليق في الفضاء وحتى لو لمدة ثواني ثم الاستجابة لقانون الجاذبية الأرضية والعودة مرة ثانية لوضع الثبات. وده التعريف الرياضي جدًا لفعل "اقفز"

في الحياة، كام حد فينا بيجرب فعل القفز، الانتقال من الحالات الساكنة جدًا، الصامته جدًا، الخاوية جدًا من المعنى بعد ما لحظات الدهشة الأولى اتكسرت.

كام حد فينا بيجرب يمشي لغاية الحافة وبيشرب اللي اتبقى من حبوب الشجاعة عنده في روحه وبالرغم من وقوفه على الحافة وهلاوس السقوط المدوية اللي بتحتل مقدمة راسه بيتغلب عليها وبيقفز، وبيسيب روحه تجرب إحساس التخليق حتى لوتلاه السقوط. زمان لمّا كنا بندرس إدارة التغيير كان دايماً فيه عبارة بتقول إن الحياة الحقيقية بتبتيدي على حافة الكمفرت زون، والحقيقة إن موضوع الكمفرت زون ده كان موضوع مُسلي جدًا.

المنطقة الدافية دي اللي تشبه السرير بتاعك في بيت مامتك اللي لمّا بتسافروبتتغرب وبتقابل ناس وترتاح ويا ناس عن ناس بترجع تحن لنفس السرير، بترجع تحن لنفس المساحة الدافية.

هل هو علشان السرير كان دافي أوي يعني، ولّا علشان التفاصيل الدافية اللي انت رسمتها للسرير ده وأضفت عليها هالة الدفاء.

الحقيقة موضوع الكمفرت زون كان مريح جدًا لتفسير كثير من سلوكيات أفراد الفريق في الشغل.

وكانت دايماً النصيحة اقفزوا من الكمفرت زونز الوهمية اللي صنعتوها لنفسكم وروحوا على الحيااااااااااا على منطقة ال(Energy Zones) واللي هي عادة بتبقى عكس الكمفرت زون.

وبعد تأمل شوية اتضح إن مش كل الناس تقدر تعمل كده، مش كل الناس بتقدر تدوس على زرار "اقفز" وهوووووووب تلاقها بتتحنجل بمنتهى السلاسة بين المنطقتين سواء الكمفرت أو الإنرجي.

وخلينا نكون أكثر واقعية مش كل الدواير اللي بره الكمفرت زون هي دواير بالقطع فيها حياة مليانة إنرجي، لكن اللي أكيد إن فيها مساحة للدهشة تستحق القفز علشانها، علشان تعيد تنوير الشريط في كادر السينما.

لمّا ابتدينا نعدل طريقة تكبيرنا للفريق، لازم تجهز فريقك بالمهارت إنه "ينط"، ومينفعش تفضل واقف في قفاه وعمال تزغزغ ودنه وتقوله نط... نط. ما تتنيل على عين اللي خلفوك واتنيل ونط يا أخي قرفتنا.

جزء كبير من فعل ال"قفز" بييجي من إرادة البني آدم نفسه، اللحظة اللي بياخد فيها قرار واضح صحيح مع نفسه إنه يقفز في دواير أبعد من الدائرة اللي تشبه روحه.

الإرادة دي بتتشكل بحاجتين إما إنه يكون هو عنده رغبة إنه يعيش الحياة لغاية آخر نقطة في الكاس بتاعها، وساعتها رغبته في الحياة والتخليق هي اللي هتخليه يقفز حتى لو كانت قفزاته في اتجاه

السقوط لكنه ساعتهما السقوط بالنسبة ليه أهون ميت مرة من البقاء محلك سر في نفس الحافة، وأهون ميت مرة من مشاهدة العالم كله بجماده بكائناته بذراته بتتحرك من حواليه وهو لسه واقف على الحافة.

أو بالرغبة في الموت، أينعم رغبة الإنسان في الموت البعض بيفتكرها إنها رغبة اللا فعل أو اللا رغبة بمعنى أصح، ممكن جدًا وصولك للنقطة دي معناها إنك برضه هتقفز حتى لو كان الدافع إنك أيوة أنا عايز اسقط، أيوة أنا عايزة اقع، أيوة أنا عايز انتهي من حالة الوقوف على الحافة.

وعلى الرغم من إن القفزة كانت بنية الموت وبنكهتها، لكن وهو في طريقه متسارع لأسفل هتنتصر رغبته في الحياة، وهيقاوم فعل الجاذبية الأرضية وهيفضل يشلت بإيديه ورجليه ويقاوم ويصارع علشان هيكتشف في روحه ذرة مستخبية اسمها حُب الحياة اللي بتنتصر على أي رغبة تانية حتى اختيارنا للموت في لحظة ما.

اللي اتعلمته من القفز بين مساحات الكمفرت والإنرجي والتحليق والسقوط والاستجابة للجاذبية الأرضية والموت والحياة إن الرغبة في الحياة هتنتصر في النهاية.

طال الزمن أو قصر وقوفك على الحافة هيجبرك إنك تقفز، إما بإرادة منك إنك تنتصر لحياتك، وإما في لحظة ضعف إنك تقرر إنك تنهيا علشان تضع حد للوقوف على الحافة، وساعتها برضه الرغبة في البقاء والحياة هينتصر.

انتصروا للحياة، انتصروا للرغبة في القفز من على الحافة،

لماضى مصرية جدا _____

انتصروا للرغبة في الخروج من دو اير وهمية اسمها الكمفرت زون،
وحتى كمان الإنرجي زون.

انتصروا للغربة في الحياة بدون دو اير مغلقة، ازاى تقفلوها وهي
معمولة براااح ليكم، حتى لو كنتوا و اقفين على الحافة.

هي برااااح وعمرها ما هتبقى دايرة مغلقة، سواء حطيتوا عليها
يافطة الكمفرت زون أو الإنرجي زون.

هتفضل الدكانة عليها يافطة معمولة بالنيون بألوان قوس قزح
واسمه "دكانة الحياة".

اشتروا منها حلويات، بالونات، أدوية ترجيع علشان القفز
وكده، أو حتى براشوتات من الناس والخبرات والتراكمات اللي تقدر
تخلي هبوطكم بعد القفز ممكن جدًا يكون هبوط آمن، اشتروا منها
الضمانات اللي تريحكم.

بس اشتروا من الدكانة، وخلوها دايمًا مفتوحة.

دكانة الحياة.

النور مقابل الضلمة ينتهي بنسبة 50% لصالح كل واحد فيهم مع شخروميت احتمال ثاني إن الضلمة تجيب النور تثبيت أكتاف وكده. دي مش محاولة لإحباط ولا لتثبيط همم ولا تكسير مجاديف، بس أنا بحاول أغير تفكيري، أفككه علشان يرجع يتركب بشكل واقعي شوية.

الواقع بيقول لو انت فعلاً في نفق وضلمة وعمال تحسس وتعتذر (دكتور أفت في الساونا) في الأول فكرة الوقوف في الضلمة هترعبك وهتملى دماغك هلاوس عن الأخطار المحدقة بيك من كل ناحية مع استدعاء بسرعة الضوء لكل أساطير أبو رجل مسلوخة بتاعت الطفولة.

هل الضلمة مش مرعبة؟... لا.

هل النفق مالوش آخر... معرفش.

بس اللي متاكدة منه إن الواحد بدل ما يستهلك طاقته في انتظار "نور" مش عارفة من أنمي دكانة بتشتروا اليقين دوت بيبتيدي يقوي دفاعاته النفسية والعقلية علشان لمّا ينتقل من وضع سيء لوضع أسوأ يبقى على الأقل مستعد.

ووفر على نفسه انتظار ما لا يجيء، أو خيبة أمل راكبة جمل علشان سقف التوقعات اللي اتشعلق في لمبة "النور" اللي علقوها في آخر النفق.

برضه ده مش إحباط، دي زقة علشان لمّا بتبتدي تستعد إنك في مرحلة سيئة واللي جاي ممكن يبقى %^&*\$%... ده بيديك قوة أكبر علشان انت أصلاً عندك غريزة البقاء، وهتعرف تستقوى حتى وانت

واقف جوه النفق ولسه لا بينلها "ضلمة" ولا "نور".
على فكرة اللي بقوله احتمال يكون غلط أو صح، ضلمة أو نور،
بس هو مجرد وجهة نظر.

متولي جاد الحق عويس شبرا. 2019

الراجل المحافظ أبو جلابية وتحتمها صديري أكيد مقلّم بالعرض ومدخله جوه الكلسون علشان الشتا داخل ومبيحبش يستهوى، الأب الخنيق على بناته صاحب العشرة ساغ المشهورة اللي اتحولت كل ما بنلاقي حد باصص ومركز على الأرض أوي بنقوله إيه لقيت العشرة ساغ.

صاحب أكثر ملامح جادة تخليك تتقلب على ضهرك من الضحك وهو بيسأل بتركيز شديد قال هيفهم يعني مين شأاااافيق يا راجل، اللي خلاني أحب المندبل المحلاوي الكبير ده واللي أنا كنت فاكراه رومانسي وبتاع قال علشان نعمل بيه باي واحنا مسافرين في المحطة (جديمة أنا طول عمري).

صاحب النظرة اللي تحسسك إنه فاهم كل حاجة مع إنه مش فاهم أي حاجة وكل الأبطال حوالية نطوا من الشباك وهو قعد يتفرج عليهم وهم بيعملوا بولولوم.

الشخصية الأكثر إضحاكاً ليا في المسرحية وفي الحياة، الرائع جداً (حسن عابدين).

طول عمري وأنا شايفة إن مصر هي ”عش مجانين وأي حد هيحاول إنه ينفي أو ينكر أو يرش شوية فتافيت سكر على المشهد مش هينفع، البطل المفروض في المسرحية على حسب ترتيب الافيش هو (محمد نجم).

واللي للدهشة والعجب والبهجة وشوية حاجات فوق بعضها اضطر إنه يتقمص حوالي أربع أو ثلاث شخصيات مش فاكرة، الغريب إنه كان بيحاول يقنعنا إنه مختلف ويحط التاتش بتاعه في حين احنا عايزينه يلخص علشان نسمع الكام إفيه ونضحك وخلص.

مهارة 1

خليني أترجم حيي الكبير لمتولي جاد الحق عويس شبرا، وأتخيل إنه زارنا في 2019 وشايل ع قلبه شوية مهارات كده علشان نعيش في عش المجانيين.

أي مكان على الخريطة بيفتقد للحس المنطقي في الأداء. أو الأحداث أو المعطيات، متوجعش راسك في التحليل وتخرم سقف الأوضة بحلقة في محاولة عبثية لإيجاد حلول.

يا عم زقطط، حلوا إنك تعترف إنها ”عش المجانيين“، شفت سهلة ازاي، فتح عينك بقى وقول هيببيبيبيبييه.

مهارة 2

تعامل مع كل الأحداث اللي عمالة تعيد بعضها وكأن كاتب السيناريو أصابه بلوك عقلي فمبقاش قادر يبتكر مشاهد جديدة كأنك بتتعامل مع محمد نجم، هيفضل يكرر نفسه لغاية ما يتحرق، مهارتك إيه بقى يا اسطى، كل المشاهد المكررة هتفضل من كتر ابتذالها تاكل نفسها وتتحرق وتتلاشى ذاتيًا.

مهارة 3

مش لازم تفهم كل حاجة في أي حاجة في كل وقت، ومش لازم

تقول رأيك أصلاً.

كم هو جميل أن تستيقظ كل يوم الصبح وانت رابط المنديل
المحلاوي على راسك وحاسس إن فاضلك قرعة وتبقى متولي جاد
الحق عويس شبرا.

مهارة 4

من الجيد إنك تحط عشرة ساغ من حين لأخر على الأرض،
العشرة ساغ دي ممكن تكون تحويشة عمرك من الحاجات
الصغنتتة اللي انت عارف إنها بتعمل حالة خدر أو بهجة أو فصلان
عن الواقع هبابة كده علشان تلقط نفسك وتستعيد قدرتك على
الجرى مرة ثانية، متستقلش بالعشرة ساغ دي بتعمل معجزات.

مهارة 5

إقنع نفسك وانت على الخشبة بتاعت المسرح هتقابل ناس
بتضحك ضحك هستيري، وكمان بتعيط وبتصوت صوت هستيري،
مش لازم تبقى تبع حد، ولا مع حد، ولا على حد.

تذكر عزيزي اللي بتحاول تبقى، إنك متولي جاد الحق عويس
شبرا، لا بيضحك بصوت عالي ولا بيعيط، دماغه زلطة شكلاً وملامحه
زلطة انفعالاً، وردود فعله زلطة يعني مفيش كلام.

مهارة 6

أوقات كتير هتتكعبل في المعالج النفسي، وماله يا اخويا ما
يضرش (وش الداكتور شديد)، إوعى تفتكر إن حلول المشكلات
والمجعلصات هي نفسية... أبسلوتلي يا عزيزي، فكر نفسك بمهارة

نمرة واحد انت في عش المجانين فكلنا هنقابل مجانين بس بدرجات
مختلفة.

تبت في المنديل كويس إوعى يضيع منك لغاية ما تنزل الستارة.
ودي كانت أول مهارات يا ولاد النهاردة، المانيوال مفتوح وبتلقى
خبراتكم (وش فريال صالح في اخترنالك)، وتحية مخصوصة لمتولي
جاد الحق عويس شبرا، والقرعة، والمنديل، وبولللولللولوم، وأنا،
وانت، واللي بيحبنا ميضربش ناريزوع فلوس.

وركبنا حصان الخيال... درجن. درجن... درجن!!

حسن يوسف في فيلم للرجال فقط قدم لنا أول تصور دمه خفيف عن الهلوسة، والتي كانت نتيجة عن الكبت الجنسي التي عاشه مهندس في الصحرا مبيشوفش جنس واحدة ست، فابتدى عقله يحاول يسرسب الكبت التي عنده ده في شكل تهيؤات إن فيه ستات في الصحرا.

والفيلم ذو الطابع الكوميدي موقفش عند تقديم حالة التهيؤات أو الهلوسة، لكنه كمان اتبرع مشكوراً باقتراح إن اللي بتنتابه الحالة دي علاجه إن حد يكب على صاحب الهلوسة أو التهيؤات كباية مية سقعة فيرجع أخينا بابتسامة لطيفة ظريفة (ومندساش إن علم النفس انتحرم المعالجة الكوميديية دي).

على قد ما الفيلم حاول يقدم وصف كوميدي لحالة الهلوسة، على قد ما برضه نجح إنه يشاور على سؤال يمكن مبنقدرش نقوله بشكل مباشر: لو انت عندك كبت ومش لازم يكون جنسي ممكن فكرة مردوم عليها التراب جوه عقلك يا ترى ممكن تجيلك تهيؤات أو هلوسة؟

طب يعني إيه هلوسة وهل هي حاجة حلوة ولا من اسمها كده تحس انك خلاص هتلبس القميص بالمقلوب؟!!!

واحنا صغيرين كبرنا على حدوتة "أليس في بلاد العجائب" التي كانت أليس البننت صاحبة الخيال الواسع جداً والتي بتهرب جواه لحواديت بتخرجها من حياتها المملة، كانت بتقابل مغامرات

وشخصيات شقية جداً بتملأها بالحياة والشقاوة اللي كانت
مفتقداها في حياتها العادية.

في نفس الوقت حدوتة ”أليس في بلاد العجائب“ كانت أكثر حاجة
بتميزها هي الخيالات الكثيرة عن الحاجات اللي بتصغر عن حجمها
أو بتكبر أو عن ورق الكوتشينة اللي بيتكلم ويرد على أسئلة أليس
الشقية جداً في مطاردتها للأرنب السحري.

الحدوتة اللي مكنتش ملتوتة وكانت مصدر سعادة لينا في
طفولتنا هي أبسط تجسيد للهلوسة اللذيذة المبتكرة.

مش حاجة وحشة إنك تمتلك من الخيال فقاعات تقدر تنطق فيها
ولو بشكل مؤقت علشان تقدر تحقق جوه الفقاعة بتاعتك انتصار
خيالي، مش حاجة وحشة إنك يبقى عندك القدرة الهائلة إنك تتخيل
الأشياء الجامدة جداً وكأنك بتديهم قبلة الحياة وبتشدهم معاك في
سلسلة من الحوارات علشان تلاقي إجابات لكل الأسئلة اللي بتنكش
دماغك.

مش حاجة وحشة برضه إن شوية ”هلوسة“ بتساعدك انك
تلاقي البراح اللي تقدر تسبب عقلك اللاواعي يتحرك فيه بحرية من
غير فلاتر ومن غير ما تتكتف بقميص العاقلين اللي مكتوب على
التيكت بتاعه ”عيب متقولش وغلط متسألش وانت اتجننت قاعد
تكلم المخدرات“.

تقدر تتخيل معايا اللي كتب حواديت أليس في بلاد العجائب يا
ترى كام نوبة هلوسة مرت بيه وخليته يطارد أرنب بيتكلم لمدة كام
سنة!! والأهم من ده إنه لقي ف أليس والأرنب ونوبة هلوسته مساحة

للإبداع مكنش هيوصلها لو فضل قاعد يحتسي الشاي في الشرفة مع الأصدقاء.

احتياجنا للخيال ولمساحة الـ”هلوسة“ وإعادة إخراج حياتنا في كادرات تبدو أكثر حيوية وامتلاء هو مش بس احتياج طفولي لكنه احتياج إنساني بيكبر معاك وبيلج عليك كل ما بتضيق عليك مساحة انك تعبر فيها عن دماغك من غير ما حد يزقلك بوصف أو وصم.

الهلوسة اللذيذة اللي ممكن تخلق منك كاتب حواديت مبدع مش تهيئات حسن يوسف هي هلوسة مطلوبة أوقات.

إحنا محتاجين الهلوسة؟ أه يمكن محتاجين مساحة ”نهلوس“ فيها ونكتب على بابها هنا ترقد الهلوسة، ادخل برجلك اليمين وسيب وعيك على الدواسة.

وبالمناسبة حالة الهلوسة أول ما ابتدى الناس يحطوها في الكتب مكنتش تحت كلمة الهلوسة، في القرن السادس عشر كانوا بيقولوا عليها ”العقل المتجول أو الرّحال“ لأنهم كانوا بيعتقدوا إن العقل زي الحصان في البراري محتاج ينطلق، وكل ما تحط في وشه حواجز وتلجمه كل ما بيخليه بيان إنه حصان مروض لكنه في الحقيقة بيفقد جماله الأصيل إنه بري ومتجول ورحال، ويبقى في ترويضه واستكانته أقرب لحصان الحناطير البائس.

إحنا محتاجين ”نهلوس“!! أه، يمكن لأننا كبار وبنخاف نقول اللي بيحي في دماغنا بشكل مباشر وواعي فأوقات بنط وبنلبس جلابية الجنون علشان نرفع من على روحنا الحرج، ويمكن لأن الهلوسة بتخلينا نزور عوالم (لأ مش عالمة يعني رقاصة دنيا تانية يعني)

مكناش هنقدر نروحها لو كنا رابطين الحزام على عقلنا ولجمناه
بالخطوة البطيئة للحناطير.

يمكن العقل بيحتاج يتمرد، أو بيحتاج يتمدد، وينط بره القالب
اللي اتعود عليه آه وخصوصًا لو كان العقل طبيعته كده، خلقته
كده، تركيبته كده، زي ما قال نجيب الريحاني.

احتياج العقل إنه يخطي الحواجز المرئية أو المسموعة مش
شيء سيء في مجمله، لأن لوقربنا من حياة كثير من المشاهير في المزيكا
والسينما وحتى الفيزياء هتلاقي إن القاسم المشترك من حياتهم هو
نوبات الهلوسة اللي كانوا بيشفوفوا فيها حاجات غيرهم مكنش قادر
يشوفها ولا يحسها، بس هُم قدروا يحولوا كل العالم اللي لوحدهم
حصان خيالهم وداهم ليه قدروا يحطوه على الورق ويترجموه لإبداع
في الفن والأدب والعلم.

يعني احنا بنزقك دلوقتي انك ”تهلوس“؟ أكيد لأ، وأكيد مش
عايزينك تبقى زي ستيف جوبز اللي على الرغم من عقليته الجبارة إلا
إن هوسه بفكرة الهلوسة والإنجاز اللي بيحصله لَمَّا بيخطفه حصانه
وتاخده الريح في نوبة الهلوسة خليته يوصل لمرحلة إنه بيسعى
للهلوسة بشكل متعمد.

وأكيد برضه مش قصدي إنك تستسلم لنوبة الهلوسة اللي
بتخليك تشوف نفسك سبع رجالة ف بعض وأنت مش كده وإلا
هتبقى زي دكتور خشبة اللي أقنع المريض بتاعه إن ممكن ”تهلوس“
ويردد إنه مش قصير قزعة وبكده هيصحى الصبح ويلاقي نفسه طويل
وأهبل.

يمكن فيه حد فاصل بين الخيال والهلوسة، وبين الإبداع والهلوسة من ناحية ثانية، وبين الهلوسة والهروب من الواقع.

لكن قبل ما نفصل ونرسم حدود وهمية بين قدرات العقل اللي مش بيبطل يدهشنا بقدراته وأسراره والمناطق البكر اللي لسه محدش مسها في عقلك ومستنية لحظة إلهام، هيفضل التحدي إنك فعلاً محتاج من فترة للتانية تنتابك حالة من الهلوسة اللذيذة جداً والمقبولة في بعض الأوقات وتسبب نفسك لها، ويمكن تكون من المحظوظين لو قدرت في نوبة هلوستك حصانك ياخذك لإبداع توصل فيه لأورجازم حياتك وتبدع.

لمّا تنتابك حالة الهلوسة سيب حصانك يطارد الأرنب السحري في رحلته العجائبية المدهشة بس متنساش تسجل ده.

ولو خفت من رد فعل الناس اللي حواليك، ابقى قولهم أصل أنا عندي تهيؤات واستحمل الطريقة العلاجية بكب كوابية مية سقعة، وحيث إننا في الشتا والموضوع مش محتاج التهور ده بنصحك إنك تقول دايمًا خلو بالكوا أصل أنا عندي شعرة ساعة تروح وساعة تيجي.

هااااااااااا

عاطف السُّكري.. الواد يتحب يا رمضان؟!

لمَّا كنا بنتفرج على مسرحية العيال كبرت مع أهالينا غالبًا كنا بنضحك على ضحكهم هُمَّ في القعدة العائلية اللطيفة، وكان فيه إيفهات كتير مكناش بنفهمها بس مش مهم، كنا بنتلم وبنضحك.

كبرنا مع ”العيال كبرت“ والجميل إن كل الإيفهات اللي مكناش فاهمينها بقت جزء مهم من تكويننا وكل ما فيه حته في بازل الدنيا تعصلج معانا كنا بنلاقي لها إيفيه من ”العيال كبرت“ وبنجيب أي حاجة وجعانا تثبتت أكتاف بمجرد ”إيفيه“.

وزي ما الاختبارات على الفيس بوك بتقولك يا ترى انت شخصية مين في الفيلم الفلاني، يا ترى انت كان ممكن تكون مين في كادر ”العيال كبرت؟“.

– رمضان السُّكري: الأب اللي شايف إن علاقته بولاده هي علاقة توفير الفلوس، ومن حقه إنه يلبس البيجامة الحمرا علشان يعوض اللي فاته.

حتى في مشهده لدفع الفدية هي علاقة تفاوض على فلوس مقابل أقل حد ممكن من الخسائر، والحقيقة مش عارفة المسرحية قايمة على فكرة إنقاذه واستعادته، بس استعادة إيه تحديدًا فيه لو هو بالصورة دي فمفيش بوينت من المقابحة علشانه، هياخذ لفته وهيرجع في الحلزونة.

– زينب: كريمة مختار اللي اتصبت جوه باترن الأم واكتفت إن

كادراتها السينمائية تبقى بطعم وريحة طشة الملوخية والاكسسوار الوحيد اللي بتغيره في الشخصية هو لون فوطة المطبخ.

زينب شخصية الست المصرية في جزء من حياتها، زينب تشبه أمهاتنا وعلشان كده احنا مهما بنشوفها مقللة من قيمة نفسها إلا إننا بنفضل نحيا لأن ده كادر أمهاتنا بشكل أوبآخر، مبنعرفش نزل منهم بس طول الوقت بنفضل نزغدهم ونقولهم الحياة مش مطبخ وتنفيض شقة وازاي نخرج ونسب البيت لوحده أحسن يتسرق (الجملة دي نصًا جملة أمي بكل اقتدار).

– سحر: البنت الطايشة الهامشية على حيطه الدنيا واللي مستنية أي فرصة علشان تتشعبط فيها وتثبت إنها ذات قيمة، ومعندهاش أي قدرة انها تميز معادن الناس مين الحقيقي ومين المزيف وعلشان كده أي فرصة بتيجي على بابها بتنتط وبتتشعلق في أوكرتها.

سحر الشخصية الهامشية في المسرحية في الإضحاك (غالبا بتبقى عايز تمشي الجزئية بتاعتها) وفي السرد الدرامي ممكن تختفي من الأحداث من غير ما تحس بده.

لكن سحر هو نموذج البنت اللي على الرغم من إن المسرحية صورتها لينا إنها صغيرة في السن، بس في الحياة انت ممكن تقابل ”سحر“ في أي سن وهتعرفها من فرط السذاجة اللي فيها، واللي مش بتتماشى مع عداد عمرها في الدنيا.

– كمال: نموذج المثقف الحيران لأنه ببساطة مزيف، وهو عارف إنه مزيف وعلشان كده بيحاول يتدارى ورا النظارة علشان

يضيف لنفسه شكل عميق، والشنطة السامسونيت اللي يبروح
بيها الجامعة مع إنه لسه طالب وكأنه يقول للدنيا ”خلوا بالكم أنا
المعيد القادم“.

النموذج ده أنا شفته في الحقيقة كتير جدًا بتلاقيه طالع من
الثانوية العامة بمجموع كبير ودخل كلية لا تليق بالمجموع فكأنه
بيتشعبط في وجاهة حلم انه يبقى معيد علشان يثبت لنفسه إنه غير
فاشل.

النموذج اللي بيبيص للناس من طرطوفة نضارته لأنه شايفاهم
من وجهة نظره لا يرقوا لمستواه الثقافي، واللي هو قرف منهم ومتأكد
إنه فاضي من جوه، وعلشان كده يبعد عن الناس بحيلة احتقار
انهم مش فاهمين.

النموذج اللي مش بيعرف حتى يتكلم وينقل قضيته من غير ما
يستخدم مصطلحات مجعلصة وكأنه بيستعرض معرفته اللي هي
مش هتودي جمهوره (كانوا اخواته) في حته.

هو مبيعرفش لغة الهجايس لأنه ببساطة صنع لنفسه عالم
انفصل فيه تمامًا عن العالم اللي حواليه، واللي هو فعليًا محتاجه.

النموذج ده بيحب يكمل الهالة النورانية اللي حواليه بإنه
يشتبك في معارك نضالية، وكل حاجة في حياته هي معركة حتى لو هي
معركة ”هشة“ لغاية ما بيلاقي معركة حقيقية وبدل ما يخشها بكل
تواضع بينصب نفسه ”زعيم النضال“.

النموذج ده بيفضل في انفصاله التام لغاية ما يبليس جلابية
الجماهير البيضاء وبتندي يتكلم هجايس، وده الفعل الوحيد اللي

أخده في المسرحية على فكرة هو اكتفى إنه يوعظ ويحزق على زوره
علشان الجماهير تتحرك.

كُتبت عنه كثير بس علشان قابلته كثير ولسه بشوفه.

– سلطان السُّكري: الصايغ الضايغ الفلاتي اللي هيشغل مع
أخته وهي بترقص باليه.

سلطان نموذج اللي عارف إن مفيش أي مستقبل مستنيه في
الدنيا فبيملى فراغات الوقت بإنه يتظاهر إنه بيتعلم مع إنه برضه
عارف إن العلام ده مالوش أي لزمة في الدنيا.

سلطان هو راجل الشارع اللي عارف أصحاب الكباريه والعصابة
والبيت وفاهم أقسام البوليس بيتعامل فيها ازاى، ويعرف الستات
ويعرف يخلي الستات يحسوا انهم ستات.

سلطان هو اللي بيواجه وبيأخذ موقف وبيروح ياخذ بونية
في وشه، سلطان هو اللي بيضحى بنفسه في النهاية علشان البيت
ميقعش.

سلطان لداذة طبق الكشري اللي تحبه ويبسطك ومتستغناش
عنه وتتمنى تبقى هو في حاجات ومش هو في حاجات بس بتحبه.

– عاطف السكري: أنا بحب عاطف علشان كل حاجة، علشان
الوحيد اللي قالولنا في المسرحية إنه ”فنان“ والفنان معروف
بهشاشته الإنسانية.

عاطف الطفولي المبقلظ اللي طموحاته بسيطة جداً ومش
مجعلصة، هو يشبهنا في مرحلة من حياتنا لما كنا متأكدين إننا

هنقابل الفنانين اللي بنحبهم وهيحبوا بينا وهيتهجوزونا (أينعم، أنا كنت كده).

عاطف السكري اللي كل إيفماته بتقفل معايا أي حوار بيعصلج في دماغي.

عاطف يعني:

أنا قمت الصبح بالليل.

كل ما أفكر في ستات يطلعوا رجالة.

يخلصك انت يا عاطف... آه يخلصني آه.

يا عم أنا مش مسكين ولا حاجة أنا هتجوز وأعيش على قفا سعاد حسني.

البامية يا حمارة هي اللي بيتحط عليها سكر.

عشرة ساغ إيه... دي مكتوب عليها تمانية.

والجملة اللي بتلخص حالنا في أوقات كتير "الحساسة في البساسة".

عاطف السكري هو اللي كسر أسطورة المخبرين (وبالنسبالي المخابرات والهالومة بتاعت أدهم صبري والأيام السوداء اللي بنعيشها) عاطف لخص كل ده وقالك أنا عامل زي المخبرين بالطو اسودع اللحم وبورنيطة كبيرة.

عاطف اللي بيمثلنا كلنا وهو قاعد يهز براسه وهو مش فاهم حاجة بس كعضو وفي المجلس لازم يهز دماغه.

عاطف السكري هو الطفولة المعجونة بعفوية، المعجونة
بفكرة إن كل حاجة في الدنيا إجابتها ممكن تبقى بسيطة وغير معقدة
ودي حلوتها.

أنا بحب عاطف السكري، ولو عملت اختبار أي شخصية هبقى
فيها في مسرحية العيال كبرت هكون 50% عاطف و40% سلطان
و5% كمال و5% احتمال سحرمش أوي يعني.

رغي كتير عن العيال كبرت... لإننا ببساطة بنكبر معاها.

خلي بالك من سوسو يا محسن!!

في المسرحية اللي بتقلبنا على ضهرنا من الضحك بالرغم من حفظنا لكل إيفياتها "سك على بناتك" نموذج البنت النسوية تم تقديمه في "نادية".

البنت الوسطانية اللي مش بتاخذ اهتمام كافي من أبوها الأرملة فبتخلق حياة خاصة ليها واللي بتحمل قدر متضخم من السداجة، مش بس انها بتردد مبادئ حنجورية، لكنها من الغشومية انها مع أول تجربة حقيقية ليها على أرض الواقع بتصطدم بمعطيات الواقع، وكخروج من حالة الصدمة بترجع تاني تلبس جلابية أي بنت طبيعية مسيرها للجواز، بس نقيف البضاعة (سامح) ونملي عليه شروطنا.

على الناحية الثانية كان نموذج "سوسو" اللي حتى الإسم بيوحي إنه كائن تافه متدلح مبيفكرش أبعد من تحت رجليه، لكن في الحقيقة هي النموذج الوحيد اللي قاري اللي حوالياه كويس جداً وقادري تعامل مع معطيات واقعه بجرأة وبفتحة صدر، مش بس لأن عمرها صغير ولكن لأن تجربتها في الحياة على قصرها وانفتاحها عليها خلّتها تقول لروحها "الحاجة اللي أنا عايزاها هوصلها وبطريقي".

نموذج "سوسو" في المسرحية بيتطور بشكل حلو، بشكل منفتح للحياة بكل مفرداتها بداية من الرقص ومروراً بالتعامل مع الولاد من غير كلكعة حتى لدرجة إنها بتبقى عارفة مين يكون صديقها ومين تتجوزه ومين تمثل عليه، وازاي تمرر الرسائل اللي في دماغها لأبوها من غير الصدام المباشر وبأقل الخسائر الممكنة.

مش هعرف أتكلم عن نموذج ”فوزية“ لأن كفاية اسمها يعني يخلينا نطبطب عليها مع كل ضحكة بتطلعها مننا بعفويتها أو بكوميديتها الصارخة.

النقطة الوحيدة في ”فوزية“ انها بنت الانتظار في محطات لا تجيء بالصورة اللي شايها في دماغها، فوزية تشبه بنات كتير اتربوا على ”اوعوا يا بنات حد يسقيكوا حاجة صفرة“ وأمنت بده وطبقته بالملي، وانطلب منها في لحظة معينة انها تركز كل ده على جنب ولازم تصطاد ”حنفي“، ولما برضه انصدمت صدمة تليق بسذاجتها المفردة وحياتها اللي ضاعت وهي بتتفرج على الدنيا من ورا نضارة أبوها الأكاديمي انصدمت و”رجعت بالنملية“.

وقررت في قفزة يسارية انها تلحق تعيش الحياة اللي معشتماش، والحياة بالنسبة لها كانت ”الانحراف“ النقيض الثاني اللي بيلجأ ليه البعض اللي حياتهم انسرفت منهم على حين غفلة وقرروا في لحظة يلموها بس من الأطراف كأى ملاية لازم بقى تتطبق من زاويها الحادة. وعلى الناحية الثانية نماذج ال”راجل“، واللي اتقدم في أكثر من كادر، حنفي، ودكتورر أفنت، وسامح عبشكور، وكريم.

كان بيعجبني نموذج الواد محسن علشان بمفهومنا الحالي روش ومعدوش الكوليكية إنه يحكي ل”سوسو“ على مغامراته العاطفية من غير ما يحاول يوقعها يعني.

كان بيعجبني ف رقصه وقفزته بره شباك ال”موقع“ لغاية ما الحياة ابدتت تقولنا حتى النموذج ده بيان مليون لكنه فاضي من جواه لدرجة إن كل هدف حياته إنه بس عايز ينط بره أي شباك،

أي فريم، أي خنقة، النط كهدف حتى لو كان النط هيووقعه على العصوصة.

ونموذج ”سامح“ أنا عشته وبعيشه وهتليل اتكعبل بيه تاني قريب نسألکم الصبر والسلوان والعزاء على القهوة، وعلى قد ما بيصعب عليا على قد ما ببقى كل ما بمر عليه في طرقة الكلية ببقى عايضة اقلع اللي ف رجلي واديله على دماغه و اقوله يا ابني فوق محدش ماسك عليك حاجة ولا كاسر عينك بحاجة ومش مضطر تكسر عينك علشان تبقى دكتور، وبعدين تقوم تكسر عين بقی الي تحتك.

وشخصيًا هقف عند نموذج ”كريم“، الشخص اللي بيقابل بنت وبتعجبه، مش بتعجبه علشان هي دي... لأ بتعجبه علشان هو عايزاها، يعني عايزينام معاها، ولأنه مش واضح مع نفسه هو عايزاها فبيقدر إنه يبقى شهبها، يتكلم نفس كلامها، يدافع عن نفس قضاياها حتى لو هي شخصيًا هتتخلي عن كل ده، بعدين هيعيش معاها حياة مزدوجة ومعدوش أي غضاضة في ده طالما لسه هرموناته بتنقح عليه ولسه موصلش ليها.

نموذج ”كريم“ المسرحية حاولت تجمله وتقدمه إنه قدم ليها الكلمة السحرية ”أنا هتجوزك يا نادية“ وكأن نادية كل معركتها انها في الآخر تتجوز وتتستر وعلشان كده مكنش عنده غضاضة برضه إنه يروح لوالدها ويطلبها منه وشايف إنه بيتفضل عليها بالشرف السامي.

العلاقة السحرية الموحية اللي ممكن تنتهي نهاية لطيفة وسعيدة لكل فتفوتة حلم ممكن تداعب خيالك، لكنها بتقعد

تتفشفش مع أول خلاف بينهم واللي غالبًا لو كانوا اتجوزوا كان هيقولها الجملة الشهيرة ”انتي هتقعدي تقرفينا بالكلام ليه، انتي مراتي وانتهينا“، ولو عصلجت شوية ينزل بقى بالتقيلة ”أنا بقول ده علشان بحبك“.

المسرحية اتقدمت من زمان جدًا يعني، وكل سنة تحديداً بتتعدا مع الجدول المقرر لبرامج العيد.

جيل ”سوسو“ بمعطياته هو اللي بقاله دلوقتي، بقاله وتعلم معاه ازاى الواحد يقرا معطيات الواقع، ميتفرجش عليه من برج عالي من فوق، والحقيقة انهم بيبهروني أنا شخصيًا لدرجة إني بحس لَمَّا بقابل بنت في التمانتاشر إن عندي سبعين سنة ضوئية.

جيل ”سوسو“ بيطور نفسه وبيكسب في كل خطوة وكل مغامرة ومخاطرة بتعملها أرض جديدة ومهياش عايزة تبقى مناضلة ولا حد يعمل زهيا، هي ببساطة عايزة تعيش حياتها هي، بمفرداتها هي قبل ما تتحول تبقى ”فوزية“.

السؤال نموذج ”كريم“ مش بيتطور لسه، ولاد بأعمار مختلفة بترجع تلعب على التيمة القديمة أنا منفتح، أنا واد خطير ولبلس قطنيل، أنا كينج كونج.

نفس التيمة بنفس الرتابة بنفس الغشومية بنفس المقصد انهم في النهاية بنت عجبهم وعايزينها.

نموذج ”كريم“ بكل الامتيازات اللي اتمنحت ليه من ساعة ما اتولد ليه فعليًا مش قادر يطور نفسه ويرسيه على قارة ويكون صريح مع نفسه، ليه لَمَّا بيدشوف بنت من وجهة نظره منفتحة ليه ميجبش

من الاخر ويتحمل الرفض علشان يوفر على نفسه مراحل ووقت
ووجهد بنوثة تانية أولى بيه.

ليه بيصر انه يلعب على نفس التيمة كأى ممثل بقى مشهور
وخلص ضمن جمهوره وبالتالي مش محتاج يتعب نفسه ويدور على
إيفيه جديد.

نموذج "كريم" بي طرح نفسه في الوقت اللي نموذج "سوسو"
بتطور روحها بخطوات أسرع منه، وليها هدف واضح في حياتها
"وجوده" هو جزء منها مش كلها.

المسافة بين الاتنين بتوسع لدرجة إن "سوسو" لَمَّا بتقابل
"كريم" في القرن الواحد والعشرين بتبقى عارفة من جواها وباصمة
بالعشرة إنه بيكذب، وهي مسألة وقت مش أكثر، وبتسيبه يكذب
علشان تشوف الأبدتس بتاع الهارد وير بتاعه وصل لحد فين.

ناس كتير بتعيب على البننت اللي هي "سوسو" وبتقولها انتي
عايزة إيه يعني، وأخرتك برضه هترقصي على السلم لا هتبقني تن...
ولا... تان تان.

وبنفس الصوباع اللي بيحطوه في عين البننت اللي بتحاول ومش
بتقف على نقطة واحدة وبتحاول تطور من حياتها وتجربتها، فيه في
الإيد ثلاث صوابع تانين بيشاوروا عليه هو شخصيًا وبيقولوله و انت
كمان على فكرة واقف على نص السلم ومُصّر ترقص رقصة برضه
مش على مقاس خطوتك.

مع إنك فعليًا تملك القدر الكافي من الحقوق إنك يا تنط فوق
وتعلن ده بدون ضغط شعبي ولا مجتمعي من أي اتجاه، أو برضه

تقرر تنط تحت وبرضه مش خسران لإنك هتلاقي نموذج "فوزية"
اللي قضى طول عمره مستني ومراضيته أصلاً سهلة، تذكرة أتوبيس
وتمسك إيديها بحنية وتعدبها الشارع وكله هيبقى أليسطة.

للو اقفين على نص السلم في كل حاجة، خدوا خطوة لفوق، أو
لتحت، أو خدوا خطوة على الجنب وفسحوا بقى علشان الشاشة
تفضى والجمهور يعرف يشوف كويس.

متكونوش سامح ولا محسن ولا كريم ولا رأفت ولا فوزية ولا
نادية.

بس اقفوا شوية عند "سوسو"... ومخمخوا.

حاذي في الصف يا بت يا نبجة!

أنا إني رأيت جماعة.

قولتو السلامو عليكموا، أنا إن... أنا إن... أنا إن...

فاكرين المسرحية دي بتاعت أمين الهنيدي الرائع لمَّا بيطلب من البت نبجة إنها تحاذي في الصف جنب إخواتها... أكيد فاكرينها.

المسرحية كانت قايمة على فكرة بسيطة جدًّا، فكرة الراجل البسيط اللي عنده بنات خايف عليهم بس الظروف اضطرته إنه ينزل القاهرة العامرة الغامرة بتفاصيل هو ميعرفهاش.

وصورليه عقله الفكاهي البسيط إنه لازم يحافظ على البنات في الصف، ولازم البنات تحاذي وخصوصًا البت "نبجة" علشان هي البوكورية (صوت ضحك بكر اكيح).

الحقيقة المنطق بتاع أمين الهنيدي في المسرحية مبيختلفش كتير عن المنطق اللي بنكبر عليه. وهو إن كل حاجة بتطلب مننا إننا نحاذي في الصف.

في البيت لو انت مولود في النص زي حالاتي فالمطلوب منك ببساطة جدًّا إنك تحاذي في الصف زي إخواتك الكبار.

في المدرسة أول حاجة بيعلموها للولاد الصغيرين إنهم يحاذوا في الصف ويقفوا ورا بعض وكأنهم رايعين في أول يوم مدرسة يقدموا أوراق اعتمادهم في الجهادية العسكرية.

لَمَّا بتروح مصالحة حكومية في يوم مبقع علشان تخلص أي ورقة مسيرها تبقى صفرا في بلد متكومة في دولاب صاج بيطلبوا منك برضه إنك تقف في الصف، والغريب إنك بعد ما بتقف في الصف وأخيراً تحضن الشباك بتكتشف إن دايمًا ورقك ناقص، وتضطر ترجع وتقف في الصف من أول وجديد.

حتى لَمَّا بتكبر في وطن مسروق من روحه، كل ما بتحاول تفظ... تشب... تحط... تنط... يرجع يتطلب منك إنك تقف في الصف مع ذكريات التوابيت والبيي آدمين.

بتكبر لدرجة إنك مبقتش الطفل الصغير ولا التلميذ العبيط ولا المواطن المهروس بس بتخرج للدائرة الكبيرة و انت عامل زي البت "نبجة" بتحاذي في الصف.

وبدل ما كنا بنعمل صفوف واحنا مضطرين بقينا احنا بنفسنا نرسم الخط ونوقف عليه صفوف تانية بس مش واخدين بالننا منها.

الصف ممكن يكون حاجة جميلة جدًا لو هيراعي حقوق الناس التانية آخدلي بالك انت ياللي كنت واقف في كارفور اليوم اللي فات وزنقت عليا بالكتف وأخذت مكاني في الصف.

الصف ممكن يكون حاجة عظيمة جدًا لو احنا في استعراض عسكري ومحتاجين نخبط برجلينا الشمال علشان نرهب العدو.

الصف هيبقى شيء بديع أوي لو احنا بنلعب باليه مائي مثلاً (أيون اللي بيحطوا مشبك في مراخيرهم سمعالك على فكرة) ومضطرين إن احنا نتناغم بحركة جسمنا مش بس مع المية لا كمان مع بقية اللي واقفين معنا في الصف.

كل ده ممكن يكون الصف فيه حاجة هايلة جدًا وبديعة جدًا
وحط قبل ”جداً“ اللي تحبه.

لكن لما تبقى في رحلتك الخاصة بيك انت مش حد تاني وحد
يطلب منك إنك تحاذي وتقف في الصف ده شيء عليه شخروميت
علامة استفهام.

زمان كنت بقرا جملة اسمها ”طوبى للغرباء“.

والحقيقة علشان اعترف أنا معرفش يعني إيه كلمة ”طوبى“ بس
كنت فاكرها يعني طوبة أو زلطة، يعني الغرباء هتحذفهم ونزقلهم
بالطوب.

وبعدين لما ابتديت أعود نفسي إني أحس الكلمة علشان ألاقى
معناها قولت يمكن ”طوبى للغرباء“ معناها إن الغريب بيبقى محتاج
إيد تططب عليه لأنه في غربته بيبقى تايه وحيد هش معندوش
خريطة واضحة في اللحظة اللي هو حاطط فيها صوباعه على الخريطة
دلوقتي.

الغريب شكلاً أو فكرًا أو إنسانياً أو ظروفًا، هو الشخص اللي
مبيحبش يحاذي ويقف الصف.

هو الشخص اللي بيرتاح لما بيرسم دو ايرمن الناس والاهتمامات
وبعدين يقف جواها شوية وبعدين بكامل إرادته يختار أبعد نقطة بره
الدائرة علشان يتفرج عليهم من بعيد.

الغريب هو الشخص اللي مش سهل عليه إنه يتماهى بألوان
متشبهش ألوان روحه فبيفضل يعافر علشان يكتشف البلدة اللي هو
عايزها ويمكن يوصل ويمكن ميوصلش.

الغريب هو شخص عارف إنه وحداني بشكل دائم أو مؤقت أو ربما عابر.

في الأول كان خايف من الفكرة، إنه هيطلع بره الصف وهيلاقى نفسه في الهوكدهو بعيد عن الدفا اللي كان مغطيه.

وشوية بشوية مع أول خطوة وتاني خطوة وبعديها خطوات أوسع بعيد عن الصف هيكتشف إنها مكنتش تخوف أوي كده، الخوف الحقيقي إنه خايف يقعد مع نفسه ليتفاجئ بحاجة ميعرفش يفسرها ولا يسيطر عليها.

طب ومين قال إنه لازم يسيطر، طب ما يسيب روحه تدلوق زي ما هي، ما يخلي إحساسه زي الزئبق صعب إنه يتشكل أو يتحجم أو يتمسك مهما حاولت تطارده بصوباعك.

الغريب هو شخص ناس كتير يمكن بتحب انها تتفرج عليه من بعيد، ويمكن كمان بتحبه في صمت، بس ببيخافوا يقربوا أكثر علشان غرابته بتخلهم دايماً في حالة ارتباك مش متعودين عليها، بتخلهم خايفين يا ترى الغريب المرة الجاية هيتنيل على عينه يهيب إيه، هينكش فينا أنني حته المرادي.

الغريب اللي موقوفش وحاذى في الصف، هو شخص حابب إنه يخوض رحلته في "سفينة نوح" بتاعته.

يمكن علشان سيدنا نوح خلاص مات وقبل ما يموت السفينة بتاعته هو اللي بناها ورسيت على جبل، وخلاص استقروعرف كوعه من بوعه.

يمكن علشان الأسطورة بتقول إن لكل عصر محتاجين "سفينة

نوح“ بالشكل المجازي... يمكن برضه.

ويمكن علشان... من غير علشان، هو فقط اختار إنه يطلع بره الصف، ويبطل يحاذي في كتف حد تاني... بس كده.

علشان كده لَمَّا تتكعبل بيه في الدنيا ابقى قوله: ”طوبى للغرباء“، ابقى طبطب على قلبه، مبيخوفش على فكرة، ولا بيعض، ولا هو أهبل زي البت نبجة في المسرحية.

هو حد ونسان بروحه في النقطة دي على الخريطة بتاعت البني آدمين.

لو حبيته؛ هتتعلم تفتح بوقك دهشة أو ضحك عادي يعني معظم الوقت.

لو سلمت على قلبه من بعيد ومشيت؛ هيفضل نجمة في السما تبعتك نورها وشقاوتها منين ما تكون.

لو قاومته وحاربتة وفضلت تشده معاك في الصف؛ هيفضل يتسرسب من صوابك زي حته الزيق مش هتعرف تمسكها ولا تحجمها وبرضه هتفضل تهرب منها.

حوالينا ناس، ويمكن نكون احنا مش حد تاني، متغربين جوه روحهم، غريبين باختيارهم أو بغير اختيارهم عن اللي حوالهم، كتير من اللي حوالهم شايفين إنهم مجرد البت ”نبجة“ اللي لازم تحاذي في الصف.

لَمَّا تقابلهم متعملش زي أمين الهنيدي وتقولها حاذي يا بت يا نبجة.

من باب التغيير ابقى قولهم ”طوبى للغرباء“.
بس مش طوبة، طبطبة يا فاكيك.
بس كده.

ويضيفوا عليها الزيوت والشمع كمكون أساسي علشان ينقلوا الروج من مرحلة الزينة لمرحلة إنه علاج كمان.

ومما يجدر ذكره إنهم اتطوروا في الصناعة دي لدرجة إنه يقال أن كليوباترا كانت بتعمل أنواع مخصوصة مخلوطة بالسم... فظيعة البت كليودي... هتموت الجدع مسموم ببوسة... يا لهوي ع الدماغ.

وبالنسبة للون الأحمر اللي تابع مجانص الناس اللي بيدوروا على اليوتوبيا في الساقطة واللاقطة فنحب نقول إن في عصور الظلام الوسطى من عمر الشقيقة أوروبا كان بيعتبر الروج الأحمر هو علامة مميزة للعاهرات والطبقات الدنيا اجتماعيًا، وكسرت القاعدة دي الملكة اليزابيث الأم لما حطته في محفل عام. ومن ساعتها مبقوش يقولوا كده خالص... عالم كهينة يا جدع.

في أثناء الحرب العالمية الثانية علشان كان فيه نقص شديد في الحديد وأدوات التصنيع، عملوا صوباع الروج في صوابع بلاستيكية وكمان ورق.

أيون، تخيلي عزيزتي البنوتة تروحي للبقال تقويله والنبي لفي الصوباع ده ف قرطاس يا عم... يقوم داخل غارف بايده في البرطمان ويطلعلك صوباع وعليه حته زتونة]

في الستينات كانت الستات اللي مش بتحط روج ومش بتلبس كعب عالي كان بينظر لهم المجتمع نظرة ريبة وشك وبحلقة وشوية حاجات فوق بعضها.

الخلاصة فيهم تكونش البيت هتقلب على حنفي، عزيزتي بقى اللي عايشة معانا في البكابورت اوسكتي اوسكتي مش احنا كده ممكن

نبقى فعلاً حنفي رسي نظمي فبهي، بس مش باختيارنا والله.
دعونا نحط روح... دعونا نلبس كعب... ادونا فرصتنا بقى يا
كفنة.

فيه معلومات كتير مرتبطة بالروح وازاي الحركات النسوية
بتستخدمه علشان توصل رسايل لمجتمعها.

إحنا برضه بنستخدمه علشان نوصل رسايل وكده.

والنبي إيه، قومي امسحي اللي انتي حاطاها في وشك ده يا بت.

خلاصة الرغي ده كله، أنا بحب الروح الأحمر، واللي هيقولك إيه
اللي انتي حاطاه ده روصيله المعلومات دي.

ولو فضل عايش على قيد الحياة ومسورقش منك ابقى بوسيه
وحطيه جنب الحيطه.

العالم دي غلابة والله.

والسلام ختام.

الله

الوطن

الحياة وحبها وحب اللي يحبها

والروح الأحمر.

بطلوا تقيفوا شعري على مزاجكم!

فيلم ”هذا هو الحب“.

ماري منيب كانت رايحة تخطب لابنها يحيى شاهين بنت الجيران اللي هي لبني عبد العزيز، وف قعدة الصالون المفتخرة ابنتت تمارس الطقوس الحمواتية في اكتشاف ثروات العروسة المستخبية، وقامت بشد شعر لبني عبد العزيز العرورة علشان تتأكد إن شعرها حقيقي مش باروكة وطبعاً دلوقتي مش بوستيج ولا خصلات متركبة.

أنا مش هتكلم عن جوازة الصالونات والحموات الفاتنات علشان اللي بياكل على ضرسه بيوجع ضرسه برضه، مالناش فيه ولا في بوقه بس هتكلم عن شد شعر البننت من خلال تجربة قصيرة بين الحجاب وعدمه.

الحقيقة إني لو تخيلت إني قدام بنت نص راسها متغطية والنص الثاني بشعرها وهي واقفة على مسرح وفيه جمهور هنلاقي من الجمهور اللي ببص على شعرها وعنده أفكار مش هنصنفها ولا هنقولها بصوت عالي هنسيها تتحنجل في دماغنا رايح جاي.

وجزاء برضه من الجمهور ببص على حجابها وبرضه عنده أفكار أخت الأفكار المتحنجلة اللي فوق ممكن تبقى ماشية معاها أنكجيه وممكن تكون ماشية في اتجاه معاكس تماماً.

البننت اللي بتتولد في مجتمع عنده قدرة غير عادية على فرز الناس بناءً على علامات جسدية أو هدمومية بتبقى هي البننت اللي

واقفة قدامنا على المسرح دلوقتي.

احنا ممكن نقعد نهري ونغلي في الأفكار اللي بتدور في دماغ الجمهور وندي ده بنبوناية والتاني اللي مش هيعجبنا نديه شلوت، بس محدش بيفكر يسمع الصوت اللي جوه دماغ البننت.

البننت اللي نص منها بيكبر إنهم بتعمل الحاجة الصح لَمَّا بتتجنب. البننت اللي نص منها بيكون متطمئن بفكرة إنها ”مستورة“ ومتشالة لى يقدرها.

البننت اللي نص منها بيكون شايف إن ده كان تطور طبيعي في اتجاه إني بقرب من ربنا وكل شوية أبص للسما وأقول يا ترى انت راضي عني ولا لسه، وبنفضل في رحلة الجري والرضا لغاية يا نتعب فنقف عند النقطة دي، أو نعيد ترتيب فكرة الجري ذاتها علشان تتحول لمسارات تانية.

البننت اللي ممكن تكون تم إجبارها إنها تلبس الحجاب، الإيجبار اللي ممكن جدًا يكون بالعنف وممكن برضه يكون بالحُب.

إنتي شكلك أحلى... الله ينور عليكى... وشك نور... ربنا يهديكى أكثر (مش عارفة اكرتيعني ايه وايه مؤشراتها يعني).

إنتي كده كبرتى في نظري (طبعًا ده صوت رجالي بيعمل صدى في الخلفية) هي نفس العبارات بنفس القوة، قوة الضرب أو قوة الإيجبار أو قوة القهر أو قوة هو كده وهتسمعي الكلام احنا هنتفاوض في كلام ربنا.

مع إن كل كلام ربنا ينفع يتم التفاوض فيه على فكرة بس بنيجي

عند دي وتبقى خلاص قفلت زي الدومنة.

البننت اللي من كتر قبح كل تفاصيل الحياة حوالها قررت إنها ترسم لنفسها دايرة وهمية من الحماية وتقنع روحها إنها لَمَّا بتخطي جوه الدايرة دي مش هتبقى مستباحة من الآخرين، مع إنها بأقل مجهود هتعرف إن لو الآخرين ببذلوا نفس المجهود علشان يتفهموا خوفها من المشي في الشارع عمرهم ما هيتعاملوا معاها إنها مستباحة.

ولو بذلت برضه شوية مجهود هتعرف إن الدواير الوهمية عمرها ما بتحمينا، أوقات بتخوفنا أكثر لإنها بتحسسنا بالعجز، بالضعف وإننا مش قادرين نقف لوحدينا من غير دواير وهم في مواجهة الغلط والقبح.

البننت اللي قررت تتحجب لأي سبب كان فوق هي لوحدها يخصصها سبب حجابها سواء كان بيحمل لها انتصار إيماني... إنساني... شخصي... أو بيحمل برضه انكسار إيماني... مجتمعي... إنساني... شخصي.

لأي منهما انتصارًا أو انكسار هو يخصصها، الفعل "يخصني" متعودناش عليه لإننا اتعودنا إننا نبقي مستباحين، مجرد وجودنا على مسرح الحياة بيدي الحق للأخر العابر على خشبة المسرح إنه يستبيح ويبيح كل ما هو "خاص" جدًا.

البننت اللي بتتحجب تصدقوا إنها برضه المجتمع بيمارس عليها نفس فعل شد الشعر بتاع ماري منيب في الفيلم اللي قلناه فوق.

أينعم، لأن البننت اللي بتتحجب البعض بيستبيح إنه يشد شعرها

علشان يتأكد إن شعرها حلو وإنها مش لابسة الطرحة علشان تخبي قلة اهتمامها بشعرها مثلاً.

البنّت اللي بتتجيب البعض بيبيص لها إنها خدامة، ايوة ودي سمعتها خبط لزق شلوت طابير حاير عابر للقارات علشان بس البنات في الأرياف همّ اللي كانوا بيغطوا نص شعرهم وهمّ رايعين الغيط.

البنّت اللي بتتجيب بتتوصم وسط مجتمع الفيمينيست إنها مضحوك عليها وإنها مش فاهمة يا حرام وبكرة نبقى نشتريلها اتنين كيلو حرية علشان تتحررو وتكسر قيودها وتتخلص من سيطرة المجتمع الذكوري وقهره وتنطلق نحو آفاق من الحرية... (اوعى الصاروخ بقى)

البنّت اللي بتتجيب بيتشد شعرها لمّا دايمًا تتوصم إنها مش مهتمية بأنوثتها أو إنها بتستسهل أي حاجة في أي وقت وخلص. إيه اللي حصل.

اللي حصل إن البنّت اللي قررت إنها تغطي شعرها أو هكذا افتكرت إنها قررت ولو اني صعب جدًا أي حد يقرر في جوشد الشعر ده، ابتدت تعمل ميكانيزمات دفاعية أكثر، زي إنها تشتري طرحة غالية جدًا علشان ميتقالش عليها فلاحه.

ابتدت تهتم باكسسوارتها جدًا علشان برضه يبقى الحجاب محرمهاش من جزئية إنها بتحب الزينة.

ابتدت تهتم بلبسها بشكل مبالغ فيه أوقات كثير، وأوقات أكثر كان اللبس مبمبمشيش على فكرة الحجاب ذاتها والتغطية وبالتالي كنا بنحس إنها زي لوحه الموزياك من كل حاجة حتة.

البنّت ابنتت تهتم بشعرها أكثر، وبلاحظ في الصالون إن المحجبات موجودين لأنهم عايزين يبصوا على شعرهم حتى لوشوية كده قدام المراية.

ابنتت يبقى لها تجمعات نسائية جدًا بتتحول فيها الستات لكائنات فضائية لأنهم ببساطة عايزين يروحوا للصورة على أبعد نقطة على الخط علشان يشوفوا نفسهم زي الصور الذهنية الكثير اللي رايحة وجاية قدام عنيم.

ونذكر على سبيل المثال وليس الحصر الحنة اللي بتسبق أي فرح اتحولت إنها بتبقى عروض نسائية لكل ما تتخيله وما لا تتخيله، لأنها الفرصة اليتيمة اللي بيمنحها المجتمع الحزين إنها تمارس أنوثتها الطاغية الباغية.

طب لو أنا ماليش في الأفورة، طب لو أنا ماليش في الجو الحريمي لاني مش عارفة المفروض بيتجمعوا ليه غير علشان شوية يرقصوا والشوية التانين يسقفوا، طب أنا هبقى فين وسطهم!!!!

طب لو أنا مليش ارتباط الأنوثة بفعل مواسم، هتلاقوني قاعدة على جنب بتفرج وبتسم ابتسامة إي تي وهو نازل أول مرة على كوكب الأرض.

النص الأول في شد الشعر... أي وجعتي.

النص الثاني، اللي مش محجبة فمي عادة مستباحة إنها تكون الأكثر سهولة وجرأة وتحرر، وبالتالي أوقات ده بيخلها مستباحة أكثر وأوقات لأ.

البنّت اللي مش محجبة ابتدى المجتمع يشد شعرها وبتبقى

المجتمع اللي بيشد شعر البنت علشان يقولها أصل انتي
مستباحة لو انتي بشعرك.

المجتمع الللي بيفضل يشد شعر بناته محجبة أو مش محجبة،
مؤدبة أو مش مؤدبة.

محترمة... مش...

زوجة... مش...

متربية... مش...

وبين الشد بتاع كل الصفات والوصم والوشم، وبين الصفات
التانية الموجودة على الشاطيء ”مش“.

بيطلع عندنا بنت علشان تاخذ قرار ”يخصها“ وحط تحت فعل
يخصها سبعميت ألف وشخروميت خط بتفضل تتشد بين هنا وبين
هناك.

بين بنت و اقفة على المسرح نص بشعرها ونص بحجاب.

بين فكرة هنا وفكرة هناك، بين حياتها في مرحلة وحياتها في
مرحلة تانية.

الشد مبيكونش من بره المجتمع، الشد بيكون جوه البنت نفسها
لإنها بكل اللي كبرت بيه هي كبرت جوه المجتمع ده، ومحاولتها للخروج
عنه أو الانتماء ليه مش لازم تكون مصحوبة بكل شد الشعرده، لأنه
ببساطة حاجة ”تخصها“.

إفتح الصفحة و اكتب عندك الجملة دي

... يخصني.

واكتبي كل الحاجات اللي انتي شايفة إنها ممكن تملئ النقط
علشان هي حياة "تخصنا" مش حد تاني.

وبطلوا بقى تشدوا شعري، بطلوا تبقوا ماري منيب، هي كانت
بتضحكنا، لكن انتوا كمجتمعات بتخنقونا وبتضيفوا تعاسة
مكنتش نقصاكم بصراحة.

زوجتك ابنتي البكر!!

في أنني مرحلة من مراحل دحرجة الكون على زوحيقة دماغ أم دي بشرية تم تفسير كلمة ”بكر“ إنه مصطلح خاص بالبنيات فقط، ومفاده إن عندها حنة من جسدها موجودة يعني ومتشالة ومتصانة لغاية ما يبجي الفارس الهومام و اتدحرج واجري يا رمان.

إزاي تم اختصار معنى ”البكارة“ في جزء من الجسد وإزاي الست نفسها قبلت إنها تخش في ”الأسورة“ دي بمزاجها وشايفة إن ده تكريم لها.

إزاي قدروا يقنعوها وهُمَ بيبنوها إن ده تكريم علشان يتأكدوا إنها لم تمارس الخطيئة بدون موافقتهم ورضاهم ووجودهم كشهود عيان على الحدث.

إزاي بلغت القدرة بالمجتمعات إنها توصل بيها درجة من الفُجر إنها تحشر مناخيرها في كلوات أفرادها لمجرد إنهم اتولدوا مش مخيرين فيها.

إزاي معنى البكارة اللي من وجهة نظري الشخصية اللي ملهاش أي لزمة في الجزمة أنا عارفة وسمعاك يالي بتقولي نقطينا بسوكاتك... ماشي ماشي، إزاي معنى الكلمة نفسه تم التلاعب بيه.

البكر متهياي هو معنى ”أنك لا تعرف كل ما لا تعرف عنه شيء“. فانت توصيفك إنك ”بكر“.

قيس على ده بقى علم جديد، مكان جديد، حُب جديد، أكل

جديد، ناس جديدة.

حتى الجنة بتخيلها ”بكر“، لأنك لا تملك معرفة عنها بشكل يقيني
غير اللي بترسمه من خيالات تخصصك انت مش حد تاني.

إزاي معنى البكارة اتدرج على الزوحليقة ووصل للحنة دي في
الجسد ده.

مين أول واحد صاحب السبق -الله يجحمه مطرح ما راح- اللي
افتكس الافتكاسة دي، والغريب مش إنه افتكس افتكاسة، الغريب
إن الناس نفسهم ابتدوا يتلقفوها ورا بعض يقيناً منهم إنهم بيحموا
بناتهم.

بيحموا بناتهم ولأ بيحموا صورتهم قصاد نفسهم إن استحالة
الخطيئة تعدي من قصاد عيننا إلا بموافقتنا ومباركتنا، وإن
ال”ختم“ لازم يكون بمعرفتنا.

من إمتى البشر لازم يكون عليهم ”ختم“ علشان يكونوا أحسن
وأفضل وأنقى.

من إمتى البشر لازم يكون عليهم ”علامة“ علشان سوقهم
وسعرهم يعلى في السوق.

من إمتى البشر لازم يكون فيه بكارة تميزهم غير بكارة روحهم
وقدرتهم إنهم يمنحوا الدهشة لكل اللي بيتواصلوا معاهم مش بس
جسد، روح وعقل وحياة باكملها، التفاصيل في الحياة اللي دائماً
بتخليك تقول لروحك أنا لسه بكر، أنا لسه عندي شغف إنني اعرف
واتعلم واجرب.

لماضه مصريه جدا _____

من إمتي صحيح حصل الشلوت الهايل ده في البشرية، والناس
عادي مبسوطه بيه وبتعبده وفاكرة إن ده تكريم.

من إمتي بقى!!!!

وشم

لمَّا رشدي أباطة في فيلم تمرحنة راح راسم البت تمرحنة على صدره علشان يوثق قصة حبه ليها ولمَّا خانته البت تمرراح جايب زونفل (الممثل اللي مش عارفة اسمه) وراح شال الوشم بمية النار، ومعرفناش هو انكوى من مية النار ولا انكوى من إحساس الغدر والخيانة أكثر.

ساعتها ابتديت اتعلم عن الوشم، عن الحدوتة اللي بتترسم على الجسم.

زي ما بنرسم في البورتريهات والصفحات البيضاء، البعض بيشفوف إن صفحة جسمه ممكن تكون مساحة لإنه يوصل حدوتة شخصية بيه هو.

الوشم اللي موجود في القرى هو للحسد أو لمنعه بمعنى أصح، الناس بتتوشم علشان مصدقة إنهم قاعدين باصين على بعض وحاسدين بعض فلما تيجي تبصلي بعين ردية يقوم إيه الوشم يكسر شعاع الحسد اللي هيفلق الحجرده.

وبصراحة أنا لغاية دلوقتي مش قادرة أفهم هي المجتمعات البسيطة دي يا ترى موشومة بالتدين الفطري ولا لسه عايشة في مية الأناس، ولا هم ملحدين بس مش واخدين بالهم لأنهم في أوقات بيؤمنوا بيه كقوة عليا وخاصة في لحظات البؤس اللي مبتفارقهمش وفي معظم سلوكياتهم مؤمنين بكل حاجة إلَّا هو... ما علينا.

الوشم اللي موجود في المجتمعات الأكثر انفتاحًا مساحةً أو فكرًا بيكون علشان يوصل رسالة "تمرد" على القوانين السلطوية اللي بتدخل حتى في جسمك وبتشوف إن من حقها شكله يكون إيه، وتقولك انت تعمل فيه إيه بالضبط، وعلشان كده أول حاجة بيعملها المراهق في المجتمعات المنفتحة المفتوحة دي إنه "يوشم" نفسه علشان يطلع لسانه لقوانين المجتمع الأبوي ده.

الوشم في الخليج أنا شفته ليه معاني الزينة لدرجة إن الستات بتموت بعضهم في الصالون علشان تعمل رسومات الحنا، واستحالة تروحي فرح متلاقيش الوشومات رايحة جاية، واللي بشوفها إنها بدون معنى حقيقي، مفهاش قصة، مجرد زينة على الإيد والرجل على الفاضي، بيحاولوا يداروا بصخب الرسم "خواء" المعنى في أي حاجة بيعملوها... أهي عادة لازم نمشي عليها.

اللي مهتم ممكن يستمتع بقراءة تاريخ الوشم في الحضارات القديمة وحواديته، وهيلاقي حاجات مبهرة بصراحة تقولك يا ترى المجتمعات البدائية لَمَّا بتتطور الوشم بياخذ أنهي شكل معاها.

طيب الرغي ده هيودينا على فين!

إن الوشم اللي بيترسم حدوته على الجسم، بعض المجتمعات بتستحدث "أوشام" تانية توشم وتوصم بيها الناس في مجتمعاتها وبتستحدث آليات فرز جديدة علشان تخليهم مميزين.

أنا مش هقول ايه، أنا هسيب كل واحد يركب حصان خياله ويدور على الـ"وشم" في ممارستنا اليومية.

وهتلاقي إن كلنا بنقع في الغلط اللا إرادي التصنيفي التعمدي

الواشم لتصرفات الغير.

الوشم والوصم اللي بنلاقيه في خانة البطاقة. الوشم والوصم اللي بنلاقيه في طريقة الزي. الوشم والوصم اللي بنلاقيه وانت مينين من بحري ولا من الصعيد. الوشم والوصم اللي بنلاقيه وانت كلية ايه بقى يا ترى. الوشم والوصم اللي بنلاقيه في الحالة الاجتماعية.

الوشم والوصم اللي بنلاقيه في ...

مش هقول... كملوا انتوا بقى.

ودوروا على الوشم اللي ممكن جدًا يكون حالة زينة مبهجة أو حالة تمرد عارضة، وممكن برضه يكون حالة وصم عجيبة بنفضل نفتت بها الكيان الإنساني لغاية ما نفصل "إنسان" يشهنا إحنا ويشبه ال"وشم" اللي على صدرنا علشان نبقى زي رشدي أباطة في الفيلم.

شوية يحطه وشوية يشيله بمية النار

وبرضه دي وجهة نظر... موشومة.

وظهر مصطلح (Loose Women) واللي والنبي ما عارفة
أترجمها ازاي، بس الولية المفكوكة، يعني الولية اللي عايزة تيين
الحاجات فأكيد حتمًا ولا بد عايزة قلة أدب (ده هُم اللي قالوا مش
أنا).

وزاد إدعاء الأخلاق والفضيلة بين سيدات الطبقة الراقية
لدرجة إنهم ابتدوا يصنفوا إن اللي مبتلبسش نوع جيد من المشدات
هي أكيد إما إنها ممثلة أو عاهرة أو أي سيدة تحت مسمى سيء
السمعة.

والعملية سخنت منهم لدرجة إن ارتداء المشد أصبح هو
الطريقة التسويقية الجديدة لتقديم صورة المرأة الراقية ذات
الأخلاق الحميدة، وتم إعطاؤها ختم أنها الأصح للزواج.

وتم تطوير قطعة القماش لتتحول من كورسيه لغاية ما وصلت
بقت حمالة الصدر بشكلها الاعتيادي، وده في مطلع القرن السادس
عشر.

ومما يجدر ذكره أن قدماء المصريين مكنوش بيلبسوا برا أصلًا،
واخطف رجلك سريعًا للمتحف المصري هتلاقي التماثيل سوليطي
موليطي.

في سنة 1968م قامت مجموعة من الناشطات النسويات
المدافعات من حقوق المرأة بالتجمهر أمام منصة تتويج ملكة جمال
الولايات المتحدة الأمريكية للإعلان عن رفضهم كل ما "يسلع" المرأة
يعني يخلها سلعة وكده، واتفقن على أن تكون حركتهم الاحتجاجية
هي نزع حمالة الصدر وإحراقها في مكان التجمهر لإرسال رسالة رمزية

للجمهور إن مفيش حاجة هتقيدنا تاني يا مني.

ومن هنا اتولدت الأسطورة إن الناشطات في العمل النسوي
بيحرقوا البرا بتاعهم وده غلط أصلاً وبره السياق... بره الفصل يا
كلب.

تم إجراء دراسات عديدة عن هل ارتداء حمالة الصدر يؤثر على
صحة المرأة سلباً أو إيجاباً؟

ولم يتم التوصل إلى نتائج مؤكدة بهذا الصدد، لكن اللي توصلت
ليه كتير من السيدات في القرن الحالي في عالم آخرمش بتاعنا أصلاً
إن ارتداء حمالة الصدر يجب أن يكون اختيار المرأة نفسها تختار
تلبسها أو لا.

فكرة الاختيار بدون أن يصاحب اختيارها بالموافقة أو الرفض
أي نوع من لوي عنق الدراسات العلمية للانتصار لإجابات مسبقة
وبدون أن يتم إصدار أحكام أخلاقية سلباً أو إيجاباً على المرأة ذاتها.
وبمناسبة انتهاء حدوتة حمالة الصدر واني شايفاكم نتمم،
الحدوتة دي مش بتفكركم بحاجة في مجتمعاتنا الفشيخة؟

مش هجاوب لكن هسيب كلمات تنكش في دماغنا.

حتة قماش... اتطورت... أحكام أخلاقية... قيد... اختيار... حق
الست انها تقرر... احترام الحق ده.

وعلى الهامش، أنا سعيدة إنني قاعدة أقرا وبكتب في التاريخ
الاجتماعي عن تطور الملابس الداخلية.

أنا الفرخة وانتو الكتاكيت

دي مش أغنية طفولية بنصحى عليها ونروح المدرسة، دي كانت سياسة مدير اشتغلت معاه لمدة ثلاث سنين في مشروع عظيم كده ومهيب وليه شنة ورنه وشوية حاجات فوق بعض.

المدير ده كان مقتنع تمامًا بسياسة إن الشغل هو أشبه بالكرتونة اللي بيقف بها أي بياع وفيها شوية كتاكيت ملونة.

واحنا طبعًا الكتاكيت، بس هو بيشتري الكرتونة باللي فيها، مش علشان يفرج عليهم العيال في البيت، هو بيشتري الكرتونة علشان يمارس سياسته الإدارية اللي هتخطم نظريات علم النفس وعلم الإدارة وأي علم هيبجي في وشه.

الكتاكيت والكرتونة، بيحجب ورقة كرتون ويعملها كأنها الضلع الرابع في الكرتونة (هي ضلع وهي لأنه هو اللي عاملها) وبيزق الكتاكيت في حته من الكرتونة بالضلع الوهي ده وبيسيب مكان فاضي.

هو بقى واقف يتفرج بره الكرتونة على اللي بيحصل جواها، مرة يضحك من منظر الكتاكيت وهي بتعض بعض في منقارها، ومرة يتدخل بشكل مباشر لولقى الكتاكيت قررت تشيل حد فوق راسها علشان يحكيلهم إيه اللي شايفينه من ورا حدود الكرتونة.

وطريقته دي كانت هايلة الحقيقة لإن محدش من الكتاكيت كان عنده طاقة ولا وقت ولا مناهدة إنه يسأل ”هو المشروع بتاعنا

ده بببيع إيه؟ وإيه الاستراتيجية بتاعتنا أصلاً؟“ محدش كان عنده خُلق يحاسبه، هو أنا فيا حيل أصلاً، كفاية عليا معارك الكتاكيت جوه الكرتونة.

والمدير الهمام كل شوية يحرك الضلع الرابع الوهي والمكان يضيع على الكتاكيت فاللعبة تحلو أكثر وهو يستمخ بالمشاهدة من كرسيه أكثر.

أنا اشتغلت معاه شوية سنين كده كنت لسه ورور وعطشانة إني أتعلم من كل موجة بتيجي تخبط على بيتنا.

الوصف الوظيفي بتاعي كان ”كتكوت شغيل احتمالي المنفعة في المستقبل“.

ودي ترجمتها: ”عندي مهارة مش موجودة عنده وهيحتاج لها في التشريفات الرسمية والاستقبالات“.

وبالتالي كان موقعي على حافة الكرتونة، لَمَّا تيجي التشريفة بطلع بره الكرتونة وبشوف دنيا تانية مختلفة تمامًا، والنكتة إني بشوفه هو شخصيًا مجرد كتكوت في كرتونة تانية.

وأوقات كان بيصعب عليا وأوقات كنت بقول يستاهل خليه يدوق، لكنه لَمَّا كان بيدوق كان بيرجع بغيظ أكبر وإلحاح أكبر إنه يحرك الضلع الوهي في كرتونته الأصلية.

لَمَّا تنتهي التشريفة بارجع لصفوف الكتاكيت أتعاركلي عركتين واتهرسلي هرستين واشوط في اللي يجي ف سكتي و اتشاط برضه، ولَمَّا تقرب معاد التشريفة أتمع واطلع اشم نفسي بره الكرتونة شوية

وارجع.

المشكلة إن كل مرة كنت برجع فيها الكرتونة كنت برجع بأفكار جديدة.

اللي بشوفه بره الكرتونة بيفتح عنيا ودماعي وروحي على حياة مختلفة عن الحياة جوه الكرتونة خاااالص.

اللي كنت بشوفه بره الكرتونة كان ببسلك سلك سماعة دماغي الملعبك والحرارة بتدب فيه، وفجأة بلاقي الصوت الضايح وبفضل اقول ألو... ألو... ألو... لسه فيه حد عايش على الخط.

المشكلة مش إن الهوا بره الكرتونة ببسطلني، لكن طول ما أنا بره الكرتونة قاعدة اكلم نفسي عن الكتاكيت اللي جوه الكرتونة، ولما أشوفهم أحكيلهم على اللي شفته وهنعمل إيه.

طول ما أنا بره الكرتونة كنت عارفة إني هرجع تاني للكرتونة، هي مسألة وقت مش أكثر معرفش دي حاجة حلوة ولا فقيرة كاختياري اني "اتكتكت".

لما كنت برجع الكرتونة (وغالبًا كنت بختار أسوأ توقيت ضيق أرجع فيه)، كنت بشوف الحجم الضيق والمساحات المنتهكة وبفضل أحكي لبقية الكتاكيت عن اللي شفته براها، ببسبوني يومين ويقولوا هتاخذ فورتها وتهبط، ولما مبيحصلش بببتدوا يشدونني في عركاتهم اليومية علشان الحيطه بتقرب منهم والمكان بيضيق ويمكن أنا اهبط شوية.

استمر المشروع كذا سنة لغاية ما في يوم صحينا ولقينا المشروع بح.

الكتاكيت فجأة لقوا أنفسهم من غير كرتونة.

أنا كنت عارفة إن الكرتونة دي فيستك أصلاً، فبقيت اجري
وابرطع واتشقلب زي أي مهرج عاشق للدنيا والحياة من غير أربع
أضلاع أو أكثر.

وببص ورايا لقيت زمايلي الكتاكيت كتير مشبكة رجلها في بعض
وفعلياً مش عارفة تتحرك ونسيت ازاي أصلاً المشي بره الكرتونة.

كان عندهم حالة من الهلع لدرجة إنهم في لحظة افتقدوا
الـ”كرتونة“، على الأقل كنا عارفين بنعمل إيه جواها لكن دلوقتي
احنا حتى مش عارفين نمشي (ده كان كلامهم).

المدير بتاعنا غاب فترة كده، واتكعبت فيه من يومين، يااااااااا
إزيك يا كتكت، إنتي لسه زي ما انتي وعنيكي بتلمع؟

وحواديت تشيلنا وحواديت تحطنا وهو اللي حكالي سياسته عن
الكرتونة والكتاكيت، وحكينا في كل حاجة من أول طقطق لغاية
سلاموعليكو.

ولمّا كان بيقفش عنيا وهي مندهشة يعني بيحكيلي الكلام ده
ليه، ألاقيه بيكمل على سؤال أنا مسألتوش بس هو عارفه ”ليه أنا؟“.

وكانت إجابته: ”انتي قلبك نضيف يليق بكتكوت، انتي هبلة
لدرجة انك مش مخوفاني منك حتى لو انتي كتكوت، بس مهم انك
تفضلي موجودة في الكرتونة بتاعتي، انتي بتكملي الحتة اللي محدش
هيعرف يمثلها في الكتاكيت التانيين، انتي مصدقة اللي بتقوليه ومهم
يبقى عندنا كتكوت عنده الموهبة دي، وبعدين متنسيش انك عندك
الموهبة القديمة اللي هتسندني في التشريفات“.

يلا نبتدي شغل إمتي؟

قولتله أنا زمان كنت لسه سايبة نفسي مع الموجة وكنت عايزة
أفنجل عنيا واشوف، بس أنا دلوقتي شفت ومش عايزة... فعلاً مش
عايزة.

قالي هتخسري، وهتفضلي طول عمرك المتبقي ليكي تخسري.
وبخسر إني بلاقي نفسي كتير كتكوت مبلول وحيد في نص طرق
مش عارف آخرتها هتروح على فين.

وبخسر لإني أوقات لَمَّا بتنكسر روجي وبقول وانا ليه مبقتش
كتكوت لا طلع ولا شاف ولا عرف وكان آخره ننقر في مناقير بعض.

وبخسر لَمَّا بتلف السنين وبتقابل وبلاقي الأقسام ارتفعوا
ومتشالين على الأعناق، ويحملوا لقب ”الخبير والاستشاري والعالم
ببواطن الأمور“ وفلاشات الكاميرات عليهم وانا بقعد بتفرج على
علمهم الغزير الطافح من بالوعة الميكروفونات.

أنا زي ما قالي مديري السابق بخسرفي عركة الكتاكيه وبجمالة
الخسارة، بتلفت حواليا لقيت الكتاكيه اللي كنت بحاول ارجعهم
في كل مرة أول ما رجع المدير جريوا عليه وتقريباً هُم اللي كانوا شايلين
الكرتونه على دماغهم وبيجروا ناحيته مبسوطين. أنا فعلاً شايفاهم
مبسوطين انهم هيرجعوا تاني للكرتونه.

طيب وأنا...

ولا حاجة هفضل كتكوت ”وحيد“، اختار المرة دي يبقى بره
الكرتونه.

واختار ”يخسر“، واختار يتفرج على الكتاكيت والكرتونة والمدير
بيعيد نفس لعبته القديمة.

واختار يتبت في الحطة النضيفة الهبلة اللي جوه قلبه لتتوه منه
وسط الكراتين والكتاكيت والحواديت اللي مش بتمل من إنها تعيد
نفسها بنفس الممثلين وبنفس الديكور وبنفس الأداء الرخم البطيء.
إختار ”يرفض“ كفعل ”كتكوتي“ للمقاومة، مش علشان خاطر
حد، ولا علشان أي مكسب يبان من بعيد أو من قريب، بس علشان
هي كده.

معرفشي يقبل ومش قادر يرجع تاني لنفس ال”كرتونة“.

ال”كتكوت“ مش قادر يرجع مع إن التنشين عليه أسهل ما يكون
طول ما هو ماشي لوحده براها.

أقل زلطة ممكن تجيب داغه، بس اهو مكمل في البراح العشوائي
يمكن ينسوه.

ويمكن الكتاكيت لو صحيووا في يوم وملقوش الكرتونة يلاقوا حد
يضموا عليه.

ويمكن يموت ويتعفن مكانه، ومحدث برضه ياخذ باله...
كتكوت وراح.

كل اليمكنات ممكنة، بس اللي ممكن جداً والحقيقي جداً واللي
حصل إنه ”اختار“.

بس كده

بي. إس:

الحدوتة حدثت بالفعل، بس برضه ميمنعش إن أي تشابه في أحداث الحدوتة في الواقع أو أي إسقاط من أي نوع ماليش دعوة بيه، كل واحد وحالته الكتكوتية وكرتونتته اللي ماشي جواها.

هذا وقد لزم التنويه.

يعني إيه خبرة؟

يقولك فلان ده "خبرة"، فانت تفظ ف دماغك راجل أوست كبار في السن مثلاً واشتغل في الحتة دي وقت من عمره، فراحوا رصوا السنين فوق بعضها وبالتالي هي دي الخبرة.

بس الحقيقة إن الخبرة مش هي انك ترص السنين، اللي هي بدورها مجرد رقم أجوف خالي من المعنى، إلا إذا انت -وش حد بيزغدك في كتفك عشان تصحصح- حطيت على السنين دي معنى وابتديت تسأل نفسك: يعني إيه خبرة؟

الطفل الصغنتت في أول مرة يحط صوابينه الصغنتتين في كويس الكهربي رامي ورا ظهره كل زعيق أمه اللي بيخرم الحيطان، لكنه مش بيوقف رغبتة في الكشف والاكتشاف عن العالم السري اللي ورا الخروم.

بالنسبale الخروم السوداء هي مكان مثير جداً للاكتشاف، ولازم انتصر عليه بالطريقة اللي أعرفها.

الخروم السوداء بالنسبale هي ثقوب سودا لسه ميعرفش عنها حاجة ولسه مفيش بيانات دخلت دماغه هو، بطريقته هو، مش بزعيق أو بطريقة حد تاني عنها فبيستجيب وبيحط صوابينه وع البركة بيعمل إززز.

الغريب إن نفس الطفل مع نفس الفيشة مع نفس الخروم مع نفس الصوابين اللي عايزين يتاكلوا أكل، بيفضل يكررنفس عملية

الكشف والانتصار على الثقوب السودا، بس في المرات الثانية ممكن يكون لأسباب مختلفة، مش علشان هي مجهولة بالنسباليه، لكن عشان يعاند الست دي أمي في أول خناقة علشان يثبت ”لأبقى أنا كمان عندي صواب ورأي وقرارات“.

ومع الوقت بتتكون مع الطفل اللي تابع قلب اللي خلفوه في رحلته الطبيعية جدًا، إنه يكبر ويأخذ كل حاجة حواليه بالحضن وبالصوابعين عشان يكتشفها، هو لسه بيحاول يكونله ”خبرة“ عن العالم الكبير ده، النور أوي ده اللي مختلف عن العالم، اللي الكهربا كانت قاطعة فيه، لإن مفيش كشافات في رحم أمه.

وهو بيحجز نسخته من باكيديج الـ ”خبرة“ جزء كبير منها بيتكون من التريبيطات والوصلات اللي بيقدمهاله أي حد أطول منه وأكبر منه، زي مثلاً زعيق أمه أو ضرهها ليه كل ما بيعمل محاولاته الكشفية في أدغال الفيش، أو يمكن ”وجعه“ هو الشخصي لَمَّا بينور مكان أي لمبة موفرة للطاقة، ويعمل إزز.

وبيكبر وبيخش الدنيا بباكيديج خبرة مليون أسلاك ووصلات كهربية متعشقة في بعضها زي سلك التليفون الملعبك، بس بتبدي بزعيق القربين منه، إوعى تعمل كده ليحصلك والعوياكلك مثلاً.

أو حاطط فيها التاتش بتاعه هو الشخصي من كوكتيل مشاعر مش فاهمها، لكنها هي اللي بتخلي بعض السلوك جوة لمبة روحه أحمر، يعني مو اقف قابلة لتفجير مشاعر غضب وضيق أو حروق جسدية ونفسية مش سهل يتعافي منها.

أو سلوك جوة نفس ذات اللمبة وجنب نفس ذات السلك الأولاني

سميكة جدًا من الـ”يقين“ إنه فاهم كل حاجة وعارف كل حاجة، وأصلاً كل الهري والغلي ده عدى عليّ قبل كده، وأنا بقى البُورَم اللي فاهم الفول واللي زرعه.

والغريب أكثر إنه بالرغم من كل ادعاءات الـ”خبرة“ وكل هطل الـ”يقين“ لكنه برضو بيقابل ثقوب سودا في فيشة على حيطه مو اقف الحياة، وبتلاقيه برضو بيحط نفسه مش بس صوابعينه وبيعمل إززرز.

طب ليه الرغي ده برضه؟!

علشان الخبرة من وجهة نظري مش معناها إنك بقيت في المربع ده فترة طويلة من الزمن، فبقيت واد خبرة يعني (وبالمناسبة، مش عارفة ليه لَمَّا بيتقال البنت دي خبرة لازم يبقى معناها قبيح، غالبًا كل حاجة بتتقال على البنت بتبقى أوبح، يعني ما علينا)، البقاء في الأماكن الثابتة فترات طويلة بيفقذك القدرة على الاندهاش بثقوب الفيشة الموجودة على الحيطه لأنك ابتديت تعرفها وتربط أسلاك جوة روحك مرتبطة بيها.

الخبرة هي قدرتك إنك ترسم رحلة لنفسك بتكون قادر فيها على اللي بيسموه ”Authentic Learning“ يعني تعلم حقيقي.

هو فيه تعليم حقيقي وتعليم مضروب؟ أه ممكن جدًا، التعليم الحقيقي هو اللي انت روحك نفسها بتنضرب في الخلاط، وبتقدر على الرغم من إن التجربة بتتعلق بيك انت إلا إنك تنسلخ كده زي فروة الخروف منها، وترجع خطوتين لورا وتبص على نفسك جوة المعجنة وتبتدي تعمل أهم مهمة من وجهة نظري للإنسان على الكوكب

البائس ده إنه يعمل (Learn, unlearn and relearn).

ودي يعني إيه يا ولاد (أصلاً زمانكوا نمتوا ومش مكملين قراية، بس ولو أنا هكمل رغي).

يعني رحلة التعلم الحقيقي اللي بيكون فيها الإنسان قادر إنه يبص على السلوك الحمرا والخضرا (اللي هي اتكونت واتوصلت وادت أهميتها من مواقف حياته)، ويعرفها كويس أوي، وبعدين يبتدي يفككها، يفكك كل التريبطات مع الحاجات اللي كانت بتستجلب له الحزن، وده الاغلب، أو اللي بتخليه يخبط على بيبان الفرح ويعيد تركيبها في ثقوب سودة في فيشة جديدة على حيطه لسه قادرة إنها تهره، برغم عمره الرقبي اللي بيوحى إن عنده خبرات، لكنه في الحقيقة معندوش تعلم حقيقي.

لمّا تيجوا في الإنترنتويات تسألوا الناس عن الخبرة بلاش تنهروا بالسنين، انهروا بقدرتهم إنهم يجاوبوا على سؤال ”إنت اتعلمت إيه في مشوار حياتك؟ وإيه اللمبات اللي إنت بنفسك نورتها؟“.

لمّا تيجوا تقابلوا ناس في حياتكم بيفكروكم بناس تانية أو بباكيدج خبرات تانية، قبل ما تلجؤوا لأكسل حيلة على وش الأرض وهي انك تعمل نفسك فكيك وبُورَم وفاهم، إدي نفسك فرصة إنك تفهم الأسلاك جوة روحك، والأشخاص الجداد يا ترى ليه ارتبطوا بالأسلاك سواء الحمرا أو الخضرا.

لمّا تقابلوا ناس في حياتكم اتعلموا بمنطق الطفل اللي لسه الخروم السوداء في الفيشة قادرة إنها تثير فضوله لرحلة الكشف، مش بس لهم، له هو/ هي شخصيًا.

لَمَّا تيجوا تبصوا على موقف معين بلاش تبصوا عليه بعين الخبير
الإستراتيجي اللي هيجيبلك بقى من تحت الحوض، وعرضوا دماغكم
ومتكشكشوهاش إنكم تتعلموا، وتفكوا حتة البازل اللي كانت واقفة
في الزور، وتتولدوا من أول وجديد مع كل خبرة تعلم حقيقي.

الطفل لَمَّا طلع من رحم أمه في أول مرة كان بيصرخ في وشنا،
لإننا طردناه من الـ”جنة“ اللي يعرفها.

لكنه مش عارف إن فيه ”جنة“ تانية مستنياه اسمها رحلة تعلمه
هو الحقيقي، وإنه يكون ”خبرة“ حياة حقيقية تبقى على قد بصمة
روحه هو مش حد تاني.

بس كده.

وصباحو ولادات للحياة لكن مش بتقول واء واء، لكننا بتوعدنا
برحلة للـ”جنة“ تستحق إنك تحجز فيها أول واحد ومفيهاش سواق
غيرك إنت.

أليس في بلاد العجائب اللي بقى كل همها إنها متقعش وهي ماشية على طرف الحيطه، ونسيت إنها تبص من موقعها الاستراتيجي فوق الحيطه المزعومه يمكن تلاقي مكان تنط عليه.

واذا خلصت من فكرة الـ”حيطان“ في الموروث الدماغي السلوكي في المجتمع الأسمنتي ده تخش على البيبان.

”الباب اللي يجيلك منه الريح سده واستريح“.

طب مش يمكن لمّا تفتحه يبقى على الأقل كسرت رهبة الخوف من اللي وراه، وليك يا سيدي أجر المجتهد إن أصاب أو أخطأ، بتقفل البيبان ليه يا عدو البيبان.

حيطان... حيطان... حيطان... حيطان.

المجتمعات اللي بتقدس الـ”حيطان“ شكلاً ومعنى وعمقاً.

الـ”حيطان“ اللي بتحد من الرؤية. الـ”حيطان“ اللي بتقفل عليك مية ونور ونفس. الـ”حيطان“ اللي بتفضل تقنعك بـ”خليك في اللي جوه الحيطه ومالكشي دعوة باللي براها أحسن ياكلك العوووووو“.

الـ”حيطان“ اللي بنضيع عمر واحنا عمالين نعلمها ونعلمها، واحنا فاكرين إن احنا بنحمي روحنا الشفافة الرقراقة، طب بنحميها من إيه؟ مش مهم تعرف بس أكيد يعني ورا الحيطه فيه أبو رجل مسلوخة...

الحيطان اللي بتختصر وبتختزل حياتنا ومفهومنا عن المناطق الأمانة اللي بنضطر نبلع حبوب الشجاعة علشان نغادرها ونقاومها ونتغلب عليها مع إنها أصلاً مش موجودة ولا تستحق المعاناة دي كلها.

الحقيقة يعني إن احنا بنبني حيطان وبنبني معاها سجون بإيدينا
بتمنعنا إن احنا نشوف الحياة بزوايا أخرى ونبص على مدد الشوف
يمكن لَمَّا نهدها نلاقي فعلاً أبورجل مسلوخة، مش يمكن يطلع كائن
متوحش مُسلي ورجله اتسلخت في ظروف قدرية هو مالوش ذنب فيها.

هو مجرد جزء من توليفة الأسطورة، ويمكن برضه يطلع كائن
بينفخ ناروهيشوشحك... وماله... متقنعينش إن قعدتك ورا الحيطان
متدفي مطورتش عندك أي أسلوب من أساليب الفرز والمقاومة
والتغيير ومواجهة الخطر أو الوحوش، إيه مطورتش... حبيب ماما
انت والله... خليك قاعد.

في لحظة بتكتشف إن الحياة اللي انت بنيتها وعلتها مكنتش
أكثر من حيطان في دماغك انت وبس، وطبعاً جزء كبير من الطوب
اللي فيها اتبني واتحط بإيدين فواعلية محترفين من المجتمع والناس
والدين وانا وانت ورقصني يا جدع على مونه ونص.

بس اللي ينفع يتقال إن ممكن جداً تعيش حياتك من غير حيطان
محتاجة تتزق، ولا بيبان محتاجة تتفتح لأنها أصلاً مش موجودة.

برطم عليها التعويذة السحرية وقولها ”بخ“ أو ”أبرا كادابرا“
وهتلاقها في لحظة بخ فنيتو.

حتى الثقوب الموجودة في الحيطه وعشنا واحنا في محاولات
عقيمة علشان نسدها، وهي في حقيقة الأمر ثقوب خواء أينعم، بس
هي نوع الثقوب اللي موجودة علشان يتسلل منها الضي.

الثقوب الموجودة في جدران روحنا هي مساحات لكي يتسلل منها
إحساس إننا غير مكتملين.

نحاول جاهدين أن نكتمل بالأشخاص والأشياء والأوطان
ولحظات البهجة المسروقة من عمر الزمن.

لكننا لا نكتمل. ومفيش داعي أصلاً نكتمل. إحنا غير مكتملين.
ومش هنكتمل.

وكفاية محاولات لسد الثقوب أو تلصيمها، أو نجيب عليها شوية
أسمنت ومونة ونسدها على الآخر.

هي ثقوب مرسومة ومنحوتة بإبرة الوجد لندرك أننا عبثاً... لن
نكتمل.

لا تسد ثقوب ولا تبني حيطان، وكفاية إن احنا عايشين نبني في
حيطان هي صدقاً غير موجودة غير في ذهنك.

خدي اللي يحبك... هيوای؟!

خدي اللي يحبك ومتاخدیش اللي بتحبیه.

أمهاتنا كانوا بيقولونا النصيحة الذهبية للحياة الهنية علشان تعيشي مرتاحة يا شلبية.

والحقيقة أنا بستغرب من النصائح الأنانية أوي دي، حتى لو كانت مغلفة بحسن نية، ولمّا تيجي تسألهم يردوا عليك بثقة: ”ما انتي لو أخذتي اللي بتحبیه هيتحكم فيكي وهيمرطك“.

مش عارفة أنني نوع من الخبرات مرت عليهم في حياتهم هم شخصياً أو سمعوها في حياة العابرين وخلصهم يقعدوا مع بعضهم في قعدة صفا كده ويتفقوا إن دي نصيحة مهمة جداً في اختيار شكل وطعم ولون الحياة المستقبلية ويكحرتوها لبعض على مر الأزمنة.

واللي مستغربة منه إن البنات نفسهم بيردوها بثقة منقطعة النظير في دور مبكر انهم يمسكوا الراية بتاعت أمهاتهم.

ليه اللي بيحبك ليه أسبقية الحجز والتوصيل السريع الي القلب، مع إن احتمال وارد جداً إن اللي بيحبك انتي متجهوش، أيون، إيه ذنبه بقى إنه يبقى ف علاقة هو حاسس فيها إنه مش محبوب كفاية، وارتباطك بيه مجرد استخسار ”قوماشة حلوة“ نزلت في موسم التخفيضات.

ليه اللي بتحبیه دايمًا رهان خاسر ومصحوب بحالة من الترقب وطرطأة الودن على الحيطه علشان أكيد هتفشلي، أصل اختياراتك

هتبقى غلط (إيه ده إهدي).

علموا ولادكم إنهم ميقعدوش في الاختيارات الثنائية للحياة، يا تن تن، يا تان تان.

علموهم إن فيه طريق تالت عايز تشمير دراعات أكثر لإنه من كتر ندرته مبقاش موجود ولا مذكور على كراسة الشروط.

علموهم انهم بس يختاروا، يختاروا أي شكل في الارتباط يكونوا فيه ويلتزموا بده.

علموهم انهم يحبوا ويتحبوا ويقدرّوا علاقة ثنائية محتاجة مشاعر رايح جاي من الاتنين ومحتاجة تروي من مية قلوبهم وعقولهم.

علموهم إن المشاعر مش حاجة وحشة ولا مخجلة ولا تتداری.

علموهم إن حتى الحُب فيه أنانية، بس بنتعلم نكسرّها شوية لمّا بنط في جزم اللي قدامنا وبننتخيل إنهم من حقهم هُمّ كمان يكونوا محبوبين ومرغوبين ووجودهم في حياتنا مش مجرد سدّ خانة، وجودهم بيعمل حالة ونس وصفًا وكدر ولخبطة وكوكتيل مشاعر يستحق يتعاش.

علموهم إن تجاربنا حتى احنا الشخصية فيها حاجات كتير اتقالت، وفيها حاجات أكثر متقالتش فيسمعوها ويفلتروها ويدخلوها خلاط روحهم هُمّ، وينقوا ببوصلة دماغهم اللي ينفع في حياتهم، واللي يتباس ويتحط جنب الحيط.

علموهم إن الحياة والحُب والناس كيميا مش لازم يبقى ليهم

لماضية مصرية جدا _____

باترون واحد والكل يتفصل عليه، لأن احنا نفسنا مقاسات روحنا
بتتغير.

ودماغنا بتكبر إنها تخش في فائلة أي أفكار مش على مقاسنا.

علموهم يختاروا واحترموا اختيارهم اللي ممكن جداً يكون
اختيار مكنش موجود في السؤال أصلاً.

علموهم يجاوبوا أسئلة الحياة بطريقتهم علشان مفهانش إجابة
نموذجية.

إجابة نموذجية

في سلاح التلميذ والمعاصر كان دائماً فيه سكشن من ورا اسمه الإجابات النموذجية والتي غالباً معظمنا كان يفتحه الأول قبل ما يبتيدي يحل. أنا شخصياً كنت بتضايق جداً لما بابا يخبي السكشن دوت في محاولته البائسة إني أحل لوحدي. الحيلة دي كنا بنعملها علشان نقيف الإجابة على السؤال... (لا داعي للتصفيق ع النصيحة أوفر دوز).

بنكبر شوية وبنخش في بلاعة الثانوية العامة وبتتصطدم عليها كل طموحاتنا وخططنا اللودعية في الحياة، وبنفتكر إن العيب كان في الأسئلة اللي جاية من بره الكتاب، كنت دائماً بسأل نفسي لما أسمع تصحيح الثانوية العامة هم بيعملوا إزاي «إجابة نموذجية» علشان يقدرنا يصححوا عليها كل العبقرية اللي دلقناها في الورق. بنكبر أكثر وبنللم روحنا من فشل الثانوية العامة وبنخش في معترك الحياة، أه هي معترك عشان بتتعرض جواه يا حلو وبتتعارك وبتتعجن في الخلط.

بتكتشف إنك بالرغم من إنك بقيت كبير وأهبل، قصدي كبير ومش بتمتحن ولا حد بيسألك أي أسئلة، إلا أن الإجابة النموذجية بقت محوطاك في كل حاجة... كل حاجة:

– أبوك وأمك... متوقعين منك إنك الابن أو البنت النموذجية، يعني اللي ينفع يتقيف في صناديق توقعاتهم وأوقات أحلامهم هم الشخصية اللي مقدروش يحققوها.

– الشغل متوقع منك إنك تكون الموظف المثالي، وطبعاً ده معناه

الموظف اللي عليه العين والحاجب علشان عايزينه، بس كمان شوية يلا نشوطه ونجيب حد تاني علشان يلبس سلطانية فخر أداء الشغل.

– الحب والعلاقات والجواز، يمكن أوقات بنراوغ في الإجابات النموذجية المتعلقة بهم، بس محدش يقدر ينكر إننا بنخشهم وكل واحد لابس جزمة ضيقة في دماغه علشان عايز يلاقي حاجة محددة أو صورة اترسمت في عقله هو وهو قاعد الساعة اتنين بالليل في ليلة شتوية بيحاول يفهم هو إيه اللي جابه هنا.

مش قادرة أحدد ليه الإنسان بيدور على إجابة نموذجية للأسئلة اللي بتننطط في دماغه، وليه لازم يوصل، والوصول يكون لشيء نموذجي. النموذج بالنسبة ليا هو «اتفاق» أو عقد على أن إجابة معينة نفعت تجاوب على سؤال معين في وقت معين مع ناس معينين. إزاي بنستخدم نفس الإجابة دي مرة ورا الثانية في مكان تاني ومع ناس تانيين في ظروف أكيد مختلفة.

مع كل مرة بقفش نفسي فيها – ما أنا كمان أوقات الحمار الأصيل جوه مني بينهق – بدور على الإجابات النموذجية، بقفش حتة من روجي بتبقى عايزة ترتاح أو تريح شوية قبل ما ترجه تتمرجح في حلزونة الأسئلة اللي ملقتلهاش إجابة لحد دلوقتي.

على قد ما أنا بحب الأسئلة وبشوف إنها نقطة البداية في أي مشوار هتقرر تمشيه علشان تفهم روحك ودماغك وتلاقي لنفسك مكان على خريطة عالم أوسع ومتغير، إلا أني ابتديت أفهم إن أوقات مش بنستحمل نمشي من غير إجابة. السؤال في بدايته بيكون شقي ولذيذ وحرش كده، زي إنك تتأمل في السما وتسال هي ليه الشمس

لسه فيه حاجة قادرة تزغزغ روحنا وتخليها تتحرك أبعد من الركود والذبول والموت ببطء. لو عايز رأيي، مع أن محدش طلبه بس أنا هتطوع وأقوله، مش محتاج تمشي في الدنيا غير بشنطة فاضية، ممكن مرة تعبها بشوية أسئلة، بس حاسب لتعبها بأصنام شوية، شوية كده هتجوع وهتاكلها وهتضحك على نفسك إنك كنت فاكروحك خلاص وصلت للحكمة المكتوبة على مؤخرة نملة ماشية تحت حجر في غابات أفريقيا.

نظرية البطيخة

المجتمع اعتمد على فكرة التطبيل على البطيخة كنوع من الاحتراف الخفي في معرفة هل هي قرعة ولا حمرة.

التطبيل على البطيخة هي فتفوتة صغنتتة من ملامح القرية اللي بناخذها معانا، ومفهوم الفلاح الفصيح اللي بنشيله في البوجة واحنا رايعين المدينة، واللي لو هي مدينة بحق مش هتعترف بفكرة التطبيل على البطيخة لأن المفروض البطيخ كله هيتم إنتاجه بأدوات الحدائة بما يقلل من نسبة الحصول على بطيخة قرعة بكل طريقة ممكنة، وبحيث يصبح المستهلك غير مجبر على التطبيل على البطيخة (إيه اللي بقوله ده، ما علينا).

التطبيل على البطيخة كملح من ملامح الحياة الزراعية اللي لازم نعرف إن احنا مش بنتخلص منها أصبح نظرية في الحياة في حد ذاتها.

يعني المجتمعات اللي واقفة في النص بين القرية وبين المدينة في صورتها الحديثة ابدتت تحط التاتش بتاعتها على نظرية البطيخة. وبقي عندنا المفهوم بتاع ”الجوازى البطيخة“ في إشارة انك استحالة تعرف يا ترى هتطلع قرعة ولا حمرا.

والغريب إن المثل مش حقيقي وإن النظرية فشك، وإن أكثر الناس اللي بتغادر مجتمعاتها وبتعيش في مجتمعات تانية بس للأسف العرق الفلاحي الأصيل لسه متأصل في خلايا دماغهم بتلاقيهم

بيستخدموه.

الجواز ممكن يكون محطة زي محطة اختيارك للكلية أو عمالك أو تغيير محل إقامتك و اتخاذك قرار معين بالسفر أو شراء استثمار معين.

انت ممكن تحط مؤشرات معينة على هل هيطلع بطيخة قرعة ولا حمرا؟

وإذا حتى بنتكلم عن طبيعة إنسانية متغيرة وصعب إنه يتاخذ ليا لقطة في موقف واحد ويتم تعميمه.

فبرضه ده هيرجعنا يا ترى المؤشرات اللي انت حطيتها لنجاح البطيخة قصدي الخطوة كانت حقيقية ولا انت أوهمت نفسك إنها حقيقية وبعد شوية لمّا شقيت البطيخة بالنص طلعت مش كده، فبدل ما تواجه روحك إنك محتاج تراجع ليستة مؤشراتك كان الحل الأسهل إن احنا نشاور على البطيخة العجيبة السحرية اللي على الرغم من إننا طبلنا عليها... بس برضه طلعت قرعة.

في لحظة من الحياة مهم انك تحترم الجمجمة المتمركزة بثبات بين كتافك، ومهم انك تقول لروحك إني أغفلت عن عمد مؤشر هام في البطيخة.

”مرونة العلاقات الانسانية“:

إلي أي مدى بنكون على قدر مهم من المرونة في التعايش، ويا ترى تفسيرك إيه عن المرونة؟

وهنا لازم يطالعك المثل القروي برضه ”أنا بطنش علشان

المركب تمشي“.

المركب هتمشي ده صحيح بس مش هتروح أبعد من النقطة اللي هي واقفة فيها واحتمال بعد شوية تغرق زي تيتانك مع إنك كنت مراهن عليها انها هتبقى سفينة نوح.

المرونة في العلاقات الإنسانية إنك بتسبب مساحة لشريكك إنه يتغير من غير ما تحسسه انك مصدوم من التغيير اللي حصله أو حصلها.

المرونة في العلاقات الإنسانية إنك تكون عارف إيه أبعد نقطة ممكن توصلها فضولاً، وإيه النقطة اللي بترجع تتمركز عندها.

المرونة في العلاقات الإنسانية إنك تتوقع البدايل وإذا مكنش فيه بدايل فمهم انك تتعلم إزاي تزق كتف وتعمل لنفسك بدايل، ومحدث بيقول إن الحياة سهلة ولأهتفضل تاكلك بالمعلقة، ممكن تكبربقى ونسيب حضن ماما... ده لو عايزين.

المرونة في العلاقات الإنسانية إنك تتعلم انك تتحمل جزء من الفشل والخطأ زي ما بتتصدر المشهد في صورة النجاح والفرح ولحظات الحب الأولى.

المرونة في العلاقات الإنسانية إنك تتعود تقول اللي انت عايزه لشريك حياتك بشكل واضح، واللف والدوران اللي بتمنحه لينا الحياة على غير إرادتنا مهم إنه يترك على جنب إذا كنت بتدور على لحظة من التعري الصادق أو شراكة إنسانية حقيقية مع بني آدم مش مع مخدة زي ما راجل ياباني أخرما زهق راح اتجوز المخدة بتاعته.

يمكن الكلام اللي بيتقال ده كلام نظري.

ممکن جداً، بس حاولوا وانتوا بتطبلوا على البطيخة علشان
تكتشفوا يا ترى هي قرعة ولا حمرا حاولوا تسألوا روحكم يا ترى احنا
عندنا مرونة الأستك في التطور والتغيير في العلاقة الإنسانية؟

ولاً الأستك هرودلدل خلاص ولو شديته دلوقتي راح يلسعني؟

استمروا في التطبيل على البطيخة، بس متزعلوش لو طلعت
قرعة، لإنكم كنتم بتطبلوا على كورشكم وعقولكم انتوا الخاوية.

طبلوا بقى... استمروا.

فين رمضان بتاع زمااااااااان!!

أنا بسأل برضه بس مش نفس السؤال أنا بسأل أسئلة تانية زي:
يعني إيه رمضان بتاع زمان؟ زمن الصحابة والرسول ولأ زمن أمهاتنا
وأمهاتنا المصحوب بتهيدة عميقة؟ وبسأل برضه إيه المطلوب يعني
بعد ما نقعد ننكش بملقاط على رمضان بتاع زمان؟

طب اللي معاشي زمان ومش عايزينجر معاكوا في زوحليقة الزمن
اللي بتوديكون لورا يعمل إيه؟ طيب ويروح فين ويبيجي منين؟

مفيش أسوأ من توقيت تواجدك على خارطة الإنسانية في
زمان ومكان بيعاني من الإفلاس الشديد لدرجة إن كل ما يتم إنتاجه
وتصديره والاحتفاء بيه هو "زمان".

مع إن ممكن جدًا إن يكون الزمان اللي بيتم تأليهه وتقديسه مش
بالجمال ولا بالحلاوة ولا بالقطقة اللي بيتم تصويرها.

هي مجرد حالة غيبوبة لخلق فقاعة وهم يسهل التعاطي معها
والذوبان فيها، فبتلاقي نفسك فعليًا بتحن لحاجة أنت متعرفهاش
وحتى لو كنت عاصرتها بالسن متكنش بنفس حدة التأثير اللي بتدعيها
حالة الحنين الجارف المميته للزمان دي.

لمّا تسأل أي حد يعني إيه رمضان؟ هتلاقيه بيقولك إجابات
نموذجية معظمها كادرات من فيلم "عسل أسود"، واللي هي يعني
اللمة ع الفطار والجار المسيحي بيدي للمسلم طبق مهلبية والتاني
يحطله فيه قطايف، وممكن تلاقي إجابات عن فوازير فطوطة ونيللي

وشيريهان.

ممكن تلاقي حزب "البهجة" بيدور على البهجة بمقاط في
الفوانيس.

محدث بيحجر على ذكريات الشخص الفردية وكادر حياته
اللي بيعيشه في رمضان واللي ممكن جدًا ميكونش بالملائكية ولا
النورانية ولا البهجة العارمة دي، لأن رمضان في جوهره يعني بقى لو
هنتكلم هومش المفروض يكون شخص بهجة، أيون هو شهر تكدير
وتهذيب وإصلاح، ودي مفردات مبتجيش بهجة نهائي يعني، بس انتوا
مش بتحبوا تسمعوا كده.

أن تتحول حالة الحنين الجارف إلي كادر هلامي ثابت واحد
وبيفرض نفسه عن رمضان دي حالة تعدي صارخة على المساحات
الفردية وتحويلها إلي حالة "رمضنة" عامة بتطول الذكريات وبقت
تتعدي ده لإعلانات بتاجر حتى بشوية الذكريات اللي كنا شايلينها في
شكمجية الزمن.

البعض ممكن يشوف إن ده شيء لطيف ومبهج ومثير للشجون،
لكنه مثير للقرع من ناحية ثانية لأنك فعليًا مبقتش تملك من
حاضرک أي حاجة وبقيت عامل زي اللي طلع على المعاش وهو لسه
شباب وقاعد يكرفي دايرة الزمن ويفتكر أيام زمان، ودي حالة معروفة
يعني اسمها "الإفلاس الإنساني الشديد".

الإفلاس اللي مش بس بيشاور بصوابه العشرة إن مبقاش
فيه تراكمية وتصاعدية في البناء الإنساني لدرجة إن يكون لديك ما
تمتلكه حاليًا لتناوله وتوصيفه ومنحه لي هيحي بعدك واللي هيحن

بدوره للزمان.

تقدر تقولي هتمنحهم إيه غير إنك هتقولهم مكنتش فاضي والله
أنا كنت عايش محبوس في قمقم اللي قبلي ملحقتش أدحرجلكم
حاجة تفتكروها غير الإفلاس والخيبة.

ومن ناحية ثانية بيعيشك في نفس الأجواء الأسطورية المحتاجة
تفكيك وتكسير وتمزيع لأخر فتلة في النسيج المهترئ، واللي بتليق
بأسرة مصرية مغتربة عايشة في الخليج ونازلة تقضي شهرين الأجازة
فبتدور على مصر اللي في الكتالوج الموجود في دماغها، واللي مش
بالضرورة على الإطلاق يكون هو واقع الحياة اليومي المعاش في
كيان هلامي كبير اسمه الحياة في المحروسة.

متقدرش تمسكه علشان هيهوق منك، لكن في نفس الوقت
محاولات تحزيمه وتأطيره في صورة تتعلق في الصالون المذهب
والناس تقعد تحتها تنهد على "مصر الحلوة ورمضان الجميل بتاع
زمان" وده بقى شيء خارج الزمن الحالي وخارج أي محاولة إنك حتى
تفكر احنا هنسيب إيه للي بعدينا يفتكروننا بيه.

كفاية بقر بقى!!

في تقرير يحمل سمة الطرافة بقدرما يحمل قفزة ثورية في عالم الزراعة، قدمت الي بي سي في مايو 2015م وصفًا عن استحداث نظام تكنولوجي تتمكن من خلاله البقر من حلب أنفسهم!

النظام الجديد ييقدم نفسه في صور متتالية من البقرات السمان ويتم زراعة شريحة إلكترونية تحت الجلد، وتبدأ البقرات في التحرك وفقًا للشريحة اللي يمكن اعتبارها ”بطاقة هوية“ للبقرة تمكها من حجز مكان في مسارات محددة لكي يتم حلبها.

يعتمد النظام على تحديد ”هوية“ الأبقار من خلال الشريحة الإلكترونية لتحديد كمية اللبن التي يتم إدرارها، وبالتالي اعتبارها ”أوفر الأبقار حظًا“ والأولى بالرعاية الغذائية والصحية فيما بعد.

يذهب التصميم الذكي إلى مستوى سريالي من الطرافة الغير مستبعدة للتحقق على أرض الواقع حين يشير أن بإمكان إدخال خاصية تكنولوجية فيما إذا أثارت البقرة شغبًا أثناء عملية الحلب، أو كما ذكر تسببت بالمتاعب فسيتم إرسال رسالة نصية للمزارع الذي تم توصيفه بأنه ”ولي أمر البقرة“.

على الرغم من أن التقرير أثار جدلاً بين المدافعين عن حقوق ”الأبقار“ في كل من بريطانيا وهولندا وأستراليا واعتبار التكنولوجيا تتعدى على ما تم وصفه بالرادع الإنساني للممارسة اليومية، فإن نفس التقرير قد يثير جدلاً لا يقل أهمية عن مشهد الأبقار السمان المتراصات بمحاذاة إحداهن الأخرى في انتظار الحلب على جانب آخر

من العالم.

انطلقت منذ قليل صافرة "مارثون الثانوية العامة" في جمهورية مصر العربية، إمتلأت صفحات الأخبار بأسماء وصور شباب وفتيات ملتصق بهم نسبة مئوية تمثل قيمة ما تم تحقيقه من إنجاز في تلك الموقعة التي تصنفها الثقافة المصرية بأنها معركة "مصرية" فارقة. عزيزي اللي مستني نتيجة أفضل وأسخف وأحط اختراع اسمه "تنسيق الثانوية العامة" اسمحلي أقولك:

إذا كان البقر في الخبر أعلاه مستني دوره في انتظار تطبيق التكنولوجيا عليه علشان نعرف مين البقرة العفريته اللي هتدينا إنتاج أكثر، إنت متخلفش عن البقرة بطلة التقرير كثير.

عزيزي القارئ قبل ما تجهز ليستة الشتايم وتتهمني إني بقتل الأمل الأخضر الورور في القلوب الخضرا الورورة برضه في الزمن الأخضر الورور إشمعنا هو يعني اللي مش هيخضر، أحب أعرفك بنفسي محسوبتك "بقرة" سابقة ابتدت عملية التسمين لها من أولى ابتدائي من خلال الحشو والتدفيس في صفحات كثير.

وأكاد أقسم بـ"حوافري" العشرين إني مش فاكرة منهم أي كلمة غير نشيد الأبجدية الإنجليزي اللي ارتبط في تعلي بشكل شرطي بالمزيكا والفساتين الملونة والحفلات الغنائية في نهاية العام الدراسي.

عملية تسميني كبقرة استمرت لحد مرحلة الثانوية العامة واللي الأستك اتشد فيها لأقصى مدى ممكن أشبه بحالة الطواريء في أوقات الحروب.

والحمد لله عدينا وجبنا خرطوم المية وفسيناه في الحيطه المنيعه وعبرنا بمجموع يليق ببقره مطيعة بتسمع كلام صاحبها وبتاكل كل ال”برسيم“ اللي بيتقدم لها وبتمضغه وبتهمضمه كويس وبتعيد إنتاجه في شكل إجابات شافية كافية وافية في أوراق الامتحانات زي ما سؤال ”البرسيم“ نص بالظبط.

وتم المراد وال”بقره“ يمكن صورتها مطلعتش مع أوائل ”البقر“ لكنها قدرت تلعب في شريحة البقر المتميز اللي كان بينه وبين الدرجة النهائية اللي مفيش حد في أي نظام تعليمي مطلوب منه يحققها أصلاً ولكنه يا للهول كان فاضل على الحلوتكة.

ك”بقره“ سابقة خليني أقولك إن الأربعين خانة اللي بتملاهم في التنسيق واللي غالباً هتجيلك منهم الرغبة (32) في جواب مسوكر على باب بيتكم، مش هُم دول قيمتك في الحياة، ولا النسبة المئوية اللي وصلتلها هي دي أهميتك، وبلاش تخليها ملتصقة بيك وكأنها جزء أصيل في هويتك اللي لسه بتحسس طريقها علشان تثبت وجودك كإنسان مش ك”مجموع طالعه راس بني آدم“.

خليني أقولك إنك هتخوض حوارات مالهاش لزمة عن الاختيار البرستيحي للكليات والاختيار الجغرافي للأمنيات والاختيار الجندي للتخصصات والاختيار الكلاسيكي ”أومال مين هيشيل اسم العيلة ومين هيفتح العيادة من بعدي“ (صوت برطمة داخلية انا عايزة افتح كشك أصلاً)، والاختيار النفسي لإشباع رغبات الوالدين اللي مقدروش يحققوها لروحهم في عمرهم فقرروا يخلفوا كائنات شبيهة بهم مهمتها إنها تدعك الفانوس وترجع بالزمن أكثر من ثلاثين سنة علشان تنكش الحياة في شكمجية أحلام الوالدين.

ك”بقرة“ سابقة خليني أقولك إنك عزيزي الحامل للشريحة الإلكترونية اللي مش متشافة ومزروعة تحت جلدك هيتم دفعك دفع علشان تمشي في مسارات محددة سابقًا على عكس رغبتك الحقيقية. هتقف في طابور طويل ملتحم مع باقي ”البقر“ وهتشارك الإحساس الغريب المصحوب بالسؤال البديهي هو أنا ليه مينفعش أدرس اللي بحبه واشتغل اللي بحبه برضه واكمل حياتي بعمل الحاجات اللي بحبها من غير ما اتخانق في الأفراد أو في ”نظام حلب البقرة“.

هتفضل تتحرك على حسب ذبذبات الشريحة اللي بتشدك بقوة المغناطيس لنهاية المسار علشان تلاقي نفسك بتأخذ ”ختم“ الشفخانة جامعة كذا.

هتخش الجامعة اللي لو صادفت إنها رغبتك فانت هتكون معروف في السنة الأولى في اليوم الأول من أول شعاع أ هو اللي شايف روحه أو روحها ”البقرة المقدسة“ اللي قربوا يقدمولها القرابين للعبادة، وإذا كان قرار التنسيق شلوتي النزعة وحدفك على الرغبة الغير متوقعة في آخر اللسته فأحب أقولك حصلت ل”بقر“ قبلك فاثبت كده علشان إنت و افد المزرعة الجديد.

ك”بقرة“ سابقة بتكتشف إن سنين عمرك في الجامعة تقدر تسكنها تحت تشابتر ”مفيش“، وزي ما خرجت من ابتدائي بنشيد الأبجدية غالبًا هتخرج من الجامعة بفكرة أو اتنين والكثير جدًا من الولا حاجة، وزي ما البقري يختموها في الشفخانة علشان يتأكدوا إنها صالحة للاستهلاك الأدمي بيختموك انت برضه.

وانت متخرج من الجامعة. هيدوك شهادة "كبيرة" بس محدش هيفهمك يعني إيه "كبيرة" ومقاسها الكبير ده مقارنة بمين ومع أنهى شهادة ثانية في بلد ثانية.

يا صديقي اللي مستني السمنة من بطن النملة وقاعد على أحر من الجمر مستني تنسيق الثانوية العامة أنا مش عايزاك تحبط لإننا يا عزيزي كلنا "بقر".

إحنا السابقين حاولنا نتمرد على الشريحة المغروسة في الجلد ويمكن وصلنا متأخرشوية، لكن انت كـ"بقر" مستجد لسه قدامك فرصة.

استقبل نسبك المئوية اللي الست الوالدة بتضيف عليها عشرة في المية وهي بتبهاى قدام الجيران واعرف إن الرقمين دول مش هُم قيمتك الفعلية.

خض معركتك بشجاعة في اختيار الكلية اللي عارف ومتأكد إنك هتقدر تنجح فيها، لو عندك ضلالات مجتمعية وهلاوس عائلية بفعل الضغط المستمر احسم خوفك بدري رد عليهم ببساطة إن شاء الله الصبح بدري هنجيب اتنين رجالة شداد هيشيلوا اسم العيلة ويطوحوه لأبعد نقطة ممكنة، وركز انك تكتشف نفسك إنسانياً ومعرفياً في مجال يناسب قدراتك وتحمل نتيجة اختياراتك بكل شجاعة.

ابني لنفسك طريقة للتعلم عن الحياة كلها تكون أكبر من حيطان مدرسة أو جامعة أو مدرج لسه بي فصلوا فيه البنات عن الولاد أحسن الخطيئة تقع لو كوعك خبط في إيد زميلتك، وأكبر من مقررات تقدر

تقراها كلها بضغطة زرار على الإنترنت.

اخلق لنفسك مساحة حرة للتفكير والاختيار باللي يناسبك،
وصحي فضيلة الشك المنسية.

ببساطة اتعلم انك تجهز روحك للدينا ”الكبيرة“ مش بالشهادة
ال ”كبيرة“ اللي هيختموك بيها كمواطن ”بقرة“ صالح لم يثر شغباً
طيلة فترات انتظاره للحلب المتوحد مع شريحته المتسق مع مساره
المحدد سلفاً.

استعد لكن بدماع ”كبيرة“ تكون قادرة إنها تفند وتزيل الغشاوة
من كل اللي هيتباعلك بعد كده في ورق سوليفان سواء من البشر أو
الواقع.

أتمنالك عتبة جديدة لحياة تشبه روحك وتفاصيلك.

وك”بقرة“ سابقة أحب أبلغك سلام باقي البقر اللي بيحاولوا
يتأقلموا جوه الشفخانة لغاية ما نتشعبط في جلابية ثورة نؤمن فيها
أنّ التعليم والتعلم هم في الأصل حرية واختيار.
وساعتها هنتف بصوت واحد ”كفاية بقربقى“.

يا حيوان

لمّا بنحب نشتم حد بنقوله ”يا حيوان“.

والحقيقة أنا معرفش هل دي فعلاً شتيمة ولّا حاجة حلوة واحنا مش واخدين بالننا.

دائمًا بنصف أي شذوذ في السلوك الإنساني إنه تحول وبقي على رأي زينات صدقي في ابن حميدو ”إنسان الغاب طويل الناب“.

هل فعلاً الصفات المنزوعة منها تاتش الإنسانية ينطبق عليها الصفة الحيوانية؟

وهل أصلاً ينفع نقارن بين عالمين ممكن يتقاطعا في نقط تشابه بس هل المقارنة بتكون لتفضيل عالم عن عالم آخر؟

من زمان بسأل نفسي إيه نوع التكريم اللي حصل عليه الإنسان في كونه إنسان مثلاً؟

أنا في البداية كنت فاكرة إنه ميزة العقل اللي هتخليه يقديدير حياته ويتعرف مثلاً على الكون حوالية أو على اللي خلق الكون ذاته فيعبده.

لكن هل ده حقيقي؟ هل العقل هو الميزة اللي بتفرّق الإنسان عن غيره من العوالم سواء حيوان أو نبات أو أي عوالم تانية ممكن تتوجد في أكوان تانية موازية.

اللي بشوفه إن أي ذرة عقل زيادة أو أي مهارة تفكير زيادة عن

المتعارف عليه بتسبب لصاحبها نوع من الشقاء الإنساني العجيب
المستحق فعلاً للدهشة.

هل الإنسان المغيب العقل أسعد حالاً؟

منعرفش بس اللي نعرفه إنه مرفوع عنه الحساب والمحاسبة
والتفسير والتأويل لتصرفاته فبالتالي هو مش شقي هو سعيد بحالة
غياب العقل... احتمال!

هل الإنسان عقله قدر يسعده؟

هنقول عمل الاختراعات والحديثكانات والأدوية والفن والمزيكا
والتمثيل والمسرح، بس كل القنوات دي هي طريقة الإنسان اللي
عنده فولت كهربا عالي في دماغه وعقله علشان يتعايش مع واقع هو
ماختاروش.

محدث بيختار يبقى إنسان ولأ حيوان ولأ نبات، اللي حصل انك
اتقيدت في الدفاتر في سيكشن الإنسنانات فقامت الصبح بالليل
وانت مقتنع انك أحسن حالاً من كل السيكشنز الثانية.

أنا مش هتكلم عن السيكشنز الثانية، أنا هتكلم عن عالم
الحيوان اللي ابتدى معايا من بداية تعرفي على النمل والصراصير
واني كطفلة مخفتش منهم يمكن لأن كان عندي أخين بيحبوا يعملوا
دراسات ميدانية على الحشرات دول.

ولمّا كبرت ابتدى يتشكل جوه مني الخوف الغير مبرر اللي بيكبر
جوانا من كل حاجة متشبهناش، فابتديت أخاف من كل كائن على
أربع لدرجة سألت نفسي هو مين اللي خايف من الثاني؟

مش يمكن زي ما انا خايفة منهم هو أوهي كمان مستقلين دمي
وشايفين إني كائن مختلف ماشي على اتنين ومعدوش ديل، يبقى
منطقيًا إن الخوف متبادل.

ليه أنا تعاملت مع تعاملي مع الحيوان من منطلق الخوف،
وعلشان أخرج من دايرة الخوف قفزت على دايرة أشد قبحًا وهي
دايرة السيطرة فبقى الحيوان ده لازم يخضع لي ويسمع كلامي.

وابتديت اتطور في علاقتي بالحيوانات للدرجة اللي بتخليني
أتعاطف مع الاحصنة بتاعت الحناطير في شوارع مدينتنا العجيبة
اللي لسه محتفضلة بالحناطير ولا هي اهتمت بهم ولا هي اداتهم بديل
أكثر إنسانية للتعايش والتعاطف مع منظر كهم المتقرح أو أجسامهم
الهزيلة جدًا واللي مضطرين يجروا بيها عيلة فشيخة وزن كل فرد فيهم
لا يقل عن 100 كجم.

وإمعانًا في الإهانة العيلة الفشيخة قادرة انها تعمل صخب كوني
غير مسبوق لمجرد انهم فكروا ينزلوا يركبوا حنطور ويتفسحوا.

وفي أول زيارة ليا ف السيرك حسيت بالبوؤس الشديد وكنت على
وشك إني أقوم لولا إني افتكرت إني تلقيت دعوة كريمة من ناس أكثر
كرمًا لحضور السيرك حيث الحيوانات بتتجرد من كل حاجة وبتتلقى
طلقات مُخدرة علشان تبان قدامنا انها أليفة ومطبعة، وفي الحقيقة
هي متخدرة لدرجة انها بتتطوح قدامنا واحنا هلكانين من الضحك.

مش عارفة مين الأكثر بوؤس الحيوانات اللي خضعت للسيطرة
واتحطت في أقفاص بغير إرادتها لمجرد انها اتكتبت في السيكشن انها
حيوانات.

ولا اللي بره القفص اللي مقتنع إنه كده انتصر في معركة ما وقدر
يوصل لطوبة جديدة في نظرية البهجة. (يا خي طوبة لما تقع على
دماغك تفشفسها).

الدايرة بتاعتي دلوقتي بقت عبارة عن حيوانات... أينعم.
يعني بتعرف على الحيوان الأول وبعدين ببني علاقتي مع العيلة
اللي بتربيته.

بقى عندي حالة انسحاب من عالم الإنسنانات وانتماء لعالم
تاني معرفش عنه كتير، لكنه قادر على إنه يدهشني وهو عالم
الحيوانات.

كتير كنت بسمع العبارة العظيمة طب ما تكفلي طفل يتيم مثلاً،
أو تطلعي اللي بتصرفيه على الحيوانات على حد محتاج.

وساعتها كنت بستغرب من المنطق المغرق في العبث المقترن
إن فيه أفضلية في الرحمة ودايمًا الأفضلية محسومة طبعًا لصالح
البيني آدمين.

العبث المقترن بمنطق ده حيوان ما يموت، طب ما احنا
كوووولنا هنموت.

ومنطق الرحمة عندي هو المنطق اللي بيتعاطف مع أضعف
حلقة واللي معندوش أوبشن تاني غير أنك تترقف بيه وتحاول تصحي
إنسانيتك من خلاله مش علشانه علشانك انت.

المنطق بتاعي إني مش محتاجة أبرر تصرفاتي ولا احدد أولوياتي
في ضوء الأجندة المجتمعية اللي هم أصلًا محدش بيهتم بيها، بيطلعوها

فجأة من دولاب دماغهم من على رف الحكمة والفضيلة لمَّا يتعلق الموضوع بالفلوس ومين أولى بيها.

الموضوع ده مبقاش محل جدال بالنسبة لي لأنه اتحسم خلاص، لكن السؤال اللي فعلاً مش لاقية ليه إجابة: هل الإنسان اتكرم فعلاً بعقله، ولَّا شقي بيه؟!!!

هل الإنسان أفضل من الحيوان بدرجة تسمحله إنه يتكبر ويتعنظ عليه ويفرض عليه سيطرته ولا لا؟

كان نفسي اتخيل حوار مثلاً مع قط أو فار أو فيل والمذيع مثلاً بيقرب منهم الكاميرا ويقولهم إيه رأيكوا لو عندنا أوبشن الخلق من أول وجديد؟

والخالق ادالك العصاية السحرية وممكن تبقى تن... تن... أو تان... تان.

يا ترى هتختار تبقى حيوان ولا هتبقى إنسان؟

الإجابة اللي اعرفها هي إجابة القطط، أعتقد انها هتقول لا طبعاً وانا هبلة علشان ابقى عايشة حياتي زيكم، أنا هفضل قطة، واعي ش قطة، واموت قطة.

ولمَّا تصعب عليا نفسي واسألها طب ليه شايفة إن العيشة كقطة يعني أحسن؟

فهتوقع إن الإجابة هتكون أنا باكل كويس، بلعب في الوقت اللي بحبه، بمارس جنس مع اللي يستهويني.

ولمَّا بطلع الشارع وخلص زنقت ومفيش أي مجال للقتال بيبقى

الموت والبقاء طبعاً للأقوى.

المعركة محسومة يا عزيزتي الإنسانية، أنا معنديش (code of ethics) اتحاسب عليه.

وحتى لو افترضنا أن عوالم الحيوانات لها لغة وكودز ودنيا ثانية لوحدها، المؤشرات الخارجية بتقول إن تحدياتهم في الحياة محسومة.

وفوق كده معندهومش المعضلة الأولية مين هيخش الجنة ومين هيخش النار.

وبالتالي الحياة مش متحاسبة.

استني بس عندك يا ست المديعة مين قالك، أكيد فيه نار للقطط وجنة لهم برضه.

انتي بتتكلمي ف إيه... استغفر الله العظيم... انتي هتكفرينا ولأ إيه... غوري بعيد عن وشي أنا مش هكمل البرنامج.

وتمشي القطة بعيد وتسبيني مع نفس السؤال:

يا ترى التكريم للإنسان كان بإية!!!

يا ترى العقل.

طب ماذا عن الإرادة "إنه يختار"؟

مش يمكن مكنش اختار يبقى إنسان وكده.

بعد الرغي الشنيع ده، بطلوا تقولوا يا حيوان، علشان أصلها مش شتيمة.

ربوا أي نوع من الحيوانات هتغير دنيتم تمامًا.

وأخيرًا... أمنية هكتها في جدول الأمنيات:

”في يوم هتخلى عن كل حاجة وكل حد، وهروح أعيش في أي
محمية طبيعية في أفريقيا“.

أنا مش هعمل للحيوانات حاجة، أنا هصبح عليهم كل يوم
الصبح و اقولهم... أنا بقى الإنسان، احمدا ربنا على اللي انتوا فيه.
بس كده.

توتة توتة مبتخلصشي الحدوتة

يوم الجمعة الصبح، هدايا الكون العشوائية الجميلة خلتي اتورط في قراية حدوتة أطفال عن "عصفور" مهيبض الجناح في يوم صحي من النوم ولقى كل العصافير بتصوصو وهو مش عارف.

ولأن مامته "حمها ليه" أكبر من إنها تقوله إنه مش عارف "هي قالتله انا بحبك حتى لو مكنش عندك صوت".

العصفور لقي في محبة أمه حاجة جميلة قدرت انها تقلل من توتره إنه "مش عارف يصوصو" زي بقية العصافير. العصفور كان حاسس بألم لأنه "مش عارف" أو يمكن لأنه مش حاسس إن ليه "مهمة" يقدر يقوم بها.

بالرغم من تأكيد مامته إنها بتحبه حتى وهو مش عارف يصوصو، بس التأكيد ده فضل يضعف، وهيجان روحه فضل يعلى ويغلوش على صوت مامته اللي بياكده طول الوقت إنه "محبوب".

لغاية ما في يوم دخل على مامته العش وقالها أنا هروح أدور على صوتي، مش يمكن أنا مش عصفور أصلاً.

مامته اتفاجأت شوية بس عرفت إنه واقف في نقطة مؤلمة وأي مراسيل تأكيد محبة ووجودها مش هيفيده، فأطلقت سراحه، وقالتله طيب خلاص طير ودور.

وفعلاً، الحدوتة بتفضل تاخذنا لَمَّا العصفور الصغير بيقابل تقريباً كل انواع الحيوانات والطيور، من أول الغراب لأبو قردان

للضفدع. وفي كل مرة يبقابلهم بيحكيلهم إنه مالوش صوت، في كل مرة يحاول، وهم يرددوا عليه ”بصوتهم“ هُم.

أوقات كان بيقفش نفسه بيقلد نفس ”صوتهم“ وبيفشل تمامًا. ويرجع الألم جوه منه أقوى وأشد. قابل كل اللي جم في سكتة، وبعدين في لحظة قرر إنه يمكن هو مش عصفور فعلاً ويمكن هو مالوش صوت برضه، وخلص يعني ”أنا بدور على إيه أصلاً“ راح فارد جناحاته ورجع ناحية العش، ناحية مامته، علشان قرر إنه أول حاجة هيحكيمالها إنه حاول ودور وفتش وقابل الضفدع والغراب وأبوقردان وإنه متأكد إنه مش ده ”صوته“ بس حس إن الألم أخف المرة دي.

أول ما وصل العش بتاعه، شاف مامته، ابتدى يحكيلها، أول ما فتح منقاره لقي الصوصوة اللي كان بيدور عليها. إيه ده أنا ”بغني“.

هولمَّا رجع ليها كان عايز يحكيلها كل اللي قابله في سكتة، وتقريبًا كان خلاص هينسى موضوع صوته، فلقى إن ”صوته“ كان موجود طول الوقت، وانه كان محتاج يرجع ”يعشش“ علشان يبقى عنده حكايات بصوته هوتخلي غنوته هو بتاعته.

مامته كانت مستنياه طول الوقت، هي كانت بتحبه لمَّا شافت حيرته وهو بيدور ”هو إنه عصفور ولا لأ“، وكانت بتحبه لمَّا شافت ألمه إنه مش قادر يصوصو، وكانت بتحبه لمَّا أطلقت سراحه، وكانت بتحبه لمَّا ملت الوقت في غيابه بالصبر، وكانت بتحبه وهي مش مستنية منه أي صوصوة، صوصوة إيه يا نبيلة أصلاً، وكانت بتحبه لمَّا رجع العش وابتدى يرغي أو يصوصو، وأكثر من كده ابتدى ”يعشش“.

يعني إيه بيت؟

فيه واحد من الأفلام، البطلة قالت جملة فضلت ترن في ودني:
«إنت خبيت نفسك مني وختنتي وحيدة في العلاقة، زي ما أكون قاعدة
في بيت شقة شكلها حلو بس أنا جواها كنت لوحدي جدًا». الجملة
دي خلتني أدور هو يعني إيه بيت؟

في الإنجليزي دايمًا كان بيشار للفرق بين Home & House
وبيتحقق الانتصار لكلمة Home بإسباغ عليها معاني مختلفة بتتفق
مع احتياج الإنسان الفطري إن يبقى ليه “موضع” سواء مادي أو
معنوي.

ومن ضمن المعاني المحببة ليا جدًا في وصف كلمة “Home” هو
الوصف التالي اللي قالته Brene Brown في كتابها البديع (Daring
Greatly).

“Home is where we can be our bravest selves and our
fearful selves. Where we practice difficult conversations
and share our shaming moments from school and work.
where we need to listen to the sentence “I’m with you”. In
the arena. And when we fail, we will fail together while
daring greatly. home is where I could be loved for my
vulnerabilities, not despite of them”.

Brene Brown— Daring greatly: p. 56

وترجمته هي: "البيت هو المكان اللي تقدر تشارك وتظهر أجزاء ذاتك الشجاعة وكذلك تلك المنفية الخائفة، إنه المكان الذي يمكن أن نقوم بكل المحادثات الصعبة التي يتعذر علينا إعلانها خارجه. إنه المكان الذي يمكننا أن نتشارك لحظات مرت بنا في المدرسة والعمل شعرنا بالخزي والعاردون أن يتم تأنيبنا أو وصفنا أو الطلب المتكرر بإدعاء الشجاعة.

إنه المكان الذي نحب أن نسمع فيه جملة "نحن سنشد عضدك، حتى وإن حدث الفشل فسنكون بجوارك".

إنه المكان الذي يتم الاحتفاء بقدرتنا وشجاعتنا على مشاركة هشاشتنا وأن نتلقى المحبة لذلك، لا أن نُحب على مضض لكوننا هشين لاحول لنا ولا قوة".

في اللغة العربية، فيه "منزل" وفيه "بيت" وفيه "سكن" وممكن يكون فيه أكثر بس أنا مش عارفة، وفي المعجم اللغوي "سكن" معناها استأنس به واستراح إليه واطمأن.

الآية القرآنية "وخلق لكم من أنفسكم أزواجًا لتسكنوا إليها"، أنا مش عارفة ليه بيتم التدليل عليها في الزواج فقط. كتير من الناس بتروح لفعل "تسكنوا إليها" للإشارة لمعنى الأنس والطمأنينة والاستراحة ودي معاني قيمة للغاية، لكن مفيش توقف عند الترتيب القرآني "الخلق" "لكم" "من أنفسكم"، ومن وجهة نظري ده مهم علشان توصل للمعنى "تسكنوا".

في أحد القبائل الهندية القديمة عندهم حدوتة عن الخلق بيصوروها بتعبان أخضر ليه عنين كل شوية بتبص لديلها وبعدين

بتلف لفة فبیتغیر لونها وبعدين ترجع تاني، تبص لديلها ويتغير لونها
واللفة اللي بعدها تبقى أكبر.

خلينا نحط فرضية كده ونختبرها سوا: إن البيت هو الأمان اللي
بتحسه في كل مرة بتاخذ لفتك في الدنيا علشان تعيد خلق نفسك.
فكرة الخلق وإعادته تناولته الديانات والأساطير والحواديت،
وعلم النفس دايمًا بيشاور عليه في محاولة "تجلي الذات العليا".

إيه علاقة ده بالسكينة والسكن، على حدود فهمي الشخصي
جدًا إن الترتيب القرآني مبر في إنه بيشاور إن الطريق للوصول
للسكينة مش بفعل "الزواج" قد ما فيه إشارة إلى احتياج الذات
لإعادة خلقها وتخليقها عدد غير محدد من اللفات ممكن يخلي جزء
من الذات العليا "يتجلي".

لحظة الانكشاف أو التنوير أو الرؤية هي مرحلة الشجاعة في
الوقوف على أجزاء الروح الشجاعة والخائفة والهشة والمستحقة
لشفقة والشريرة وكافة التنوعات اللي مش بتتكشف غير بإذن إلهي
على عدد غير معلوم من "اللفات" لورجعنا لأسطورة القبيلة الهندية.

وهنا بيعي الترتيب "أزواجًا" وكأن مرحلة الوصول للسكينة
"الذاتية" وقبول تجليات الذات الأنية والشجاعة ومحبة الأجزاء اللي
لم تتكشف بعد هيتبعها الوجود الإنساني في ثنائية "أزواجًا".

الاختيار الشخصي بالوقوف وحيدًا مش هي الطبيعة الإنسانية
في الكشف عن الذات لأن التحدي بيكون في مدى الشجاعة في
مشاركة أجزاءنا "التي لا تدعو للفخر" مع شخص آخر، والمحبة
الحقيقية والقبول من الطرف الآخر مش بس للحظة تكريم الشجاعة

بمشاركة القصة ولكن بالقبول والفهم إن لسه فيه "لفات" تانية كل طرف لوحده هيجتاج يلفها علشان يبص زي التعبان بعينين كل شوية بتلبس عدسات مختلفة وبتشوف شيء مختلف وبالتالي بتعيد "تخليق" ذاتها مرة تانية.

الإيقاع الفردي مش هو الفطرة، لأن الإيقاع بيحصل لما بتبتدي تزعق بصوتك مع موجات الهوا فاهتزازها هو اللي بينقل "نشازك" وبيخليك تسمعه.

وبعد كده بتوصل بالفهم ده "للسكينة" أو السكن في معناه الأشمل وهو إن روحك تطمئن بوجود مادي أو معنوي.

وساعتها ممكن يتحقق معنى "Home" زي ما أشارت ليه برينييه فوق، بتلاقي مكان مادي أو معنوي، شخص ليه وجود حقيقي استحق من خلال لفات اتبنت فيها الثقة بينكم إن ما هيتم مشاركته من لحظات هشة، هيتم الاحتفاء بيها بمجرد التأكيد بالقبول إن "هنا ودلوقتي ومعايا" تقدر أجزاء روحك المنفية الخائفة تلاقي لهما "قبول" فـ "تستكين".

وهنا بيتيني "سكن" أكبر من البيت، الآية القرآنية "لَيْسَ عَلَيْكُمْ جُنَاحٌ أَنْ تَدْخُلُوا بُيُوتًا غَيْرَ مَسْكُونَةٍ فِيهَا مَتَاعٌ لَكُمْ" فرقت بشكل واضح جدًا بين البيت والسكن.

وده أشبه بالوضع الحالي إن الناس تبدو كأنها عايشة في "أماكن" بس مبتقدرش تطرح ذاتها الحقيقية فبتستخبي ورا دروع بتلتصق بيها لدرجة أن ضريبة التخلص من الدرع ده بيكون انسلاخ من الجلد ومن الذات الحقيقية.

وفيه ناس عايشة في علاقات بتعمل نفس الخدعة واللي
فيلم “her” قالي جملتين بديعتين “إنت خبيت نفسك مني، أنا كنت
وحيدة في العلاقة”، الافتقاد للوجود الإنساني الحقيقي اللي بيقبل
هشاشتك وكليتك وحقك في “اللفات” اللي بتتطوربها روحك وبتعلن
عن نفسها بطريقتها وبإيقاعها وبتوقيتها اللي مش بيخضع لمسطرة
الزمن وحصار الرقم الخالي من المعنى، هو اللي بيخلي الروح “جعانة”
سكن.

وعلشان كده كل شوية والثانية الواحد يسأل نفسه أنا عندي
”مكان“ و”أنا“ و”منزل“ و”بيت“ و”سكن“ و”كلهم“ و”أنا“ و”أنا“ و”أنا“
حاجة أخرى!؟

نسيت اعمل لقلبي حجاب!

في الحدوتة اللي أخذناها في ابتدائي بتاعت السلحفاة والأرنب، فيه إعادة قراءة لها من كذا زاوية وبخاصة في الوقت اللي ثقافة “الجري” و”لازم نلحق” مسيطرة حوالينا وما يتبعها من تأنيب ضمير “ليه مجرناش كفاية”.

على حسب الحدوتة السلحفاة بتوصل بوقتها وبطبيعتها، والأرنب كمان -المفروض- يوصل بوقته وطبيعته، وإن كان المفروض في الأساس إن ميكونش فيه سباق وميكونش فيه الروح الشريرة بتاعت يلانهي مين اللي وصل الأول، لأن في حقيقة الأمر كله هيوصل من جوه طبيعته وكله هيوصل ومش لازم الوصول يكون مرتبط بخط نهاية مستني على أطرافه ناس كثير بتسقف.

لأن غالبًا الناس اللي بتسقف شوية وإيديها هتوجعها وهتمشي وهترجع تسقف على حاجات تانية متخصهاش واللي قاعدين يا ولداه يجروا جوه المتاهة.

في تقاليد القبائل الهندية القديمة، بيتم الاحتفاء بالسلحفاة بس مش علشان “فازت” زي ما بتقولنا الحدوتة، ابدأ بيعتفوا بيها وهي جزء من رموز ثقافتهم بشكل إنهم بيعملوا منها حجاب. أيوة علاقة صغيرة على شكل سلحفاة بيصنعوها من جلد غزال (ليه جلد غزال ده ليه دلالة تانية)، العُلاقة دي بيحنتوا فيها “مشيمة الطفل” بيشفوا إن ده آخر حبل متشاف يربط بين الأم وبناتها وده من ضمن طقوس احتفالهم باستقبال المولودة الأنثى.

السلحفاة الحجاب بالنسبة لهم هي عبارة عن صلاة سرية بطول العمر للبنت، البنت في القبيلة هي مصدر القوة والقدرة على الخلق وتمير الطقوس من جيل لجيل.

يتم خياطة العُلَاقَة السلحفاة اللي جواها المشيمة في هدوم المولودة الطفلة علشان تفكرها إنها محمية دايماً بروح وطاقَة السلحفاة.

السلحفاة بتكمل في الثقافة الروحانية، بيحتفلوا مع الطفلة بأول حلم لها، آه والله أول ما تشوف حلم بيحتفلوا بيها (فينك يا كارل يا يونغ يا حبيبي فرهدت نفسك في كتاب أحمر وخلافه والحاجات سهلة أهي).

مراسم الاحتفال عبارة عن إنهم بيطبخوا شوربة السلحفاة. القبائل القديمة مؤمنين بقوة وطاقَة الأحلام (من غير تحليلها يا فرويد ولا يا يونغ يا ابني)، وشايفين إن كل حلم مهما كان وراه حكمة قوية قد تصل إنها تكون مقدسة.

بنتنا بتحكي عن أول حلم لها، بيسقوها شوربة السلحفاة اللذيذة (بصوت رمضان السكري) علشان يفكروها دايماً إنها هتمشي في الدنيا محمية بروح قوية مقدسة بتتجلى أحياناً في السلحفاة. وأن الروح المقدسة دي، هتتواصل دايماً معاها وتكلمها من خلال الأحلام وهتبعثها علامات.

”الحجاب“ من الحاجات المثيرة جدًّا اللي ممكن تلاقها اتكررت في ثقافات حرفياً هم مقابلوش بعض، كفرطهشنا في جنوب مصر مثلاً، وقبائل هندية قربت ع الانقراض في أمريكا ع الناحية الثانية

تاتا خطي العتبة

في مرة زارني طفلة مكملتش سنة، كنا ثلاث ستات أو كائنات كبيرة عاقلة قاعدين على كراسي الأنترية. الطفلة اتسلت من على حجر مامتها وابتدت تكتشف الأرض، وبعدين ابتدت تعمل صداقات مع رجلين الكراسي لأنها كانت الارتفاع الوحيد اللي على مستوى نظرها.

في لحظة معينة قررت هوووب تقف على رجلها، أنا فاكرة المنظر لمّا كانت بتتني روكها حبة وبعدين تفردهم تاني وبعدين تتني روكها، مفهمتش هي عايزة تقف ولا عايزة تمشي ومين اللي قالها انها علشان تقف لازم تفرد رجلها وتشد روكها ولا مين قالها علشان تمشي لو قررت إنها محتاجة روكها مش متنية.

المهم الطفلة قررت انها تفرد روكها وبعدين عملت أول خطوة بالاستناد على الكرسي فردت ظهرها أكثر. المسافة بين الكرسي بتاع مامتها والكرسي بتاعي كان تقريبا 20 سم، ومفيش بينهم أي مسند.

فضلت تعمل خطوات برجلها الصغيرة وهي لسه متبته على رجلين كرسي مامتها. وفجأة وقفت بين الكرسيين، لأن دراعها مش هيسمحلها انها تفضل متبته في رجلين الكرسي الأول، ودراعها القصير برضه مش قادر يوديها دلوقتي لرجلين الكرسي الثاني.

وقفت شوية كده وف ثانية واحدة ابتدت تعيط، ساعتها احنا وقفنا الكلام وابتدينا ننتبه، صديقتنا الثالثة هبت واقفة لإنقاذ البنات، بصينا عليها و اتأكدنا إن مفيش خطر بالنبسالها و اننا قريبين

منها وأي احتمالية وقوع احنا موجودين وهنسندها.

فاكرة برضه اننا قررنا أنا ومامتها لا سيبها متمسكهاش، البنث فضلت تعيط شوية واحنا فضلنا نسمّعها صوتنا اننا موجودين حوالها بس ممسكهاش، وقفت عياط، نزلت على روكها، زحفت زحفاية وبعدين وصلت لرجلين الكرسي الثاني وهناك وقفت تانية روكها وأعدت نفس المشهد بتاع رجلين الكرسي الأولاني تتني روكها شوية تشد ظهرها ترجع تتني روكها لغاية ما ف لحظة بصت لنا فاحنا فهمنا وكلنا سقفنا الله بر افو شطورة انتي جميلة وبعدين وقفت شوية عند رجلين الكرسي الثاني لغاية ما تقريبا زهقت وبعدين قررت تنزل على الأرض تزحف وتكتشف علبة البسكوت في مكان تاني.

أنا مش عارفة إيه التطور اللي حصل في النص اللي خلانا نحول العياط لارتباك الوقوف بين رجلين كرسي 1 وكرسي 2 ميبقاش

عياط معلن، وإمتي التطور حول لحظة الوقوف العاجز دي لكادرات كتيرزي الاختباء في الجلد وجوه الجلد أو لبس ماسكات المرح والبهجة أو توجيه لكمات الغضب للآخرين في المحاولة الصوتية الساذجة لطلب المساعدة بس هي بتطلع غضب أو لربما في جوهرها هي زعل من اللحظة اللي بنقف فيها بين كرسيين ومضطرين نسيب الأول وإيدينا مش طائلة الثاني.

يمكن بيفرق في لحظة الارتباك دي ولحظة التحميل على الروكب ومفاصل الروح اننا نسمع صوت حوالينا يقولنا "أنا معاك" مش لازم يقولنا خطبة عن قيمة "الكراسي ولا رجليها" ولا عن قيمة "المحاولة والتجريب" ولا يهب ينجدنا وينقذنا أحسن يا ولداه هنقع على بوزنا،

ولا إنه يعدل مسارات بوجه "مستني منك أي حاجة في أي ناحية" وبيقولنا "أنا معاك علشان أنا شايف ألم لحظة الوقوف المرتبك اللي أنت فيها" الصوت اللي مش لازم يقولنا قد إيه كان أمان حجر أمك واما انت كنت متبت في رجلين الكرسي الأولاني، وإيه لزمة تروح هناك ما الكرسي ده زي الكرسي الثاني.

الصوت اللي بير اقب في صبر ومحبة ومش بيحسسك إنه بير اقب ولا مستني هو صوت مشغول بدنيا تانية لكنه موجود حواليك موجود وعينه عليك حتى لو مش متوجهة ليك بشكل مباشر أو بتتابع ماتش أوليمبيات الوصول بين الكرسيين.

إن الصوت موجود وبيقولك إنه معاك ممكن يخليك توصل، وهو دايماً الناس بتوصل مكنتش المشكلة انها توصل للكرسي ولا للكنبه، يمكن كانوا محتاجينا لو قررت في لحظة معينة انها خلاص هتوقف ومش لاعبين وهتستسلم لـ"وهم الوصول" للنقطة دي.

مجرد الصوت اللي مش لازم الصغيرين يختبروا وجوده في مرحلة اختبار مفصلات روحهم، روكيم، قدرتهم على الوقوف لفترة زمنية قد إيه، وقدرتهم على إفلات الإيد من الكرسي الأولاني والعينين اللي رايحة على كرسي هناك مش هو الهدف في حد ذاته أو يمكن في وقت ما بيكون كده، بس المحاولة في الوصول واكتشاف قدرتك انك تعمل ده، واكتشاف اللحظة اللي بتقرر تعيط زي العيال أو تتخفى بحيل الكبار العاقلين أو تقف وتزحف وتاخذ نفس وتكمل أو إنك تسامح كل المحاولات أو عدمها لَمَّا تقول نفسك إن الألم ممكن تستقبله بطريقة أرحم لَمَّا يكون فيه صوت بيقولك "أنا معاك"، خد وقتك.

يعني إيه حُب؟!

بقالي فترة مش قليلة بختبر ”يعني إيه حُب؟“، الدواير المفرغة اللي بتبتدي من أول اللي بيتعرض لأذى مقصود أو غير مقصود، واعي أو غير واعي من الدائرة الأولى اللي مش بيختارها وهي عيلته، محاولات التملص من الأذى بالتعرف عليه مع إبقاء مسافة آمنة لعدم التعرض لأذى بيستوجبه ضرورة القرب لكن يفضل دايمًا حتة ناقصة، شيء غير مشيع، جوع مستمر.

الدائرة اللي بعديها أنا مبخترش عيلتي إذن نعمل بقى عيلة بديلة سواء بقرار تكوين عيلة فعليًا بشكلها الرسمي أو بقرار الانتماء لكومينتي فيه رابطة تشبه العيلة الأولية، دايرة الأذى الجديد وإعادة استنساخه في شكل جديد، الدائرة اللي بتبتدي بـ”أنا هركز علشان المرة دي باختياري“ لغاية الانتهاء بـ”مفيش صاحب بيتصاحب“ ومرورا بـ”كله بيمشي“.

الدائرة بتاعت أه البني آدم محتاج علاقة واحدة مشبعة إنسانياً فتلاقي نفسك بتفرز كل الزيتة اللي عدت عليك علشان تقفش في أم العلاقة دي، ويبصعب عليك نفسك شوية من كل الزيتة اللي بتنزل على مفيش وبتحس أنك بتحرت في مية، الدائرة بتاعت لأ ما هوانت مش هتحس بالحُب ولا هتقدر تدي غير لَمَّا تحب نفسك، سواء بقى حب نفسك ودلعها ولَّا خد حبوب الشجاعة وخش الأوضة الضلمة في قلبك ومتخافش.

الدائرة بتاعت مش نافع حُب البني آدمين فالحل اننا نحب

الحيوانات ونبوس الشجر ونمشي في الشوارع وندور عليه في خرم
إبرة، وفي الآخر نروح واحنا معانا قدر لا بأس بيه من الوهم يساعدا
على ابتلاع الخيبة والإحباط المحتمل.

الدائرة بتاعت نزرع زراعية ونشوفها بتدبل وبعدين بتكبر وبعدين
نقعد نتهد الله احنا بقى في أنهي مرحلة، إحنا بندبل ولّا بنورق ولّا
احنا الباترن بتاعنا مش نباتي فليه متشعلقين إن الحل مكتوب في
الخلايا النباتية.

الدائرة بتاعت نتورط في علاقة مع شخص وهي تورط لإنه حُب
معجون بأذى، الأذى الخفي اللي بيتسرب لكل خلايا جسمك،
معجون بفحيح اللغة المراوغة ”أنا هكون معاي، أنا ف ضهرك، أنا
بحبك“ وكل الوعود اللي أكبر من إنها تتأطر في لغة ولا نحطها في جملة
ونقفل عليها بنقطة في النهاية، وننساها وننسى إن يا ريت منقولهاش
إلّا لو فعلاً هنتحمل مسئوليتها وهنشيل أمانتها.

دواير دواير دواير وعلى رأي الست وردة ”بنلف نلف نلف“.
العلاقات معقدة مش مختلفة عن تعقيد العالم، والكون بحاله، بس
ده مش كفاية علشان يخليني أحس بإنه لا بأس في ذلك.

العلاقات معقدة ومجهدّة ومن المريح جدًّا إن في وقت ما نزل،
نزل جدًّا، نزل خالص، نروح للحزن لآخره على الفقد اللي مش
هينفع يتعوض خلاص ”الفقد المرتبط بالحُب“ اللي وصلنا بعد عناء
إننا نستحقه مش لشيء غير إننا يعني جينا الدنيا دي بكل خناقاتها
دي فأقل ترضية لينا إننا نتحب ووجودنا يتم الاحتفاء به، بس
للأسف الوصول ده مكنش متبوع بأيوة بقى خلاص التعويذة اتفكت

والمغارة هتفتتح على الكنز جواها وهندوق من المحبة لَمَّا نتكرع.

طلع مفيش، مفيش غيردو ايربترهن في كل مرة بتلف جواها على قدرتك على ممارسة تمارين كشفك لنفسك، تفسح مكان ع الكنبه لشخص تاني أو أشخاص أو حتى أفكار تيجي تقعد جنبك على الكنبه لغاية ما تقضي مصلحتها وتاخذ واجبها وتمشي.

أه ما هي هتمشي، علشان ميعاد الزيارة خلص، والاستشارة خلاص وهم وانت دفعتموا الفزيتا كاملة والاتفاق المكتوب أو اللي مش مكتوب كان كده فمشيوا، قدرتك على مراوغة الحزن وانت بتأمل وبتتألم وبتسأل نفسك يا ترى هو أنا اللي غلطان إني اشتريت كنبه كبيرة وعزمت عليها كثير، مش يمكن كان كرسي صغير كفاية، ولأ ما خسرناش برضه قعدنا حبة حلوين وملينا زمزية الوهم بمية وسكر اهم يسندونا علشان مندروخش ونقع.

وبعدين تقعد مع نفسك وتقول ما هُمَ ”بشر“ بنحاسيم على إيه، بس إحنا مش بنحاسيم إحنا محتاجينهم، محتاجين وجودهم المطمئن في لحظات الانهيار، الوجود العابر في جدوره لكنه بيبيع نفسه على إنه أصيل وحقيقي وممتد ومؤذي، الوجود العشوائي الواعد بانه لا ابدًا لا يمكن احنا مش ”عشوائيين“، مؤذي لأن البشر متصلين، جعائين للتجذر، عندهم ميل فطري للزراعة اللي بتتطلب وقت وجهد وصبر وحزن وثبات ومعلش الشجرة مطرحتش النهاردة نستنى شوية، نختار نبقى يمكن يكون الاختيار اليأس اللي ما احنا هنبقى علشان معندناش اختيار تاني وضرنا في ”الحيط“.

أو لربما وده احتمال لسه مقابلتوش البقاء لأن فيه اختيار واعي

بالبقاء وسبق منه اختيار واعي بالاختيار أصلاً.

فكل ده محصلش، والدواير فضلت تلف، مَرّة توسع ومَرّة تضيق، مَرّة يبقى عليها تيكت ومَرّة يبقى معلمهاش، مَرّة يبقى لها خناقة ومَرّة تيجي زي موجة المية، مَرّة تبقى مصحوبة بتنهيدة اللي بيحط حمل من على كتافه ويقول لنفسه خلاص ”حمد لله على سلامة الوصول“ ومَرّة بتكون مصحوبة بهمهمات صلاة سرية ”أتمنى تكون دي اللفة الأخيرة“.

مَرّة تكون مصحوبة بحضن كبير يساع كل البشر، ومَرّة يكون فيها تخلي كامل عن البشر، دواير بتلف تلف تلف.

الإيمان بمحبة الإله أوقات بيكون الخلاص والصلاة والصلة والتجرد والتخلي والسمو والبلوغ والترقي اللي هيعين على إن النبي آدم يكسر الدوران مؤقتاً بس لإنهم بشر مخلوقين من ”عشم في احتمالية لابس هوفيه“ هيرجعوا من وقت للتاني يلفوا في الدواير. دواير دواير.

يمكن فيه جزء من الإيمان بأن المحبة ”هنا“ بره كل الدواير دي هي في الوصول للتخلي، إفلات اليد من التمسك أصلاً بالدواير بكل معطياتها بالرغم من النهيق المستمر والرغبة في وصم وجلد الذات ”أصلك محاولتش كفاية، يا أخي“.


السماح للروح إنها تحزن وف نفس الوقت تاخد وقتها إنها يصعب عليها روحها انه فضلت ”تسعى تسعى تسعى“ وإن يعني محدش مغسل وضامن جنة ويكفيك شرف المحاولة، والسماح للروح المنهكة برضه انها تعترف لنفسها إنها محتاجة لاستراحة، مش علشان ترجع تلف في

الترس بسرعة أكبر، بالعكس يمكن علشان تتخلي أصلاً عن محاولة المحاولة في حد ذاتها.

يمكن وقتها المحبة متحصل في الفعل الرحيم العشوائي اللي هتمارسه بوعي وتديله مية قلبك بالكامل مع ناس ”غريباء“ وإنت بتتمشى في شوارع مخنوقة وزحمة، هتمارس الفعل ده مع شخص غريب، وهمشي خطوة وهتدسى أنت عملت إيه أطلقت سراح نفسك إنك ”تحتاجله“ أو تستنى منه إنه يوطد علاقته معاك، أو إنه يشوف فيك اختيار حقيقي ممكن يزرع فيه ويختار يبقى.

أنت بتعمل الفعل الرحيم وبتسيب، على قد دراعك بتسيب، وعلى قد خطوتك بتمشي وعلى قد الخذلان في قلبك بتسامحه لإنه ”غريب“، وبتبت بس في إنك في لحظة ما مارست فعل الرحمة والمحبة، والفعل خلاص أطلقت سراحه وسراحك معاه إنك تفضل تلف في دو اير بتدور على الحطة الناقصة، يمكن لأنها مكنتش ناقصة، هي مكنتش موجودة بالأساس.

كما نثق بكتابنا نثق بصوتك / هنا نصغي إليك!



الصالَة للنشر والتوزيع

AL HALA PUBLISHING & DISTRIBUTION



تواصل معنا، ونحن نسمعك!

<https://www.facebook.com/alhalapublishing>

info@alhalapublishing.com

يمكنك التواصل أيضا مع المؤلفة / r.azizeldin@gmail.com